

Po Coyenein Jesucristo Pia Peitorobiwi Tatsi Pexeinya Coyenein Exana

Meje yabara xua Lucas yabara tina xua Nacom yabara tsiw_{nae} muxu duta xua itorobina jiwitha pia Pejumope t_{na}x_u tatsi.

¹ Xam, Teófilom, tajiton cata tinatsi. Bay-atha copiya matha cain cata tinatsi icha diwesi. Barapo diwesitha yabara catsipaebatsi daxita po coyenewan xua Jesús exana. Cata tinatsi bay-atha daxita xua po mataqueitha Jesús tamropata pitaba po coyene xua peexanaewa, matautano xua pecuidubiwano, xua beya yacui weraweracananya po mataqueitha poxonae athabe juinya.

² Poxonae pew_{nae}ya tsane xua Jesús athabe icha, matha pia peitorobiwi itapeta. Jesús cuiduba barapomonaе xua Nacom pia Pejumope t_{na}x_u tatsi pia peayapus_watha tatsi. Jesús cata barapomonaе po coyenewan xua Jesús petaexanaenexa tsainchi.

³ Poxonae Jesús equeicha as_u, poxonae bequein t_{pa}, bapoxonae Jesús tsita nait_{ta} barapomonaetha. Cuarenta po matakabibetha Jesús tsita nait_{ba} ducua_{nae}biya barapomonaе. Petsita nait_{ba} ducua_{nae}biyaexae pijimonaе, barapoxonaе pijimonaе yaputainchi xua xaniwaicha bara pet_{pa}ein equeicha as_u. Jesús barapo pia peitorobiwi yabara cuiduba po coyene Nacom waba jiw

petanaexanaenexatsi pijimonae pomonae itorobiya peewatsixae.

⁴ Poxonae cataunxuae awiya Jesús pia peitorobiwi bar_u nacaetuta ducuaenaebiya, Jesús barai, jeye:

—Ab_u jopa paponaeinde Jerusalén tomara weya. Paeware xua Nacom Taxa bayatha yabara paca tsiw_unae muxu duta. Taxa namchi: ‘Tajumope t_unax_u itorobicaein’, jei. Baraxua bayatha paca tsipaebatsi.

⁵ Barapon Juan bautisaba _u meratha. Ichitha tsiwiyo bayiyo bexa tsane Nacom pia Pejumope t_unax_utha tatsi paca bautisabina. Pacata patsina Nacom pia Pejumope t_unax_u tatsi painya paca bar_u poponaenexa tsane, jei Jesús pijimonaetha.

Meje yabara poxonae Jesús athabe icha

⁶ Poxonae Jesús pia peitorobiwi bar_u nacaetutatsi Jesús yainyabatsi pia peitorobiwi, jeichichi:

—Jesús, pata Necanamataxeinaem, ¿methaunxuae anoxuae exanaename xua Israel nacuapiwi equeicha xeinaena itorobiya pia pepa peewatsinchi? jeichichi Jesús pijimonae.

⁷ Jesús jume nota pijimonae, jeye:

—Paxam jopa paca itac_upaeyo xua painya neyaputaewa po dapae poxonae Nacom peexanaewa tsane baxua, matautano xua po mataqueitha poxonae peexanaewa tsane. Saya meisa Taxa xeina peayapus_u itorobi coyenewa, po peayapus_u itorobi coyenewatha xua peexanaewa baxua.

⁸ Poxonae Nacom pia Pejumope t_unax_u tatsi pacata patsina painya nepaca bar_u poponaenexa xua bapoxonae peayapus_uwa

painya nexeinaenexa. Tajume diwesi painta papaebiname Jerusalén tomaratha, Judea nacuathano, Samaria nacuathano, daxita carepaya taj_u nacuantha, jei Jesús.

⁹ Poxonae Jesús baxua najume weta, Jesús athabe caichatsi Nacom. Jesús pia peitorobiwi taeumeinyatsi. Barapomonae tsaquinaebowa tane xua Jesús matawacaicha duneicatsi. Equeicha Jesús jopa taetsi.

¹⁰ Poxonae awiya came barapomonae necotumeinya itaboco, barapomonae jemeicha caquita umenar_uc_upatsi pon xua nacueyatabe, ponbe xua pemainya paparuwa penama xatatsinbe.

¹¹ Baraponbe Jesús pijimonae tatsi baraichi, jeye:

—Ja, pomonae Galilea nacuapiwi pam, ¿eta xua metha came awiya paitaboco necotumeinyame? Bapon Jesús, pon xuaunxuae athabe icha painya xamtha, bexa tsane equeicha patopaetsica, barapocotsi j_uta coyeneya ichi tsane ichaunxuae aunxuae icha ichi, poxonae athabe icha.

Meje yabara poxonae Jesús pia peitorobi jiwi tatsi Matías itapetatsi Judas pecoutha petanacuichiwa tsainchi

¹² Barapoxonae Jesús pia peitorobi jiwi tatsi demxuwa weiyiya po demxuwa pew_un Olivo demxuwa xua Jerusalén tomara be-iyiya. Poxoru Jerusalén tomara imoxoyo daxota barapomonae itac_upatsi xua peponaewa Jerusalén tomara beya demxuwa weya bequein bara judiomonae pia pentaquei seicae matabi tatsi saya poxoru

Moisés pia peitorobi coyenewatha baxua peyabara copatsixae.

¹³ Poxonae Jesús pia peitorobiwi tatsi pareca Jerusalén tomaratha, athabe jujuinya po tututha athawetsica jinompa. Baraxota jinompa Jesús pia peitorobiwi tatsi pewun Pedro, iru Juan, iru Santiago, iru Andrés, iru Felipe, iru Tomás, iru Bartolomé, iru Mateo. Iru popona ichun Santiago pon Alfeo pexanto tatsi. Iru popona ichun pon pewun Simón. Barapon Simón celotemonae jiwanapin. Barapo celotemonae pomonae ba ichichipa xua pexeinaewa barompaya pia pecanamataxeinaeinchi. Iru popona ichun pon pewun Judas pon Santiago pexanto tatsi.

¹⁴ Daxita barapomonae iru Jesús peyapin jiwi tatsi baru nacaetuteibatsi, xua pebaru tsipaebeibinexatsi Nacomtha. Iru Jesús pena tatsi, bapowa María, iru ichowaxi yabuxi baru nacaetuteibatsi xua pebaru tsipaebeibinexatsi Nacomtha.

¹⁵ Nexata caentacabi Pedro nontapona ichaxota ena pomonae xua Jesús pejume cowantsiwi. Barapo bicheito be ciento veinte poyobe. Barapomonae Pedro barai, jeye:

¹⁶ “Tamonae pam, pomonae iru painya nejume cowantsiwixae Jesús. Bewa nayabara jume cui wetsina po coyene bayatha Nacom namchi xua pejume diwesitha yabara tsiwanaya paeba. Bayatha caena David cueicueijejei exanatsi Nacom pia Pejumope tuxaxu tatsi xua Judas cui coyene caunutatsi xua pinae Jesús waetabinchi pomonae Judas matabapona.

¹⁷ Bara Judas yatsicaya pata jiton petain pana naba ru nacuitan barapo penacuichiwa.

18 Poxonae Judas Jesús caenaetatsi, sacerdote-monae pia pentacaponae tatsi Judas catatsi paratixi. Pirapae sacerdotemonae pia pentacaponae tatsi bapo paratixitha Judas petapaein tsicomotatsi ira. Judas iratha jopeica poxonae tupa yawa coto tsitecatsi, unu pichatecatsino abe peexanaexae.

19 Nexata pomonae Jerusalén tomaratha pejinompaewi, barapomonae jume tane pocotsiwa Judas exana. Daxota barapomonae barapo ira wan duta po wan jei: ‘Acéldama ira’, jei. Barapo jume, barapomonae pijumetha xua jei: ‘Pejana ira’, jei”, jei Pedro.

20 Equeicha Pedro barai barapomonae pomonae pejume cowantsiwi, jeye: “Salmos penaxunae wei diwesitha Judas petupaexae yabara paeba, jeye:

‘Pia bo tatsi tausaya bo tauncuaeinchi.

Jopa ichun ecae tsane baxota’, jei.

Matautano namchino:

‘Equeicha pecoutha tanacuitinchi ichun’,

jei Salmos penaxunae wei diwesitha,

xua Judas yabara”, jei Pedro.

21 Nexata Pedro equeicha namchi, jeye: “Xote waxantha jinompa pebiwi pomonae matha cain pana nepuna jinomparu poxonae Jesús pon Wanacanamataxeinaein pana nebaru jinompa daxita pan.

22 Barapo pebiwi taneno xua Juan Jesús pebautisabiwatsi. Yawa barapo pebiwi taneno xua poxonae Jesús cataunxuae exana ducuanabiya pocotsiwa xua pewunaewan. Matautano barapo pebiwi taneno poxonae Jesús yantacabi jopa

po mataqueitha poxonae athabe juinya. Bewa wabichipatsi caein barapo pebiwi jiwana, pon pecui yaputaein po coyene Jesús equeicha asu popona. Bapon iru pana puna cueicueije tsane xua po coyene Jesús equeicha asu pepoponaewa”, jei Pedro barapo pejume cowantsi jiwitha.

²³ Barapomonaе pomonaе pejume cowantsi jiwi najiwana itapeta ayunbe. Ichun pewun José Barsabás, pon icha wun Justo. Iru ichun pewun Matías.

²⁴ Nexata barapomonaе Jesús athabeicha tsipaebatsi, jeye: “Nacom, pon jiwi Necanamataxeinaem. Daxita jiwi nejuntu coyene yaputaein. ¿Incane methara ponbe jiwana pon xua ichichipamera, pon xua cuita itapeta ichichipame?”

²⁵ Barapon iru penaexanaenexa jinya neitorobi jiton pon xuya Judas pecoutha petanacuichinexatsi. Judas tupa nacabeta abe peexanaexae. Judas pona ichaxota po nacuatha jopa nacoicha duntsiyo isoto”, jei barapomonaе.

²⁶ Nexata barapomonaе wun jiyatabaxuba ibotiyobe. Nexata saya Matías wun naitataraba. Daxota bapon Matías itapeta cuita wabatsi. Matías once pomonaeyobetha napona pomonaе Jesús pia peitorobi jiwi tatsi.

2

Meje yabara poxonaе Nacom pia Pejumope tuxaxu tatsi patopeica pomonaetha pomonaе Nacom pejume cowantsiwi

¹ Pentecostés matabi tsuxubi, po mataqueitha xua poxonaе jiwi tsinacaetuteiba penabanaenexa

pexaewa peyabara nanta xeinaexae xua pexaewa naweta. Barapo matabitha daxita pomonae Jesús pejume cowantsiwi bara cae botha nacaetuta.

² Barapo mataqueitha barapomonae busi tane, pebusi po busi xua be joibo busi po busi xua busi nainya naetaba itaboco wetsica. Barapo busi daxita bo tutu canaupa ichaxota barapomonae nacaetuta.

³ Barapoxonae barapomonae tsita naitapeinya xeinatsi xua be peebato jumope coichan. Barapo peebato jumope coichan daxita carepaya barompaya barapomonae jajayababa tsiniya taenatsi.

⁴ Barapoxonae daxita carepaya barapomonae juntu coyene yncatsi Nacom pia Pejumope tñaxñ tatsi pia peayapusñ itorobi coyenewa tatsi. Matautano daxita barapomonae barompaya tsanaya icha jumeintha cueicueijeji xua be po jumetha Nacom pia Pejumope tñaxñ tatsi cueicueijeji cana exana barapomonae po jumein xua jopa yaputaeyo.

⁵ Barapo matabintha, irññ pinmonae judiomonae pata Jerusalén tomaratha, po judiomonae i dapocotsi nacuan werena peponaewi xua penataenexa Pentecostés wññ matabi poxonae tsinacaetuta pexaewa penabanaenexa. Barapomonae bichocono pejume cowantsiwi Nacom.

⁶ Barapo ayei bicheitomonae pomonae judiomonae barapomonae busi tane xua po busi, busi duneica ichaxota nacaetuta pomonae barapon Jesús pia pejume cowantsiwichi

tatsi. Barapo judiomonae jume tane xua daxita barapomonae barompaya pia jumexitha cueicueijeji xua judiomonae pia pejume tatsi. Bapoxonae barapomonae nanacaetuta Jesús pejume cowantsiwitha. Barapomonae pomonae judiomonae najantũ coyene cabenaeca. Yawa jopa yaputaeyo xua peyabara nanta xeinaewa baraxua tsipei daxita barapomonae pomonae Jesús pejume cowantsiwichi barompaya judiomonae pijumexitha tatsi cueicueijeji.

⁷ Daxita barapomonae pomonae judiomonae najantũ coyene cabenaeca. Nantiya caemonae natsipaeba, jeye:

—jina, bara barapomonae Galilea nacuapiwiba, pomonae bequein barapomonae jopa icha jumeintha pecueicueijeji jiwi xua wajumeintha pecueicueijejiwa!

⁸ ¿Eta pocotsiwa barapomonae metha daxita barompaya tsanaya icha jumeintha cueicueijeji xua wajumeintha?

⁹ Xote jinompa Partia nacuapiwi irũ Media nacuapiwiba, irũ Elam nacuapiwiba. Barichi xote jinompe Mesopotamia nacuapiwi, irũ Judea nacuapiwiba, irũ Capadocia nacuapiwiba, irũ Ponto nacuapiwiba, irũ Asia nacuapiwiba.

¹⁰ Matautano barichi xote jinompa Frigia nacuapiwi, irũ Panfilia nacuapiwiba, irũ Egipto nacuapiwiba, irũ Libia nacuapiwiba pomonae jinompa imoxoyo Cirene nacua. Matautano ichamonae pata pomonae Roma tomarapiwi.

¹¹ Barapo Roma tomarapiwi icha judiomonae pepa judiomonae xua yacui naexana. Icha judiomonae jopa pepa judiomonaeyo. Saya

judiomonae penaexanaewi, tsipei barapomonae jume cowanta Nacom icha be judiomonae ichi pomonae pepa judiomonae. Irũ pata ichamonae Creta nacuapiwi, irũ Arabia nacuapiwiba. Ichitha daxita waxainchi jume tainchi xua Nacom pewnaewan exana peayapuswatha, poxoru barapo Jesús pijimonae tatsi wajumeintha paeba, jei barapo judiomonae.

¹² Daxita barapo judiomonae najanta coyene cabenaeca. Daxota barapomonae jopa xaniwaicha yabara nanta xeinaeyo baxua. Barapomonae caemonae nayainyabiya, jeye:

—¿Eta pocotsiwa metha baxua jane? jei.

¹³ Ichamonae saya jume cui capana. Barapomonae namchi, jeye:

—¡Apara barapomonae Jesús pijimonae tatsi cupatsi! jei.

Meje yabara poxonae xua Pedro tsipaeba barapomonae

¹⁴ Jesús pia peitorobiwi tatsi poyobe xua once poyobe, barapoyobe pia xantha tatsi Pedro nontapona. Matautano nontapona pepa bicheito itabaratha tatsi. Pedro jume daunweya barai barapo bicheitha, jeye: “Paxam, pomonae Judea nacuapiwi pamxaem irũ daxita pomonae Jerusalén tomarapiwi pamxaem, incane pana nejume taema, yabara paca tsipaebinchi xuaunxuae pajume taneme.

¹⁵ Barapo pebiwe xua Jesús pijimonae tatsi apara jopa cupaetsi xuaunxuae pacui yabara nanta xeiname. Apara awiya xometo caewa

ecareca. Cataunxuae apara baya daxota jopa cūpaetsi.

¹⁶ Baraxua xuaunxuae anoxuae pajume taneme, caena bayatha Nacom pia peitorobi jume pepaebin yabara tsiwūnae muxu duta pon pewūn Joel. Joel baraxua Nacom Pejume Diwesitha tina xua saya tatina, xua pinae Nacom paeba.

¹⁷ Jeyei Nacom:

‘Poxonae barapo cae pin nacuathe po matabi opi weraweracaena, bapoxonae barapo matabitha daxita carepaya jiwitha najumope tūnaxū cayataxubiya catsibin. Painya nexanto jiwi irū painya nexantixi neyabara cueicueije tsane pocotsiwa xua yaputane exanan.

Pewowi yatsicaya tsita naitūteibinchi be poxonae camaiteibina.

Pitiri jiwi camaiteibina poxonae amachinae tsane.

¹⁸ Pomonae xua amanaya neyabara diwesi canantsipaebina, barapomonaethano najumope catsibin barapo matabitha, yabūxithano, pebiwithano. Barapoxonae inta cueicueije tsane.

¹⁹ Peitabocotha paca tsita itūtsinchi po coyenein bichocono pewūnaewan xua jiwi bichocono najūntū coyene cabenaeca exanatsi.

Iratha tsicano paca tsita itūtsinchi po coyenein xua jopa juniya be pejana tsurucuae tsane, xuano xua jopa juniya be isoto tsurucuae tsane, xuano xua jopa juniya be nobo tsūxū tsurucuae tsane.

²⁰ Poxonae patopaetsica pon jiwi Pecanamataxeinaein

copiya baraxue panecotsiname xua xometo quiri
 jei tsane, jopa pentha tsurucuae tsane.

Yawa panecotsiname xua jomocoichato be
 janowa ducuaena.

Barapo matababi wuna tsane poxona pon jiji
 Pecanamataxeinaein patopaetsica.

Barapo matababi Nacom pepa peitupanae
 matababi exanaena.

²¹ Pomona picoya penata wucaewa Nacomtha
 xua

Nacom peyawenaenexa tsainchi, barapomona
 capanenebiya tsainchi Nacom', jei Joel
 xua saya Nacom tapaebatsi", jei Pedro.

²² Equeicha Pedro barai barapomona jeje:
 "Pomona Israel nacuapiwi pamxaem, incane
 pana nejume taema, xua paca tsipaebinchi. Jesús,
 pon Nazaret tomarapinxae bapon Nacom itoroba
 painya xantha. Bapon Jesús pewunaewan ex-
 ana pexeinya petsita itatsi coyenewanno Nacom
 pia peayapuswatha tatsi, painya neyaputaenexa
 tsane xua Nacom yawena xua Jesús peyawena-
 watsi. Paxam bayatha payaputaneme xua bapon
 tsita naitaba ducuaenaebiya.

²³ Bayatha Nacom paca cui wuna tsiwanaya
 tane xua po coyeneya pata exanaename pexan-
 totha tatsi. Nacom bara paca cui copata xua
 abe paexaname. Jesús pawaetabame painya cae-
 naetsinexa tsane bapon peacuipe jiwitha. Bara-
 pomona Jesús cobe matabobatsi naetha yawa
 bexotsi.

²⁴ Ichitha equeicha Nacom asu exana pexanto
 petupae cuiru nacua weya. Nacom Pexanto
 capanepa pia peantuyapuswatha barapo

petɔpae cuiru nacua weya, tsipei barapo petɔpae cuiru nacua jopa xeinaeyo peayapusuwa xua Jesús awiya pebotsiwatsi barapo petɔpae cuiru nacuatha.

²⁵ Irɔ David, Israel nacuapiwi itorobiya pia pepa peewatsinchi, caena bayatha tina Nacom Pejume Diwesitha. David tina Jesús jume yabara tatsi. David namchi, jeye:

‘Yaputan xua Tanecanamataxeinaein nebarɔ poponeiba daxita matacabi.

Bapon neyaweneiba.

Bapon nebarɔ poponeiba daxota

jopa junuwin tsane.

²⁶ Daxota bichocono jɔntɔ coyene weiweinan.

Mataɔtano daxota Nacom Pejume Diwesi

jɔntɔ coyene weiweinaya

cueicueijan ichamonaetha.

Bara bequein tɔpaein, mɔthɔtha bocuaeinno,

ichitha jume cowɔntan xua Nacom equeicha asɔ neexanaena pia peantɔyapusuwatha.

²⁷ Xam Nacom jopa punaxubim tsane tajumope

petɔpae cuiru cuariyatha.

Poxoru xan jinya nexanton tajɔntɔ cui

xanepanaein daxota jopa benecopatsim

xua tatɔpaein tuxamnuncuaein,

yawa xua tsabanuncuaein.

²⁸ Neita cui tsita itɔbame beta xaniwaicha

tapoponaenexa tsane poxona equeicha asɔ

neexanaename petɔpae cuiru nacua weya.

Nejɔntɔ coyene weiweina exaname tsipei

neyanta poponeibame’, jei David

xua saya Jesús tapaebatsi”, jei Pedro.

29 Equeicha Pedro barai barapomonaē, jeye: “Tamonaē, daxota beta paca tsipaebatsi xua pinaē David wamo susato nacuapin bayatha pinaē t̄pa. Piamonaē m̄th̄tha xotsi. Awiya waxantha boca barapo m̄th̄ ichaxota pet̄paein m̄th̄tha xotsi.

30 Apara, barapon David, pinaē Nacom peitorobi jume pepaēbin. Bayatha pinaē David nacana w̄naē tsiwanaya muxu tsidutatsi Nacom, xua pinaē David pijimonaē tatsi jiwana pon jiwi Pecanamataxeinaēin tatsi naexanaēna. Barapon pon Pecanamataxeinaēin jiwi Israel nacuapiwi canamataxeinaēinchi icha cain bayatha David ichi poxonaē canamataxeina barapo Israel nacuamonaē.

31 Bayatha pinaē David yabara tsiw̄naē muxu duta xua bexa tsane Nacom Mesías equeicha as̄ exanaēinchi. Nacom Pexanto tatsi pon David yabara jume jei, apara bapon Mesías. David namchi xua Mesías jeyei xua saya pinaē David tapaēba: ‘Xam Nacom jopa punaxubim tsane tajumope pet̄pae cuiru cuariyatha. Poxoru xan jinya nexanton taj̄nt̄ cui xanepanaēin, daxota jopa benecopatsim xua tat̄paein tuxamnuncuaēin yawa xua tsabanuncuaēin’, jei David xua Mesías jeyei.

32 Pon Mesías, pon xuaunxuae yabara paca tsi-paebatsi apara bapon Jesús pon Nacom equeicha as̄ exana. Baraxua paxan yatsicaewa pata cui taewi.

33 Jesús asiya icha peecaenexa Nacom pecoxatha tatsi. Jesús pon jiwi pepa Pecanamataxeinaēin exanatsi Nacom. Matātano Jesús nacana jumope catatsi, Nacom. Barichi

baxua xuaunxuae pataneme yawa pana nejume tanemeno xua daxita carepaya barompaya icha jumexitha pacueicueijan, baraxua Nacom pia Pejumope t̃nax̃u tatsi pana cata.

³⁴ Poxoru David saya t̃pa, jopa athabe ichiyo, icha be jopa Jesús ichiyo poxonae athabe icha Jesús. Ichitha saya baxua David tapaeba Nacom, xua Nacom Mesías tsipaebatsi, jeye:
‘Nacom, Tanecanamataxeinaein baraichi.
Tacoxatha weya ecare.

³⁵ Ab̃u beya poxonae matapainya necaaitafaetabi
jiwi

pia Pecanamataxeinaein tatsi caexanaeinchi.
Barapomonaе beexanaetsipa pocotsiwa xua xam nepaebiwam’, jeye pinae Nacom xua Mesías tsipaebatsi, jei David Nacom nexa”, jei Pedro.

³⁶ Equeicha Pedro namchi barapomonaetha: “Paxam, pomonaе Israel nacuapiwi pamxaem. Anoxuae payaputaneme pon xua naetotha t̃parucua paexaname, Nacom exana xua bapon jiwi pia Pecanamataxeinaein tatsi naexana. Yawano Nacom naca itata caewata xua pon Mesías jei, pon Nacom itorobica petsit̃paenexa jiwi, apara bapon Jesús”, jei Pedro.

³⁷ Poxonaе daxita carepaya barapomonaе baxua jume taer̃c̃pa bichocono j̃nt̃u coyene wecoyei tsur̃c̃paе. Barapomonaе Pedro baraichi ir̃u Jesús pia peitorobi jiwi tatsi baraichi, jeye:

—Patamonaе, ζeta bewa pabichin tsane metha?
jei.

³⁸ Nexata Pedro barapomonaе barai, jeye:

—Icha juntu coyene paxeinare Nacomtha painya neauraxae xua abe paexaname. Matautano daxita carepaya pam ichamonae paca bautisabina Jesucristo pewantha xua Nacom pia paca necayabara junte mainaenexa xua abe painya nexanae cuiru coyenein. Barapoxonae Nacom paca nacana jumope catsibina.

³⁹ Barapo peyabara tsiwinae muxu dutsiwa apara paxam nexa, iru muxuna daxita painya pexui nexano. Matautano pomonae tajua beya jinompa iru barapomonae nexa. Barichi Nacom pon Wanacanamateinaeinxae, pomonae waba peantobexae barapomonae iru nexa, jei Pedro.

⁴⁰ Barapo jumeintha yawa icha jumeintha Pedro tsipaeba barapomonae. Matautano Pedro bichocono muxuweta poxonae jeye:

—Po coyenein xua daxita abe peexanae cuiru coyenein paexaneibame, barapo coyenein pana nacui barapende, po coyenein xua daxita carepaya jiwi exaneiba, jei Pedro.

⁴¹ Po matabitha poxonae Pedro paeba baxua barapo matabitha pomonae jume cowanta xua Pedro paeba barapomonae bautisabatsi. Barapo matabitha tres mil po bicheito jiwimonaebe naexana xua pomonae copiya pomonae Nacom pejume cowantsiwixaetsi barapomonae mataropeicha pinmonae naexanatsi.

⁴² Barapomonae nacuiduba nawita, xua Jesucristo pia peitorobi jiwi tatsi paeba. Barapomonae nacana cui nanta juraya jinompa. Nacomtha nabaru tsipaebeibano. Nabaru nacaetuteibano xua penabaru epa janaqueibinexa pan xua penabarua xaibinexa. Barapomonae baxua exana

dubenanaebiya xua Jesucristo peyabara nanta xeina dubenanaebiyaenexatsi po coyene xua Jesucristo bayatha icha ichi xua poxonae pan epa janaca.

Meje yabara po coyeneya xua jinompa pomonae copiya Jesús pejume cowantsiwi

⁴³ Jesucristo pia peitorobiwi tatsi, barapomonae pexeinya petsita itatsi coyenewan exana nawita Nacom pia peayapuswatha tatsi. Daxota pomonae jopa Jesucristo pejume cowantsiwichi, daxita barapomonae junuwa, Nacom cunuwatsi poxonae cui tane baxuan.

⁴⁴ Daxita barapomonae, pomonae Jesús pejume cowantsixaetsi, barapomonae xaniwaicha caemonae peburaya nabaru jinompa. Matautano barapomonae caemonae nantiya nacatsiba dubenanaebiya pichiwixi pocotsiwan xua xeina.

⁴⁵ Matautano barapomonae daxitan pocotsiwan xua xeina caenaeta dubenanaebiya. Bapoxonae barapo paratixi nata tsaba dubenanaebiya xua jopa pexeinaexae ichamonae xua icha be pocotsi coyeneya pocotsiwan canantawenona ichamonae.

⁴⁶ Daxita carepaya barapomonae nabaru nacaetuta dubenanaebiya Nacom pin pia botha. Matautano pia boxitha nabaru nacaetuta dubenanaebiya pan nabaru epa nantaraba janaquiya exana dubenanaebiya. Juntea nabaru juntu coyene weiweinaeya xaerubenanaebiya.

⁴⁷ Daxita barapomonae carepaya Nacom wnae jainta dubenanaebiya. Matautano barapomonae

baru cui itura jinatsi ichamonae beta peexanaexae. Daxita matabi tsaibi pomonae Nacom pejume cowantsiwixaetsi barapomonae Nacom cana exana xua mataropeicha pinmonae tsoponae tsaibi.

3

Meje yabara poxonaе pon pejayujayujei jiton equeicha cui jume exanatsi

¹ Caentaqueitha quiripitha poxonaе tres po horabe tsuxubi po horatha poxonaе jiwi ba poneiba Nacom pin pia botha xua petsipaebeibinexa Nacomtha bapoxonaе Pedro iru Juan Nacom pin pia botha jonyabe.

² Barapo bo Nacom pin pia bo tatsi icha coiboto jiwi wun duta, jeye: “Pexeinya coiboto”, jei. Barapo coibototha daxita matabi tsaibi pebin cuareteibatsi pon pejayujayujei jiton xua yawa naexana poxonaе pexuyo. Daxota bapon baxota cuareteibatsi xua pewunquequeibinexa pomonaetha pomonaе joneibiya barapo coiboto iya.

³ Pon pejayujayujei jiton wuca paratixi poxonaе Pedro iru Juan tainchibe xua muxu pejoniyaebe barapo coiboto iya.

⁴ Nexata Pedro iru Juan tanebe bapon. Pedro barai bapontha, jeye:

—Incane pana taemabe, jei Pedro.

⁵ Nexata necota bapon. Nanta xeinataba xua catinchi paratixi.

⁶ Ichitha Pedro barai bapontha, jeye:

—Canta jopa xeinaeinyo paratixi. Matautano jopa xeinaeinyo pocotsiwa oro nain matawun.

Meisa po coyenewa xua taxeinaewa baxua cacatinchi. Jesucristo, Nazaret tomarapin wantha cabaraichi, asiya uncuatabare yawa pondeno, jei Pedro.

⁷ Nexata Pedro pocotsiwa pecoxa weya cobe pita. Yawa asiya cuaranotano. Bapoxonae nainya beta taxuyawere daunweya ducuanaya. Pesitano wanae tsanayano.

⁸ Nexata bapon pon pejayujayujei jiton jirawana. Asiya uncuatabano. Ponano. Bapoxonae Pedro iru Juan puna jonyatsibe bapon, Nacom pin pia botha. Jirajirawiya ponano. Yawano Nacom wanae jaintatsi.

⁹ Nexata daxita pomonae xua Nacom pin pia bo tututha peenaexae, tainchi pon pejayujayujei jitonxae xua pona, yawano xua Nacom wanae jaintatsino.

¹⁰ Barapomonae daxita carepaya najuntu coyene cabenaecaeya tane, tsipei barapomonae bayatha cui tane xua bapon amanaya jiwi wunquequeiba paratixi pecoibototha, po coiboto pewan “Pexeinya coiboto”, jei.

Meje yabara poxonae Pedro diwesi paeba Nacom pin pia botha po tututha pewan Salomón bo wun tututha

¹¹ Poxonae pejayujayujei jiton awiya maxu waetabatsibe Pedro Juanno bapoxonae iruru daxita jiwi najuntu coyene cabenaecaeya cuinaenouta Nacom pin pia botha xua tututha po tututha Salomón bo wun tututha ichaxota Pedro baru jinompa.

¹² Poxonae Pedro barapomonae caetaebiya, Pedro barai: “Ja, pomonae Israel nacuamonaepiwi

pamxaem, ¿eta xua metha daxita paxam pana najant_u coyene cabenaecaeya taneme baxua? ¿Pana neyabara nanta xeinamebe xua pata taayap_uwatha paaxaibi exananbe pejayujayujei jiton? ¿Matautano pana neyabara nanta xeinamebe poxoru Nacom pajume cow_untanbe daxota pon pejayujayujei jiton axaibi?

¹³ Ajibi, apara wamo susato jiwi pia Nacom tatsi axaibi exana bapon. Barapo Nacom Jacob pia Nacom tatsi, Abraham bapon pia Nacomno, Isaac bapon pia Nacomno. Apara bapon baxua taexana Nacom. Bapon Nacom Pexanto bichocono ainya cui cana exana poxona_e pexanto as_u exana pet_upae cuiru coyene weya. Bapon apara Jesús pon pacaenaetame pomonaetha pomona_e pentacaponae_{wi}, pon bepa bequein isanaxubei Pilato poxona_e paxam jopa pacopatsim xua bapon peisanaxubiwa.

¹⁴ Bapon pon bichocono pe_unt_u coyene xanepanaein xua jopa xeinaeyo penatsicuent_usiwa xua abe peexanaexae tsipei saya exaneiba pocotsiwa Nacom ichichipa. Ichitha jopa paichipaem xua Pilato peisanaxubiwa tsane bapon. Saya meisa paw_ucame xua Pilato peisanaxubiwa ich_un pon jiwi pejutebeibin pon Barrabás.

¹⁵ Poxona_e baxua paexaname barapara Jesús pabexubame. Bapon Jesús pon jiwi cana exanatsi xua jiwi aj_unt_uyapus_uya pejinompaewa. Bapon Jesús Nacom equeicha as_u exana pet_upae cuiru coyene weya. Bara baxua yatsicaya pacui tan daxita.

¹⁶ Po jume w_un peayapus_u w_un, bapo w_un Jesús

pia wun. Daxota pejayujayuwei jiton barapo jume wuntha axaibi exanatsi. Barapon pataneme xua axaibi, tsipei bapon jume nanta pitabiya jume cowanta barapo peayapusu jume wun. Daxota barapon painya itabaratha axaibi tsuxubi poxoru jume cowanta Jesús”, jei Pedro.

¹⁷ Equeicha Pedro jeye: “Tamonae yaputan xua jopa payabara yaputaem xua paexaname poxonae Jesús pabexubame. Barichi painya pentacoponaewino jopa yabara yaputaeyo xua baxua exana.

¹⁸ Nacom peitorobi jume pepaebiwi bayatha Mesías yabara tsiwana paebatsi. Barapomonae paeba, jeye: ‘Bexa tsane Mesías bexubinchi’, jei. Nacom bara nacui yabara jume weta baxua xua bayatha Nacom peitorobi jume pepaebiwi paeba.

¹⁹ Daxota icha juntu coyene paxeinare Nacomtha painya neauraxae xua abe paexaname. Yawa pajume cowunde painya nepaca cayabara jumentainaenexa abe painya neexanae cuiru coyenein. Yawa Nacom pawucare xua paca juntu coyene xanepana exanaena. Bapoxonae Nacom paca juntu coyene ayapusuya exanaena.

²⁰ Tsipei Nacom equeicha athawetsica Jesús itorobicaeinchi pon bayatha Nacom itapeta pon Mesías xua painya nepaca capanenebiyaenexa tsane abe painya neexanae cuiru coyenein weya.

²¹ Cataunxuae abu Jesucristo equiya Nacom pia nacuatheicha tatsi. Equeicha bapon patopaetsica poxonae Nacom wunae exanaena daxitan, be pocotsi coyeneya bayatha Nacom peitorobi jume pepaebiwi paeba.

²² Barichi Moisés pata amo susato jiton namchi:

‘Painyamonaē jiwana Nacom cana exanaena, pon Nacom pia peitorobi jume pepaebin tsecae tsane icha neichi. Pajume cowantsiya exande daxita pocotsiwa xua bapon paca tsipaebina.

²³ Daxita pomonaē jopa jume cowantsiyo pocotsiwa bapon paeba, barapomonaē Nacom weraweraca cana exanaena xua jopa penaexanaenexa Nacom pijimonaē tatsi’, jeyei Moisés”, jei Pedro.

²⁴ Equeicha Pedro jeye: “Daxita Nacom peitorobi jume pepaebiwi iru Samuel pon xua yatsicaya tabu ducua, baraxua carepaya bapo diwesin yabara paeba barapo matakabin.

²⁵ Barapo Nacom pia peyabara tsiwanae muxu dutsiwa po peyabara tsiwanae muxu dutsiwa Nacom tsiwanaeya muxu duta Nacom pia peitorobi jume pepaebi jiwitha, apara bara iru paxam nexa. Baxua Nacom pena peyabara tsiwanae muxu dutsiwa Abraham yabara tsiwanae muxu dutatsi pon wamo susatopin xua xanepanaya painya neji-nompaenexa. Nacom Abraham baraichi, jeye: ‘Caein jinya nemomoxi susato jiwi jiwana pin pepatopaexae tsane daxita i dapocotsi nacuanpiwi yawenaein’, jei Nacom Abrahamtha.

²⁶ Poxonaē Nacom Pexanto asu exana petupae cuiru coyene weya, bapoxonaē copiya pacata itoroba painya xantha pia painya nepaca cayawenaenexa xua daxita paxam painya nenacui barapentsinexa abe painya neexanae cuiru coyenein”, jei Pedro.

4

Meje yabara poxonaē Pedro iru Juan cueicueije

*tsuncuaebe pomonae tomarapiwi pia pentacaponae
aewi tatsi peitabaratha tatsi*

¹ Poxonae cataunxuae Pedro iru Juan cueicueijeibe barapomonaetha, bapoxonae sacerdotemonae pia pentacaponae aewi tatsi pata. Iru patopa pon soldadomonae pia pentacaponae in tatsi pon Nacom pin pia botha tatsi pe-eenae in. Yawa saduceomonae no iru pata baxota.

² Barapomonae bichocono anaepana, yaitama Pedro Juanno paebabe xua po coyene Jesús petupaen equeicha asu, xua pinae barichi jiwino poxonae tupa equeicha asu.

³ Bara nexata Pedro Juanno waetabatsibe barapomonae. Jiwi pecubi botha capoinchibe. Barapo botha etatsibe tsipei quirei tsanaya xua beya poxonae yaitapenacaena.

⁴ Pinmonae jume tane po diwesi Juan iru Pedro paebabe, yawa jume cowantano barapo diwesi. Barapomonae iruru pomonae copiya jume cowanta caena bayatha, daxita barapomonae nexata daxita cinco mil bicheito tsuxubi xua saya pebiwi ununatsi.

⁵ Icha mataqueitha judiomonae pia pentacaponae aewi tatsi, iruru pitiri jiwi, iruno pomonae jiwi pecuidubiwi Moisés pia peitorobi coyenewa tatsi, daxita barapomonae nacaetuta Jerusalén tomaratha.

⁶ Baxota iru nanacaetuta Anás pon sacerdotemonae pia pepa pentacaponae in tatsi. Iru nanacaetuta Caifás, Anás perobi. Iru nanacaetuta Juan iru Alejandro, ponbe Anás piamonae tatsi. Barichiru nanacaetuta ichamonae pomonae sacerdotemonae pia

pentacoponaewi tatsi barapomonaē piamonaē tatsi.

⁷ Bapoxonaē ichamonaē itoroba xua Pedro iru Juan pecuaranotatsinexatsibe barapo penacae-tutsiwi itabaratha. Yainyabatsibe, jeichibe:

—¿Jintam pia peayapusu itorobi coyenewatha tatsi matautano jintam pewantha tatsi axaibi paexanamebe? jeichichibe.

⁸ Pedro bichocono juntu coyene yucatsi Nacom pia Pejumope tñaxu tatsi pia peayapusu itorobi coyenewa tatsi. Pedro barapomonaē jume nota, jeye:

—Pomonaē tomarapiwi pia pentacoponaē jiwi pamxaem, iruru pomonaē pitiri jiwi pamxaem, pomonaē Israel pijimonaē tatsi pamxaem, daxita barapomonaē pam paca tsipaebatsi.

⁹ Maisa yabara pana yainyabamebe xua po coyene pejayujayujei jiton axaibi xua painya neyaputaenexa xua eta po coyeneya xua paexananbe poxonaē bapon axaibi exanatsi po coyene xua bichocono wanae.

¹⁰ Daxota paxanbe paca jume notatsi xua iru israelmonaepiwi peyaputaenexa po coyene xua pon pejayujayujei jiton axaibi exanatsi poxonaē pawun paeban Jesús pewun pon Nazaret tomarapin. Bapon Jesús, pon apara naetha teparucua paexaname matautano pon equeicha Nacom petupaein asu exana petupae cuiru coyene weya.

¹¹ Bayatha Nacom Pejume Diwesitha tsiwanaya yabara paeba xua po coyeneya pacana exaname Jesustha. Paxam be barapocotsimonaē pam, be pocotsimonaē xua ibo bo peacabiwi.

Barapomonae xuba iboto po iboto bequein ainya cui naexana beyacaincha icha iboto. Paxam bara paichim Jesucristo paxubame pon peainya cuin xua Nacom ainya cui cana exana beyacaincha ichamonae.

¹² Barapo cae pin nacuathe dapocotsin aibi pon capanepeiba jiwi. Saya meisa bapon Jesús capanepeiba jiwi. Ichun Nacom jopa nacata itorobiyo.

¹³ Daxita tomarapiwi pia pentacaponaeawi tatsi yabara najuntá coyene cabenaeca xua Pedro Juanno jopa auriyobe xua atsaquiya paebabe. Tsipei barapomonae pomonae pentacaitorobi bicheito yaputane xua Pedro Juanno jopa nacuidubiyobe petinae botha matautano xua baponbe saya pecui pawí jitonbe. Barichi barapo pentacaitorobi bicheito yaputaneno xua xaniwaicha apara baponbe ponbe napuna poponeibabe Jesustha.

¹⁴ Barapomonae moya ena tsipei pon pejayujayujei jiton Pedro Juanno axaibiya caquita uncuatsibe. Daxota barapomonae Pedro Juanno jopa abe yabara paebichibe.

¹⁵ Pedro Juanno matha pesato beitorobiyatsibe. Barapomonae natsipaeba.

¹⁶ Nabarai, jeye:

—¿Eta bichainchi metha baraponbetha Pedro Juanno? Bayatha daxita carepaya Jerusalén tomarapiwi yaputane xua Juan Pedrono exanabe pexeinya petsita itútsi coyenewa Nacom pia peayapusawatha tatsi. Daxota jopa naca itac̣paeyo xua wapaebiwa po coyene xua

baponbe jopa apara exanaeyobe pexeinya petsita itutsi coyenewa Nacom pia peayapuswatha tatsi.

17 Maisa aichaxaibichi xua daxita carepaya jiwi jume taetaepona baxua. Metha daxota baponbe jume daunweya itorobinchi xua equeicha jopa paebi tsanebe xua Jesús peyabara paebiwatsi, jei barapomona.

18 Barapo pentacaitorobi bicheito equeicha Pedro iru Juan wabatsibe. Jume daunweya tsipae-batsibe:

—Equeicha jopa Jesús payabara paebindebe. Equeicha jopa yabara pacuidubindebe barapo cui, jei barapomona.

19 Bara nexata Pedro Juanno jume notabe barapomona, jeibe:

—Incane payabara nanta xeinare icha metha bara Nacom tsita xanepanatsi xua paxanbe pata paca cajume cowantsiwatsi xua pata exanaewabe pocotsiwa pana itorobame xua daxota jopa pata exanaewa pocotsiwa Nacom pana itoroba.

20 Bewa paexanaeinbe daxita pocotsiwa Nacom pana neitorobabe. Bewa papaebinde daxita pocotsiwa patanbe xua Jesús exana yawa xua pajume tanbeno xua Jesús paeba, jeibe Pedro Juanno.

21 Barapomona pomona tomarapiwi pia pentacaponae wi tatsi, Pedro iru Juan jume itawe-tatsibe. Daichitha saya pu copatatsibe. Barapomona jopa itacupaetsi xua pecuainchiwatsibe Pedro iru Juan jiwi pecunuwixaetsi, tsipei pinmonae jiwi Nacom wuna jaintatsi, petaexae pocotsiwa Pedro iru Juan exanabe.

22 Pon pejayujayujei jiton pontha pon Nacom pexeinya petsita itutsi coyenewa taexana, bapon axaibi exanatsi poxonae cuarenta po weiyobe xeina.

Meje poxonae pomonae Jesús pejume cowantsiwichi tatsi wuca Nacom xua jopa pejunuwina tsane poxonae Nacom Pejume Diwesi cueicueije tsane jiwitha

23 Pedro Juanno nainya pontababe ichaxota Jesús pejume cowantsiwichi tatsi jinompa. Baxota nanabarū nacaetutatsibe. Barapomonaetha pae-babe, xua baraunchichibe sacerdotemonae pia pentacaponae, pitiri jiwino.

24 Poxonae Pedro irū Juan baxua jume taerucupatsibe, barapomonaetha Nacomtha tsipaeba, jeye: “Nacom, pon pata Necanamataxeinaem, xam daxita peitabocotha exaname, irathano, menthano, daxita icha coyeneinno.

25 David pon neitorobi jume pepaebin, neju-mope tūnaxū cueicueije cana exanatsi xua cata paeba, poxonae jeye:

‘¿Eta xua metha, pomonae jopa judiomonae naexanaeyo cayabara anaepana? Bara bequein ichipa abe cata exana ichitha jopa itacupaetsi.

26 Daxita carepaya nacuanpiwi pomonae jiwi itorobiya pia pepa peewatsiwichi irū ichamonae pomonae jiwi peyanacua ewatsiwichi barapomonaetha nacaetuta xua abe necayabara paebinexa yawa xua Nexanto pia abe yabara paebichi pon Mesías, pon jinya Neitapetsin’, jeyei David,

xua pinae Nacom tapaebatsi”, jei
barapomonaе xua wꝥca Nacomtha.

²⁷ Equeicha bapomonaе jeye: “Bara yatsicaya baxua exana poxonaе Herodes irꝥ Poncio Pilato, irꝥ icha nacuamonaepiwino, irꝥ Israel nacuamonaepiwino xote nacaetuta Jerusalén tomaratha. Barapomonaе nacaetuta xua Jesús abe peyabara paebinxatsi nexanto pon peꝥntꝥ coyene xanepanaein pon Mesías pon itapetame.

²⁸ Barapomonaе, pomonaе xote nacaetuta, exana daxita xua caena bayatha cui wꝥnae tsiwanaya yabara paebame po coyene xua barapomonaе exanaena.

²⁹ Pata Necanamataxeinaem, matha jume taema xua pana yabara abe jume baraunchi xua abe pana exanapaeba. Pana care xua neajꝥntꝥyapusꝥwa xua jopa junuwiya pata paebinxata tsane jinya jume diwesi, tsipei paxan jinya neitorobi jiwi pan.

³⁰ Peatenewi axaibi exande neayapusꝥwatha. Mataꝥtano barabꝥ copatame xua pexeinya petsita itꝥtsi coyenewan paexanaein poxonaе pacueicueijan tsane jinya jume diwesi, Jesús nexanto pia peayapusꝥwatha tatsi pon peꝥntꝥ coyene xanepanaein”, jei barapomonaе poxonaе wꝥca Nacomtha.

³¹ Barapomonaе najume wetarꝥꝥra xua Nacomtha petsipaebiwa. Bapoxonaе ichaxota nacaetuta barapomonaе ira jijiyataxuba. Daxita barapomonaе ꝥntꝥ coyene yꝥca cana exanatsi Nacom pia Pejumoꝥe tꝥnaxꝥ tatsi pia peayapusꝥ itorobi coyenewa tatsitha. Mataꝥtano

barapomonaē Nacom Pejume Diwesi jopa junuwiya paebinoutsiyo.

Meje yabara poxonaē pomonaē Jesús pejume cowantsiwi pocotsiwan xua xeina daxita baxuan bara barapomonaē nexa

³² Pomonaē pejume cowantsiwi Jesucristo pinmonaē tsoponaē. Barapomonaē peburaya nanta xeina be caenthato coyeneya. Ichun jopa jeiyo: “Apara pocotsiwa xeinan meisa tawa”, jopa jeiyo. Ichitha daxita xua barapomonaē xeina baxua saya daxita bara barapomonaē nexa.

³³ Jesús pia peitorobi jiwī tatsi ajumeyapusaya yabara paeba pocotsiwa bayatha tane poxonaē Jesucristo pon jiwī Pecanamataxeinaeinchi xua equeicha petupaein asu popona exanatsi. Matautano yabara cueicueijeī po coyene Nacom bichocono wunaē exana daxita barapomonaētha peantobexaetsi.

³⁴⁻³⁵ Jopa ichun acopeibiyo pomonaē Jesús pejume cowantsiwi. Daxita barapomonaē xeina xua pocotsiwa penantawenonaewa poxoru ichamonaē pomonaē nawita pexeinaewi caenaeta dubenanaebiya pabin, bomaxunno. Barapo paratixi poxonaē xeineiba, catsibeibatsi Jesucristo pia peitorobi jiwī tatsitha. Nexata xuya barapo paratixi Jesucristo pia peitorobi jiwī tatsi catsibeiba pomonaētha pomonaē peacopeibi jiwī xua daxota jopa petaseicaenexatsi pocotsiwa nantawenona.

³⁶ Barichi exana bapon José pon Levī pia pemomo susato jiwānapin. Jesucristo pia peitorobi jiwī tatsi icha wun duta bapontha, po wun Bernabé. (Barapo wun, xua hebreo jume jei: “Pon

jiwi pentateiqueibin”, jei.) Barapon José, Chipre tunaetotha naexana.

³⁷ Bapon pia pabi caenaeta. Bapoxonae barapo paratixi Jesucristo pia peitorobi jiwi tatsi catatsi peacopeibiwi nexa.

5

Meje yabara poxonae Ananías iru piowa Safira abe exanabe

¹ Bapoxonae iru ichun pon pewun Ananías iru piowa pewun Safira, pabi xeinabe. Bapon piowabe pia ira caenaetabe.

² Bapon piowabe najupa nanta xeinabe. Baponbe icha paratixi nata botabe. Icha paratixi Jesucristo pia peitorobi jiwi tatsi catabe bequein Ananías paeba xua daxita catabe Jesús pia peitorobi jiwitha tatsi.

³ Bara nexata Pedro Ananías baraichi, jeye:

—Ananías, ¿eta xua metha Satanás jume jejam xua cajume tsiduta xua Nacom pia Pejumope tñaxu tatsi muxuitorobame? ¿Eta xua metha paratixi nata botame xua ira matoma cacata?

⁴ Po ira caenaetame apara bara jinya ira. Yawa barapo matomano apara bara jinyawa. Barapo paratixi icha canantawenoname bara ba moya tainchi. ¿Eta xua metha baxua najuntu coyene xeiname? Jopa apara muxuitorobim pebiwi. Jame yatsicaya apara Nacom pia Pejumope tñaxu tatsi muxuitorobame, jei Pedro.

⁵ Poxonae baraxua Ananías jume taeba, petupaein Ananías iratha jopa. Daxita pomonae xua jume tane xua bapon tupa, bichocono junuwa.

⁶ Pewowi pata. Ananías petɥpaein mata yara-batsi pesato becayatsi, xua pemɥthɥtha xubinex-atsi.

⁷ Pirapaeyo poxonae tres po horabe weta, Ananías piowa tatsi patopa ichaxota Pedrobarɥ ena. Barapowa jopa yaputaeyo xua pia pebin tatsi tatɥpatsi.

⁸ Nexata Pedro barai barapowa, jeye:

—¿Bara daxita pana catame xoxi pacaenaetame pentoma pabi? jei Pedro.

Barapowa jume nota, jeye:

—Aja, bara daxita, jei barapowa.

⁹ Nexata Pedro barai barapowa, jeye:

—¿Eta xua metha pana muxu wetamebe xua Nacom pia Pejumope tɥnaxɥ tatsi pamuxuitorobi-namebe? Taema, pewowi pomonae aunxuae jinya pebin mɥthɥtha xotsi, pecoibototha pata, necamɥthɥtha xubinexa tsanerɥ.

¹⁰ Barapoxonae caena nainya Safira Pedro petaxutha petɥpaein tanabotabatsi. Poxonae pewowi taeba xua barapowa bayatha tɥpa, barapoxonae barapowa jontaxorenatsi. Pia pebin cacuita mɥthɥtha xorecatsi.

¹¹ Daxita Jesús pejume cowɥntsi jiwi, ichamon-aeno ɥnthɥthɥ nayotarɥcɥpa pejunuwixae poxonae baraxua jume tane.

Meje yabara poxonae Jesús pia peitorobi jiwi tatsi ainya pexeinya petsita itɥtsi coyenewan exana, Nacom pia peayapɥwatha tatsi

¹² Jesús pia peitorobi jiwi tatsi pexeinya petsita itɥtsi coyenein exana jiwitha Nacom pia peayapɥwatha tatsi. Pinmonae Jerusalén tomara-piwi pomonae jume cowɥnta Jesús, Nacom pin

pia botha nacaetuta. Po tutu pewan Pórtico de Salomón tutu, bapo tututha nacaetuta.

¹³ Ichamonae, pomonae xua jopa jume cowantsiyo Jesús, junuwa xua penanacaetutsiwa Jesús pejume cowantsi jiwitha tatsi. Ichitha barapo Jerusalén tomarapiwi tsita cui wanaetsi Jesús pejume cowantsi jiwi tatsi.

¹⁴ Pin bicheito nayoyotapona, pebiwino, yabaxino pomonae xua jume cowantapona Jesús ponxae jiwi Pecanamataxeinaeinchi.

¹⁵ Jesús pia peitorobi jiwi tatsi wanae peexanaexae, Nacom pia peayapusawatha tatsi, daxota pomonae atene namtotha capoinchi. Ichamonae camatha bobena namtotha. Ichamonae weintha bobena. Barapomonae ichipa jayababatsi xua Pedro pejumope tatsi, xua barapomonae peaxaibi exanaenexa tsainchi.

¹⁶ Jiwi nacaetuta Jerusalén tomaratha pomonae xua pia tomaran jeba Jerusalén tomara pepuya weya. Barapomonae capata peatenewi iru pomonae xua matajemabatsi exanatsi cauri. Daxita barapomonae peburaya axaibi exanatsi. Daxita barapomonae carepaya equeicha axaibi.

Meje yabara poxonae Jesús pia peitorobi jiwi tatsi peraxa exanatsi

¹⁷ Nexata sacerdotemonae pia pepa pentacaponaein tatsi, iru pomonae xua napuna pona, pomonae saduceomonae, daxita barapomonae Jesús pia peitorobi jiwi tatsi anaepanaya jume uwatsi.

18 Daxota pomonae xua anaepana Jesús pia peitorobi jiwi tatsi teicatsi. Jiwi pecubi bothano capoinchi.

19 Ichitha Jesús itoroba matatsunpin. Bapon merawi patopa. Jiwi pecubi coiboto yausaranaxuba. Matatsunpin aisowa bemaxu cayiya Jesús pia peitorobi jiwi tatsi.

20 Matatsunpin Jesús pia peitorobi jiwi tatsi tsi-paebatsi, jeye: “Paponde Nacom pin pia botha. Baxota paumende. Payabara paebare daxita jiwitha barapo pena juntu coyene po coyene xua Nacom cata jiwitha xua beta pejinompaenexa”, jei matatsunpin.

21 Poxonae baya caemumbotha Jesús pia peitorobi jiwi tatsi bara exana xua matatsunpin paeba. Bara Nacom pin pia botha yacuinaya jojoniya pecuidubinexa jiwi.

Barapoxonae sacerdotemonae pia pepa pentacaponaein tatsi, iru saduceomonaeno waba daxita carepaya Israel nacua pia penapatae jiwi xua penacaetutsinexa pentacaitorobi bicheitha. Barapoxonae barapomonae itoroba ichamonae xua Jesús pia peitorobi jiwi tatsi pecuaranobinexatsi pin bicheitha peitabaratha tatsi.

22 Ichitha poxonae policiamonae jiwi pecubi botha pata, Jesús pia peitorobi jiwi tatsi jopa taetsi. Daxota policiamonae diwesiyo caibeya capona pin bicheito peitabaratha.

23 Policiamonae namchi, jeye:

—Poxonae papatan jiwi pecubi botha, soldadomonae pomonae peewatsiwi barapo pecubi botha barapo soldadomonae pecoiboto yabara umena, daunwei tsuncuae. Poxonae

pasaranaxoyan jopa paitaraerowinyo Jesús pia peitorobi jiwi tatsi. Jiwaibi. Aichurubena, jei.

24 Poxonae sacerdotemonae pia pepa pentacaponaein tatsi, iru Nacom pin pia bo peyabara umenaewi pia pentacaponaein tatsi, iru sacerdotemonae pia pentacaponaei tatsi jume tane baxua, bapoxonae najuntu coyene benaecaeya nayainyaba, jeye: “¿Exota metha jane Jesús pia peitorobi jiwi tatsi? ¿Exua jane?” jei.

25 Iruu barapoxonae pebin patopa. Barapomonae baraichi, jeye:

—Ja, pomonae jiwi pecubi botha pacaponame, barapomonae Nacom pin pia botha umena. Matautano cuiduba jiwi, jei bapon.

26 Nacom pin pia bo peyabara umenaewi barapomonae pia pentacaponaein tatsi bapon baru pona policiamonaeno Nacom pin pia botha. Equeicha caewa baru dendenatsi Jesús pia peitorobi jiwi tatsi ichaxota nacaetuta pentacaitorobi bicheito. Saya jopa abe exanaetsi poxonae teicatsi. Saya baru cui wunaeya carendenatsi poxoru barapo policiamonae jiwi cui cunuwatsi. Daxota policiamonae saya be xainyatha teica barapomonae xua jiwi pecuiyainwaxae tatsi xua policiamonae pecuinbabiwa tsipaetsi ibotixitha.

27 Nacom pin pia bo peyabara umenaewi pia pentacaponaein tatsino, barapomonae Jesús pia peitorobi jiwi tatsi capoinchi pentacaitorobi bicheito peitabaratha. Sacerdotemonae pia pepa pentacaponaein tatsi bapon, Jesús pia peitorobi jiwi tatsi baraichi, jeye:

28 –Bayatha jume daunweya paca tsipaebatsiba: ‘Equeicha jopa Jesús payabara paebinde’, pajan. ¿Ichitha eta xua paexaname? Daxita carepaya Jerusalén tomarapiwi yaputane pocotsiwa paxam pacuidubame Jesús yabara. Yawa painya metha paebichi xua paxan panatsiaena cuentan Nacomtha tupa pata exanaexae Jesús, jei barapo pentacaitorobi bicheito.

29 Nexata Pedro iru ichamonaе pomonaе Jesús pia peitorobi jiwi tatsi daxita barapo matabaxuyobe jume nota barapomonaetha, jeye:

–Apara jame bewa paexanaein pocotsiwa Nacom pana itoroba. Nacom pia peitorobi coyenewa ainya cui beyacaincha jiwi pia peitorobi coyene tatsi.

30 Pata amo susato jiwi pia Nacom tatsi, barapo Nacom Jesús equeicha petupaein asu exanatsi pon xua pabexubame, poxonaе naetotha tupa ruca paexanadutame.

31 Nacom Pexanto pia peayapusuwatha exana yatsicaya jiwi pia pepa Pecanamataxeinaein tatsi. Yawa exana pexanto pon jiwi Pecapanenebiyaein. Baxua exana poxonaе pecoxatha taecatsi pexanto. Nacom baxua exana tsipei ichichipa xua Israel nacuapiwi icha juntu cui coyene xeinaena bapontha, xua bapoxonaе barapomonaе Nacom pecui yabara junte mainaenexa po coyene xua barapomonaе Nacom tsita natsicuentatsi xua abe pe-eexanaexae.

32 Bara yatsicaya pata cui taewi daxita baxuan, Nacom pia Pejumope tunaxu tatsi iru taneru. Daxota paca tsipaebatsi baxua, pocotsiwa xua Jesús exana. Nacom najumope cata pomonaetha

pomonaē xua peichichipaewa xua peexanaewa pocotsiwa Nacom itoroba, jei Jesús pia peitorobi jiwi tatsi.

³³ Pentacaitorobi bicheito jume taer_ucupa xua pocotsiwa paeba barapomonaē pomonaē Jesús pia peitorobiwi tatsi. Bapoxonaē barapomonaē bichocono casebar_ucupatsi. Barapo pentacaitorobi bicheito ichichipa xua barapo Jesús pia peitorobiwi tatsi pejutebiwatsi.

³⁴ Barapo pentacaitorobi bicheitha eca fariseomonaepin pew_n Gamaliel, pon jiwi pecuidubin Moisés pia peitorobi coyene tatsi. Jiwi bapon bar_u cui itura jineibatsi. Bapon asiya uncua yawa itoroba xua bara caeto pesato becayiya tsainchi barapomonaē pomonaē Jesús pia peitorobi jiwi tatsi.

³⁵ Bapoxonaē bapon Gamaliel barai barapomonaē pomonaē pentacaitorobi bicheitha, jeye:

—Paxam pomonaē Israel nacuamonaepiwi pamxaem, dota pam xua pocotsi coyeneya pacana exanaename barapomonaē.

³⁶ Metha bara paj_untemainame poxonaē matha bapon Teudas poxonaē pia coya pentacaponaein naexana, nayabara paeba xua pinae bichocono peainya cui jiton. Cuatrocientos pebiwimonaē matab_ux_ube puna jinompatsi bapon. Ichitha poxonaē Teudas bexotsi ichamonaē, bapoxonaē pi-jimonaē tatsi d_ucupa, poxonaē daxita yotabatsi. Saya xua Teudas exana baxua pecui pawī.

³⁷ Barichi Teudas pepuya weya ich_n patopa pon pew_n Judas. Bapon pentacaponaein najainta poxonaē jiwi pew_n tinae matabi tsux-

ubi. Bapon Galilea nacuapin. Piamonae pin bicheito puna jinompatsir_u, ichitha barichi bapon Judas bexotsi ichamonae. Barichir_u pijimonae tatsi tar_uc_upatsi poxonae yotabatsi.

³⁸ Daxota paca jeichi: ‘Jesús pia peitorobi jiwi tatsi bara pacui copabare’, jan. Icha barapomonae saya exanaetsipa xua jiwi itoroba, nexata barapomonae jopa amanayabichipae pocotsiwa xua ichichipa peexanaewa.

³⁹ Ichitha icha barapomonae exanaetsipa pocotsiwa Nacom itoroba, nexata paxam jopa pacui amanayabichipaem barapomonae. Dota pam. Daxota jopa paexanaponaeinde po coyene xua Nacom pia peaitafaetabi jiwichi pana naexanaponame, jei Gamaliel.

Barapomonae pomonae pentacaitorobi bicheito bara jopa pecuiyo Gamaliel pepaebixae.

⁴⁰ Barapoxonae barapomonae pomonae pentacaitorobi bicheito equeicha wabatsi Jesús pia peitorobi jiwi tatsi. Bapoxonae matha copiya ichamonae itorobatsi xua Jesús pia peitorobi jiwi tatsi pecuainchinexatsi. Equeicha jume daunweya tsipaebatsi: “Equeicha jopa Jesús payabara papaebim tsane”, jei. Bapoxonae pu copababatsi nama Jesús pia peitorobi jiwi tatsi.

⁴¹ Jesús pia peitorobi jiwi tatsi pentacaitorobi bicheito weya pona. Barapomonae j_unt_u coyene weiweina tsipei peraxa exanatsi ichamonae, Jesús pijimonaexae xua baxua saya Nacom pecopat-sixae.

⁴² Awiya barapomonae amsiya yabara cuiduba, Nacom pin pia botha Jesús pia pexeinya jume diwesi yawa xua boxithano. Mata_utano cuidubano

xua Jesús apara Mesías pon Nacom itorobica.

6

Meje yabara poxonae Jesús pia peitorobi jiwi tatsi itapeta siete poyobe peyawenaenexa tsane ichamonaetha

¹ Barapoxonae barapo mataqueitha pinmonae jume cowunta Jesús. Pomonae xua griego jume pecueicueijeijiwi anaya tsipaeba, pomonae xua hebreo jume pecueicueijeijiwi baraichi, jeye: “Patamonae, powaxi pecuenta werapaewaxichi piseurixi powaxi griego jume pecueicueijeijiwaxi poxonae judiomonae apata pexaewa, barapowaxi saya peyaxi apatatsi pexaewa. Ichitha meisa judiomonaewaxi powaxi pecuenta werapaewaxichi barapowaxi jopa juniya nabaneibiyo”, jei.

² Jesús pia peitorobi jiwi tatsi, pomonae doce poyobe, barapomonae baru nacaetuta ichamonae pomonae iru Nacom pejume cowuntsiwi. Barapomonae pomonae Jesús pia peitorobi jiwi tatsi jeye barapomonaetha:

—Painta jopa yapu xanepanaeyo xua pata nacui barapentsiwa xua pata cueicueijeijiwa Nacom Pejume Diwesi xua saya pexaewa pata apatsinexa jiwi.

³ Daxota wajiwimonae paitapere siete poyobe pebinbe paxam jiwana. Paitapere pomonae xua daxita jiwi ita cui juntu coyene xanepaneibatsi, pomonae xua juntu coyene yucatsi Nacom pia Pejumope tunaxu tatsi pia peayapusuwatha tatsi, pomonae xua peyaputaewi. Barapo siete poyobe pacui itorobin xua pexaewa apateibina.

⁴ Bapoxonae paxan Jesús pia peitorobiwi tatsi pan, jopa paapatsin tsane pexaewa. Saya meisa Nacom pata tsipaebibichi nawita yawa pata cueicueijeji tsaibichi Jesús pejume diwesi, jei barapomona.

⁵ Jesús pejume cowantsi jiwi tatsi nanta jupaya nanta xeinarucupa. Bapoxonae Esteban itapetatsi. Bapon Esteban pon bichocono jume cowanta Jesús yawa bichocono juntu yucatsi Nacom pia Pejumope tñaxu tatsi pia peayapuswa tatsi. Itapetatsi Felipeno, iru Prócoro, iru Nicanor, iru Timón, iru Parmenas, iru Nicolás. Bapon Nicolás Antioquía tomarapin. Bapon copiya jopa naexanaeyo judiomonaepin. Poxonae jume cowanta Nacom, bapoxonae judiomonaepin naexana.

⁶ Barapoxonae barapo siete poyobe Jesús pejume cowantsi jiwi tatsi capona Jesús pia peitorobi jiwi tatsitha. Jesús pia peitorobi jiwi tatsi mata jayabiya tawuca Nacomtha xua Nacom yawenaena barapomona.

⁷ Pinmonae jume tane Nacom Pejume Diwesi. Pinmonaeno iru jume cowanta Cristo Jesús, pomona Jerusalén tomaratha jinompa. Iru judiomona pia sacerdotemona tatsi, barapocotsimona pin bicheito jume cowanta.

Meje yabara poxonae Esteban waetabatsi

⁸ Esteban pexeinya petsita itatsi coyenewan exaneiba jiwitha Nacom pia peayapusu itorobi coyenewatha tatsi. Tsipei Nacom yanta popona bapon daxota Esteban Nacom yaweneibatsi pecatsixaetsi peayapuswa.

⁹ Nexata nacaetuta pinmonae judiomonae pia penacaetutsi botha tatsi. Ichamonae w_un dutatsi xua jeichichi: “Pomonae pepu sorobabebiwichi poxonae busi cui tatayebebatsi”, yabara w_un jeichichi. Ir_u nanacaetutapona Cirene tomarapiwi, ir_u Alejandría tomarapiwi, ir_u Cilicia nacuapiwi ir_u Asia nacuapiwi. Daxita barapomonae Esteban jume matsontsonobatsi.

¹⁰ Ichitha Esteban xaniwaicha cueicueijeie exanatsi Nacom pia Pejumope t_unax_u tatsi. Daxota poxonae Esteban paeba barapomonae jopa itac_upaetsi xua beta pejume notsiwa.

¹¹ Nexata barapomonae po pin bicheito penacaetutsimonae ichamonae nantsiyatsiya catatsi paratixi petacamuxuitorobinexa tsainchi xua Esteban paeba. Barapomonae pomonae pemuxuitorobi jiwi namchi xua Esteban Moisés baraunchichi abe jei, yawa xua Nacom baraunchichi abe jei.

¹² Barapo jumetha pemuxuitorobi jiwi daxita jiwi anaepana exanatsi xua Esteban jume canaerabatsi. Pitiri jiwino anaepana. Ir_u pomonae jiwi pecuidubiwi Moisés pia peitorobi coyene tatsi barapomonaeno ir_u anaepana. Daxota barapo penapatae jiwi ir_u pomonae jiwi pecuidubiwi Moisés pia peitorobi coyene tatsi barapomonae Esteban yorobateicatsi. Pentacaitorobi bicheito peitabaratha capoinchi.

¹³ Barapo pentacaitorobi bicheito equeicha waba pomonae Esteban jume cui canaerabatsi wabatsi. Barapomonae pomonae penaerabiwi Esteban yabara jeichichi:

—Bapon Esteban Nacom pin pia bo tatsi ba-

raunchichi abe jei. Barichi bapon Esteban Moisés pia peitorobi coyenewa tatsi baraunchichi abe jei.

¹⁴ Pajume tan, xua Esteban paeba xua pinae Jesús Nazaret tomarapin paeba. Jesús pinae namchi, pinae jeye: ‘Barapo bo Nacom pin pia bo tantanaca exanaein’, pinae jei Jesús. Equeicha Esteban namchi xua pinae Jesús paeba pinae jeye: ‘Tamropata pitaban po peitorobi coyenewa xua bayatha Moisés paca itoroba’, jei pinae bapon Jesús, jei barapomonae pomonae penaerabiwi.

¹⁵ Pomonae baxota ena pomonae pentacaitorobi bicheito, barapomonae Esteban necotenatsi. Barapomonae itabara tayena xua Esteban peitabara be matatsunpin itabara, xua bichocono wanae.

7

Meja yabara poxonae Esteban pentacaitorobi bicheito itabaratha pia coya paeba

¹ Nexata sacerdotemonae pia pepa pentacaponaein tatsi bapon Esteban baraichi, jeichi: “¿Bara xainyei xua barapomonae cabarai?” jei sacerdotemonae pia pepa pentacaponaein tatsi.

² Esteban jume nota, jeye: “Tamonae pam pana nejume taema. Wanacom wanae nawita. Barapon Abraham tsita naitatatsi poxonae caena bayatha awiya Mesopotamia nacuatha popona. Bapon Abraham wamo susatopin matha copiya tsiwanaeya popona Mesopotamia nacuatha poxonae Harán tomara bewarapiya.

³ Nacom pinae Abraham baraichi: ‘Barapo ira jinya ira cuenta warapare. Jinyamonaeno cuenta

warapare. Icha ira bewarapiyama ichaxota po ira beya cacaponaeinchi', jei pinae Nacom.

⁴ Nexata pinae Abraham Caldea nacua wewarapiya. Harán tomara pinae bewarapiya. Poxonae pinae Abraham Harán tomaratha popona pinae Abraham paxa tatupatsi pon pewun Taré. Bapoxonae Nacom, Abraham pinae itorobatsi barapo irathe po irathe pajinompame anoxuae.

⁵ Barapoxonae pinae Abraham cataunxuae jopa catichi ira. Saya pinae tacayabara wunae tsimuxu dutatsi. Nacom pinae Abraham baraichi: 'Jinya ira tsane, iru jinya jiwi penaitapataya naexana dubenaponeibiwi tsane pomonae jinya nemomo susato jiwi pia ira nexa tsaneru', jei pinae Nacom. Ichitha pinae barapoxonae jopa xeinaeyo pexui.

⁶ Baraxua Nacom pinae Abraham baraichi: 'Jinya nemomo susato jiwi icha nacuatha jinompaena. Be pomonae penanapaincha jinompaewi tsicotaeinchi xua be pocotsi jiwimonae icha nacua werena peponaewi. Tanacuitinchi ichamonae xua amanaya tanacuichina. Busi cui tatayebeibinchino. Caitacueintinchino yawa. Cuatrocientos po weiyobe tsane xua jinyamonae naitapataya atene exaneibinchi', jei Nacom Abrahamtha.

⁷ Equeicha Nacom tsipaeba Abraham, jeye: 'Barapomonae xua abe pacata exanaena poxonae paca busi cui tataibina barapomonae jopa cui jantemainaen tsane. Barapomonae itawetsiya peraxa jubin. Bapoxonae jinya nemomoxi susato jiwi warapaena po nacuathe ichaxota uncuame yawa wunae nejainchina xote', jei pinae Nacom Abrahamtha.

⁸ Nacom pinae Abraham itorobatsi xua peex-

anaenexa po coyene xua pexui pebin wutixi pewi thabiwatsi xua ichaxota nareixacaena. Barapo coyene exana Abraham penanta xeinaenexa iru piamonae tatsi xua po coyene bayatha Nacom pinae yabara tsiwuna nae muxu duta, xua bepa pinae yaweneibina xua barapomonae pinae bepa yaweneibinchi. Daxota pinae poxonae Abraham pexanto tanaexanatsi pexanto wi thaba, pinae pewun Isaac. Isaac iru pinae barichi pexanto wi thaba, pinae pewun Jacob. Jacob iru pinae barichi wi thaba pexanto jiwi, pomonae bayatha Israel nacuamonaepiwi pia pentacaponae wi tanaexanatsi barapo doce poyobe.

⁹ “Jacob pia pexanto jiwi tatsi, barapo doce poyobe, wamo susatomonae. Barapo doce poyobe jiwana caein pewun José. José pentapin jiwi uwatsi. Daxota José pentapin jiwi caenaetatsi. Pomonae bapon José comotatsi barapomonae José Egipto nacua becayiyatsi. Pon be jiwi pebusi cui tataibinchi be bapocotsin petsicotaenexa tsainchi. Ichitha Nacom José yawenatsi pebaru poponaexaetsi.

¹⁰ Poxonae José abe jume baraunchaibichi ichamonae, yawa poxonae muxu atene peexaneibichi awiya José capanepeibatsi Nacom. Poxonae faraón peitabaratha taponatsi José, Nacom exana xua José faraón tsita juntu coyene xanepanatsi. Matautano Nacom peyaputaen exanano. Bapon faraón Egipto nacuamona nae pia pepa peewatsinchi tatsi. Faraón cana exana xua José Egipto nacuapiwi yanacua ewatatsi faraón nexa. Matautano faraón cana exana xua José canamataxeina daxita xua xuan faraón xeina.

11 “Barapoxonae Egipto nacuatha jainbo nacua tsurucuaeno, Canaán nacuathano iru. Pata amo susato jiwi jopa pexaewa taeyo. Yawa piyain pewerapae nacua tsurucuae poxoru pexaewa ajibi.

12 Poxonae Jacob jume tane xua trigo xu xeina Egipto nacuatha, pia pexui bara beitorobiya. Barapon Jacob pia pexui tatsi, pata amo susato jiwi. Baraxua poxonae xua copiya aena pona Egipto nacuatha.

13 Poxonae equeicha pona José pentapin jiwi tsita naitapeinya xeina xua bapon bara peweicho jiwi tatsi. Bapoxonae faraón yaputane xua barapomonae apara bara José piamonae tatsi.

14 Pirapae José pentapin jiwi itoroba xua petabarudendenaenexatsi paxa tatsi, pon pewan Jacob, matautano piamonae tatsi petabarudendenaenexatsi po jiwimonaexae xua setenta y cinco poyobe.

15 Daxota Jacob iru pijimonaeno Egipto nacua beya warapa. Baxota pirapae bapon tupa. Iru pirapae pata amo susato jiwino weraparudaxota.

16 Pirapaeno Jacob piwan capoinchi Siquem tomara beya. Baxota piwan muthutha xotsi, po ira bayatha Abraham comota, po ira Hamor pexantixi tatsi caenaeta.

17 “Ainya wei tsuxubi. Poxonae barapomonae Egipto nacua wewarapiyaenaba, be pocotsi coyeneya bayatha Nacom yabara tsiwunae muxu duta, bapoxonae Israel nacuapiwi pinmonae naexana.

18 Nexata Egipto nacuatha ichun nacua peewatsin naexana, pon José jopa yaputaetsi.

19 Barapo Egipto nacuapiwi itorobiya pia

pepa peewatsinchi tatsi pata amo susato jiwi muxuitorobeibatsi. Yawa cuainteibatsino. Yawa cobe itorobeibatsino xua pexui saya pebebainexa tsaibi tsane aisowatha xua pewerapeibinexa.

²⁰ Barapoxonae iru Moisés naexanaru. Moisés paxa pia botha wichatatsi acoibi po xometiyobe. Barapon Moisés pexeinyan nawita Nacom tsita juntu coyene xanepanecatsi barapo pexuyo.

²¹ Poxonae Moisés pena xotsi yawa paxa xotsi namicha jeriyotha yana botetatsi mentha xua musuripawa cuba, barapoxonae faraón pexantiyo tatsi Moisés pitatsi. Be pexanto tsicotane, pia botha wichata.

²² Bapon Moisés nacuiduba nawita pocotsiwa Egipto nacuamonaе yaputane. Daxota peyaputaеin tsecaeno, wanae peexanaein tsecaeno.

²³ “Pirapae poxonae Moisés yacuarenta po weibe jopa, bapon nanta xeina xua piamonae pesiwa ponaewa pomonae Israel nacuamonaexae.

²⁴ Poxonae Moisés piamonae siwa pona, bapon tane xua piamonae jiwana tatsi tabutsi, Egipto nacuapin. Daxota Moisés yawena pon piamonae jiwanaxae tatsi yawa bexuba Egipto nacuapin.

²⁵ Moisés nanta xeina, pia coutha nabarai: ‘Tamonae, Israel nacuamonaepiwi neyaputaena xua Nacom neitoroba. Mata cawarapaein barapomonae Egipto nacua weya, penacapanenebiyaenexa tsane’, najei. Ichitha dammetha barapomonae jopa tsaqueinaeyo.

²⁶ Icha matababitha Moisés tane xua caepinbe iru nababeru Israel nacuamonaepinbe. Moisés barai baponbe: ‘Ja, zeta xua metha caepinbe pana

nabamebe?’ jei.

²⁷ Pon piamonae ba, Moisés napuna toroba-bapoinchi. Moisés baraichi: ‘¿Jintam caitoroba pata xantha xua pon be jiwi neyabara paebin penatsicuentisiwa xua abe peexanaexae, xuano xua jiwi Necanamataxeinaem naexaname?’

²⁸ ¿Jinya nebexuichi icha mexuae ichim Egipto nacuapin?’ jeichichi Moisés.

²⁹ Poxonae Moisés jume taebiriwa baxua, Moisés naetsiricua Madián nacua benaetsiricuiya. Baxota Moisés tanaexanatsi pexuyobe, pebin wātobe”, jei Esteban.

³⁰ Equeicha came Esteban barapomonae baru cueicueijei. Namchi, jeye: “Caentacabi pirapae poxonae cuarenta po weibe pu caewa, xua poxonae equeicha icha cuarenta po weibe xeina, Moisés popona ichaxota ira xuepana susato tsurucuae nacuatha. Imoxoyo demxuwān, po demxuwān pewān Sinaí baraxota Moisés tsita naitutatsi matatsunpin xua poxonae isototha uncua xua taxuncua tsica naeyo.

³¹ Moisés yabara najuntū coyene cabenaeca. Bapon itatapoinya tsipei ichipa yaitane. Bapoxonae baxota Moisés jume tane xua Nacom namchi:

³² ‘Apara jinya amo susato jiwi pia Nacom tatsin. Irū apara, Abraham pia Nacom tatsin. Irū apara Isaac pia Nacom tatsin. Apara irū Jacob pia Nacom tatsin’, jei Nacom. Moisés pijunuwi bichocono jiyijiyei daxota aichaxaibi xua tane.

³³ Nacom pinae Moisés baraichi: ‘Xua nataxu xatatame nataxu wejonde, poxoru po iratha poname apara tairiyo.

³⁴ Tamonae, pomonae Egipto nacuatha jinompa bichocono atene exaneibatsi yawa jume tanno xua nanenaba. Daxota barapomonae capanepan. Antha, caitorobatsi equeicha necoyo beya, Egipto nacua beya', jei pinae Nacom", jei Esteban.

³⁵ Equeicha Esteban namchi, jeye: "Pomonae Egipto nacuatha jinompa, barapomonae Moisés aichaxaibichi. Barapomonae Moisés baraichi: '¿Jintam caitoroba pata xantha xua naexaname pon be jiwí neyabara paebin xua penatsicuentsiwa xua abe peexanaexae xuano xua naexaname pon be necanamataxeinaein?' jei barapomonae. Bequein barapomonae baxua paeba ichitha Nacom cana exana xua bapon Moisés naexana be pon jiwí peyabara paebin xua penatsicuentsiwa xua abe peexanaexae. Matautano Moisés cana exanatsi pon pecapanepaein piamonae. Baxua Moisés naexana poxonae matatsunpin itoroba po matatsunpin Moisés tsita naitutatsi poxonae isototha uncua xua taxuncua tsica naeyo.

³⁶ Bapon Moisés pon wamo susato jiwí capanepatsi Egipto nacua weya. Moisés petsita itatsi coyenewan exana Nacom pia peayapusawatha. Baxua exana Egipto nacuatha, Mar Rojo menthano. Matautano exanano ichaxota ira xuepana susato tsurucuae nacuatha cuarenta po weibetha.

³⁷ Moisés Israel nacuamonae jiwitha namchi: 'Nacom paca jiwana cana exanaena pon pia peitorobi jume petapaebinchi icha neichi barichi tsane. Bapon xua pon Nacom itorobina, apara pon painyamonaе jiwana tsane', jei Moisés.

³⁸ Matautano apara bapon Moisés pon

nanacaetuta poxonae Israel nacuamonae nacaetuta ichaxota ira xuepana susato tsurucuae nacuatha. Mataatano bapon Moisés diwesi tsipaeba jiwitha xua petsipaebixaetsi matatsunpin poxonae tsipaebatsi demxuwatha po demxuwa pewan Sinaí. Barapo diwesi po diwesi Moisés wamo susato jiwi tsipaebatsi barapo diwesi jiwi cana exanatsi xua peajuntayarusawa pexeinaewa. Barapo diwesi iru waxainchi nexaru.

³⁹ “Ichitha barapomonaе wamo susato jiwi jopa bejume jejeyo xua peexanaewa pocotsiwa Moisés itorobatsi Nacom. Moisés jume matawentatsi. Saya barapomonaе ichipa xua equeicha caibeya penawibiwa Egipto nacua beya.

⁴⁰ Poxonaе cataunxuae Moisés demxuwatha pona, barapoxonaе barapomonaе Moisés peweicho tatsi pon pewan Aarón, bapon baraichi: ‘Painta exande ainya ibo nain nacomu. Barapo ibo nain nacomu naca tsiwana copiya cajijincaena namtotha. Jopa payaputaеinyo xua Moisés aichawiya pon pana matacapona Egipto nacua weya’, jeichichi Aarón.

⁴¹ Barapoxonaе barapomonaе penain nacom exana be vacayo pebtiyo canaxobeta. Bapoxonaе barapomonaе tabexuba oveja, penain nacom vacayo nexa. Tsipei barapomonaе nanta xeina xua metha penain nacom ichichipa baxua. Barapomonaе bichocono juntu coyene weiweina penain nacom pia coya peexanaexae, xua pin penabanaewa xua pebaru itura jinaenexatsi barapo ibo nacom.

⁴² Barapomonaе Nacom wepu tsatajopa tsipei

barapomonae pia penain nacom exana. Nacom bara copata barapomonae xua bara barapomonae bara exanaena be pocotsi coyeneya xua ichichipa peexanaewa. Daxota barapomonae opitei be nacom cana exana, po opitei barapomonae w_unae jainta. Barapomonae pomonae wamo susatomonae, exana pocotsiwa caena bayatha Nacom pia peitorobi jume pepaebin yabara cui tsiw_unae muxu dutsiya tina. Bapon diwesi tina xua Nacom jume yabara tinatsi xua Nacom namchi barapo diwesitha, jeye:

‘Israel nacuamonae, paxam oveja pabexubame painya penain nacom_un nexa, ichitha xan nexa jopa paraichim.

Baraxua paexaname poxonae pajinompame
ichaxota

ira xuepana susato tsurucuae nacuatha
xua cuarenta po weibetha.

⁴³ Yawa pacaponame penain boutiyo nacom
po penein boutiyo nacom pew_un Moloc.
Yawa pacaponame icha penain opitei nacom
po opitei penain nacom pew_un Refán.

Barapo penain nacombe paexaname
painya w_unae jaintichi.

Daxota xan itorobin ich_un xua paca mata
cawarapaena Babilonia nacua beya.

Bequein jopa bepawarapaem ichitha awiya
paca itorobinchi’, jei Nacom.

⁴⁴ “Wamo susato jiwi exana xua be bo xua anseraboco, xua ichaxota tututha jeba ibo xua po iboton Moisés mata tina xua Nacom pejume caitorobivan. Barapomonae cuita acaba be pocotsi boyo Moisés tsita itutatsi Nacom.

⁴⁵ Wamo susato jiwi poxonaē tawerapatsi paxa tatsi, itorein pita barapo boyo xua anseraboco boyo. Pata tamo jiwi Nacom pia boyo capona poxonaē Josué naponā. Poxonaē pata tamo jiwi ainya nacuan nonota tsiniya barapoxonaē equeicha barapo anseraboco boyo capona beya yacobe cui matabi othopa poxonaē David popona pon Israel nacuapiwi itorobiya pia pepa peewatsinchi.

⁴⁶ Bapon David pon Israel nacuapiwi itorobiya pia pepa peewatsinchi tatsi, Nacom tsita pejuṅtu coyene xanepanaeinchi. Bapon David ichichipa xua acaba pin bo Nacom nexa po Nacom Jacob pia Nacom tatsi.

⁴⁷ Ichitha Salomón bapon apara pon Nacom pin pia bo exana.

⁴⁸ Bequein Nacom pon pepa Nacom jopa poponaeyo botha pocotsi bo jiwi acaba Nacom nexa. Nacom peitorobi jume pepaebin baxua yabara paeba xua Nacom tapaebatsi, jeye:

⁴⁹ ‘Peitaboco apara ichaxota taequeibithopeibiwa. Ira apara ichaxota nataxu yṅtabotan.

¿Eta pocotsi bo netsiexanaename?’

jei pon Wanacanamataxeinaein.

Mataṅtano jeino: ‘Ichacuitha ¿eta po irara

xua ichaxota nafinacaecaen?’

⁵⁰ Apara xan tacoutha exanan daxita ira yawa peitaboco daxota jopa nantawenonaeyino xua ichawa tana netsiexanaewam’, jei Nacom”,
jei Esteban.

⁵¹ Equeicha Esteban barai, jeye: “Maisa bi-chocono pajṅtu coyene daunwam xua jopa bepayaputaem. Mataṅtano pamuxu tutu daunwam, yawano pajṅtu coyene daunwam icha be

pocotsimonae ichi pomonae jopa peyaputaewi Nacom. Barichi paaichaxaibim Nacom pia Pejumo pe t̃nax̃ tatsi. Paxam bara paichim icha painya amo susato jiwi ichi.

⁵² Apara painya amo susato jiwi bayatha Nacom pia peitorobi jume pepaebiwi catsa jume bar̃ paebatsi, yawa cueintatsino. Matautano bayatha jutebatsi barapomonae pomonae Nacom pia peitorobi jume pepaebiwi, pomonae namchi: ‘Bexa patopaena pon pepa pejunt̃ xanepanaein pon Mesías baraichi’, jei. Cain paxam, barapon poxonae patopa, pacaenaetame, pabexubameno.

⁵³ Nacom pia peitorobi diwesi pajume taneme xua matatsunpiwi paca tsipaeba Nacom nexa. Ichitha jopa paexanaem pocotsiwa Nacom paca itoroba barapo pia peitorobi diwesitha”, jei Esteban pentacaitorobi bicheitha.

Meje yabara poxonae Esteban t̃pa

⁵⁴ Poxonae pentacaitorobi bicheito jume tane pocotsiwa Esteban paeba, bapoxonae bichocono Esteban yabara cui anaepanar̃c̃patsi.

⁵⁵ Ichitha Esteban bichocono j̃nt̃ coyene ỹca cana exainchi Nacom pia Pejumo pe t̃nax̃ tatsi pia peyapus̃watha. Esteban athabeicha necoicha. Bapon necota Nacom pia peit̃panae coicha tatsi ir̃ Jesucristo xua uncuia Nacom pecoxatha tatsi.

⁵⁶ Nexata Esteban namchi, jeye:

—Incane pataema. Necotan xua peitaboco naitaboco coibo yausaranaxuba. Tan Jesús xua uncuia Nacom pecoxa weya tatsi ponxae Nacom pia Peitapetsin tatsi, jei Esteban.

⁵⁷ Barapomonae jume itapataya namuxu acaba pocotsiwa Esteban paeba. Yawa anaepanaya wawai. Barapomonae be cae bicheito naexana pomonae Esteban betacuinaeyiyatsi.

⁵⁸ Barapomonae Esteban aisowa bexoyatsi tomara weya. Yawa baraxota ibotontha cuinbabatsi. Pomonae abe peexanaewichi Esteban, barapomonae Saulo juma camisa jeba xua pocotsiwan nainya werubiya. Bapon Saulo pon pewowin xua bayatha pinyo.

⁵⁹ Poxonae barapomonae Esteban cuinbabompatsi ibotontha bapoxonae Esteban tsipaeba Nacomtha, jeye: “Jesús, pon Tanecanamataxeinaem, nejumope t̃nax̃ñ pire”, jei Esteban.

⁶⁰ Bapoxonae pentabocototha uncua. Namtsebiya wawaino, jeye: “¡Jesús, Tanecanamataxeinaem! ¡Necana cui j̃ntemainare, yawa jopa neyantomatsinde xua barapomonae inta abe exana!” jei Esteban.

Poxonae najume wetaba, t̃panaicha Esteban.

8

¹ Saulo ir̃ñ bar̃ñ ita cui w̃naetsi poxonae ichamonae Esteban bexotsi.

Meje yabara poxonae Saulo abe exana pomonae Jesús pejume cow̃ntsiwi

Po matabitha Esteban bexotsi, barapo matabitha judiomonae tamropata notar̃c̃pa xua Jesús pejume cow̃ntsi jiwi tatsi bichocono abe exanatsi Jerusalén tomaratha. Daxita Jesús pejume cow̃ntsi jiwi tatsi yotabatsi. Ichamonae Judea nacia ber̃c̃piya, ichamonae Samaria nacia ber̃c̃piya. Meisa Jesús pia peitorobi jiwi

tatsi pomonae xua doce poyobe ena Jerusalén tomaratha. Jopa дѣсѣраеуо.

² Ichamonae, pomonae Nacom pejume cowantsiwichi, Esteban muthutha xotsi. Barapomonae Esteban bichocono siwa wecoyeichi.

³ Saulo jeita ducuaeta Jesucristo pia pejume cowantsi jiwi tatsi. Daxita bomuxhñ japaya Saulo jiwi teteica tsiniya yabuxino pebiwino. Jiwi pecubi bo beya capona.

Meje yabara poxonae Jesús pejume cowantsi jiwi tatsi paeba dubenanaebiya Jesús pia pexeinya jume diwesi tatsi Samaria nacuatha

⁴ Pomonae bewa Jerusalén tomara werucupiyaena barapomonae Jesucristo pia pecapanepae jume diwesi paeba dubenanaebiya daxita po tomarantha xua pateiba.

⁵ Barapomonae jiwana tatsi pon Felipe baraichi bapon pona pepa tomaratha Samaria nacuatha. Barapo tomaratha tamropata pitaba xua pecueicueijiwa Cristo yabara.

⁶ Jiwi nacaetuta dubenanaebiya. Matautano jume naitomatsiya jume taerubenanaebiya pocotsiwa Felipe cueicueiji Cristo yabara. Matautano barapomonae taerubenanaebiya pexeinya petsita itatsi coyenewan xua Felipe exana Nacom pia peayapusu itorobi coyenewatha.

⁷ Pomonae xua cauri pexeinaewi, barapomonae equeicha axaibi exanatsi poxonae Felipe taitaweta cauri. Matautano caurimonae barapomonae wawaya wepu дѣсѣреібати.

Ichamonaē pomonaē pecuenobichi jiwi, pejayuyajujeimonaeno, daxita barapomonaē axaibi exanatsi.

⁸ Felipe baxua peexanaexae daxota barapo tomarapiwi bichocono jantꝯ coyene weiweinaya jinompa.

⁹ Barapo Samaria tomaratha popona pon pentawꝯn Simón. Bapon Simón mara pexeinaein. Mataꝯtano bapon barapo Samaria tomarapiwi muxujainyabeibatsi poxonaē bapon pia coya pentacaponaein naexana.

¹⁰ Daxita tomarapiwi pomonaē peacopeibiwi irꝯ pomonaē nawita pexeinaewino, barapomonaē beta jume naitawata pocotsiwa Simón paeba. Barapomonaē namchi, jeye: “Barapon Simón apara pon yabara jeichichi: ‘Pon bichocono Nacom pia peayapusꝯwa tatsi xeina’, yabara jeichi”, jei barapomonaē.

¹¹ Daxita barapo tomarapiwi itapeta jume naitawata pocotsiwa Simón paeba, tsipei saya caena bayatha barapomonaē muxujainyabatsi mara peexanaewi pia coyeneyatha tatsi.

¹² Barapomonaē jume cowꝯnta po pexeinya jume diwesi Felipe cueicueijeĩ xua Nacom yawa Jesucristo yabara, po diwesi xua Nacom waba jiwi petanaexanaenexatsi pijimonaē tatsi jiwana pomonaē Nacom itorobiya ewata. Bapoxonaē barapomonaē bautisabatsi pebiwi yawa yabꝯxino.

¹³ Bapoxonaē bapon Simón irꝯ jume cowꝯnta. Irꝯno bapon bautisabatsi. Mataꝯtano bapon tamropata pitaba xua Felipe peyantsiwatsi. Bapon Simón yabara najantꝯ coyene cabenaeca

bichocono poxonae Felipe pexeinya petsita itatsi coyenewan exana Nacom pia peayapusɯwatha.

¹⁴ Jesucristo pia peitorobi jiwi tatsi, pomonaе peenaexae Jerusalén tomaratha, jume tane xua Samaria nacuamonae jume cowanta Nacom Pejume Diwesi. Daxota barapomonaе Pedro itorobatsi irɯ Juan itorobatsi, Samaria nacuamonae beya.

¹⁵ Poxonaе Juan Pedrobe patopabe barapomon-aetha, barapoxonaе Nacomtha tawɯcabe Samaria nacuapiwi nexa, pomonaе pejume cowantsixae Nacom. Baponbe ichichipabe xua barapomonaе peyanaba jinompaenexatsi Nacom pia Pejumope tɯnaxɯ tatsi.

¹⁶ Pedro irɯ Juan tawɯcabe barapomonaе Nacomtha. Tsipei barapomonaе awiya cataunxuae jopa tapatichi pia jɯntɯ coyeneintha Nacom pia Pejumope tɯnaxɯ tatsi. Saya meisa poxoru bautisabatsi Jesús pon Pecanamataxeinaein jiwi bapon pewantha tatsi.

¹⁷ Pedro irɯ Juan, pecobetha mata jayababe barapomonaе. Barapoxonaе barapomonaе tapatatsi pia jɯntɯ coyeneintha tatsi Nacom pia Pejumope tɯnaxɯ tatsi.

¹⁸ Poxonaе Simón cui tane xua Pedro Juanno pecobetha mata jayababe xua daxota Nacom pia Pejumope tɯnaxɯ tatsi tapatatsi barapomonaе, Simón ichichipa xua pecatsiwa paratixi baponbetha.

¹⁹ Simón namchi, jeye:

—Dapo peayapusɯwa necare. Tha irɯ poxonaе mata jayabeiban ichamonae tapateibinchi Nacom pia Pejumope tɯnaxɯ tatsi, jei Simón.

20 Nexata Pedro Simón baraichi, jeye:

—Barabũ xam yawa jinya paratixino cayawa muxuna weraweraca exanaena, tsipei saya nanta xeiname xua necaitacũpaewa xua Nacom pia peayapusũwa tatsi necomotsiwa paratixitha, po peayapusũwa bequein Nacom amanaya pecati-siwa jiwitha.

21 Jopa caitacũpaeyo xua nexeiaewa Nacom pia peayapusũwa tatsi, tsipei apara Nacom cajũntũ coyene yaputane xua neajũntũcoyenebewa.

22 Nacui baraxore jinya abe neexanae cuiru coyenein. Nacom wũcare, xain Nacom cayabara jũntemaina xua nanta xeiname baxua.

23 Catainchi xua pejume uwiwa nenthũtotha xeiname. Xam neabewa canthũthũ yancababa daxota beta jopa xapain poponaem, abe nanta xeiname jincoutha, jei Pedro.

24 Nexata Simón jume nota. Pedro irũ Juan jume notatsibe, jeye:

—Painta yabara wũcarebe Nacomtha baxua xu-aunxuae pana netsipaebamebe, xain bapoxonae xeinaein barapo coyene xua jopa abe tana necana exanaenexa, jei Simón.

25 Bapoxonae Pedro Juanno ichamonaetha nacui yopitabe po coyene xua bayatha jume cowũntabe Nacom. Yawa xua penthũtotha taecatsibe Nacom pia Pejumope tũnaxũ tatsi. Baponbe Nacom pia pexeinya jume diwesi tsipaebabe barapomonaetha. Jerusalén tomara bewarapiyabe. Poxonae warapabe, Jesús pia pexeinya jume diwesi papaeba tsiniyabe Samaria nacuatha. Ainya tomarantha cueicueijeibe.

Meje yabara xua poxonae Felipe iruru Etiopía nacuapin nantenta ponabe namtotha

²⁶ Barapoxonae pirapae, Jesucristo pon Pecana-mataxeinaein jiwi, bapon pia matatsunpin tatsi, Felipe tsita naitutsiya tsipaebatsi, jeichichi: “Non-taponde, yawa ponde pocotsiwa parowa bereca. Jerusalén namto iyande xua po namto Gaza tomara betaerucuiya”, jei matatsunpin. Barapo namto ducuiya ichaxoyo ira xuepana susato tsurucuae nacua iya.

²⁷ Felipe nantacotaxuba, bapoxonae bara ponataba. Poxonae Felipe namtotha ecapona, bapoxonae caxina pebin Etiopía nacuapin. Barapon pon pentacaponaein pon peainya cui jiton. Matautano bapon paratixi tayapu eena xua yabayo nexa powa Etiopía nacua pepa peewatsiwayo. Bapon Etiopía nacuapin bayatha pona Jerusalén tomara beya xua wnae pejainchinexa Nacom.

²⁸ Bapon caewa pia nacua siwa ecapona Etiopía nacua. Cawayu pecapona naeyotha ecapona yawa yorobecapona po diwesi bayatha Isaías tina, pon Nacom peitorobi jume pepaebin.

²⁹ Nacom pia Pejumope tınaxu tatsi Felipe baraichi, jeye: “Imoxoyo ponde cawayu pecapona naeyo beya yawa imoxoyo caquita naecaponde”, jeichichi Felipe.

³⁰ Felipe cuinaepona cawayu pecapona naeyo beya, ichaxota jume tane xua yoroba Etiopía nacuapin. Bapon yoroba Nacom Pejume Diwesi, xua po diwesi bayatha Isaías tina. Felipe barai bapontha jeye:

—¿Bara yaputaneme xuaunxae yorobame? jei.

31 Bapon Felipe jume notatsi, jeye:

—¿Eta bichin xua tayaputaewa icha dapon aibi pon yabara neyaputane exana barapo diwesi? jeichi Felipe.

Felipe wabatsi xua penontabinaenexa xuano xua peecaenexa ichaxota bapon eca.

32 Po diwesi ichaxota bapon yoroba xua baxue meje:

“Be poxonaе jiwi oveja yama capona pebexubinexa tsane, barichi tsane jiwi caponaena jiton pebexubinexa tsane.

Be cordero moya, jopa papayo poxonaе na thabatsi

barichi tsane jiton moya tsane, jopa papai tsane poxonaе caitacueintinchi poxonaе yawa aperutane tsaneno.

33 Jiton ura exanaeinchi.

Jiwi ura exanaena.

Jopa beta yabara exanae tsainchi poxonaе jiton atene tsane poxonaе jopa bequein abe exanaeyo.

Jiwi jopa yabara paebi tsane xua pia pexui tatsi, poxoru jopa nantaatsi tsane pexui, pemomoxino.

Jiwi barapo jiton bexubinchi”, jei Nacom Pejume Diwesi, po diwesi Isaías tina xua ichaxota yoroba Etiopía nacuapin.

34 Nexata Felipe yainyabatsi Etiopía nacuapin, jeichichi:

—Incane netsipaebare, ¿jintam Isaías yabara jei? ¿Pia coutha nayabara jei jampa? ¿Bara metha ichan yabara jeichi? jeichichi Felipe Etiopía nacuapin.

³⁵ Felipe yaputane exana Etiopía nacuapin po diwesi xua Isaías tina Jesús jume yabara. Bapoxonae nama paeba po coyene Jesús pia pexeinya jume diwesi tatsi.

³⁶ Poxonae Felipe Etiopía nacuapinno namtotha ecaponabe, bapoxonae Etiopía nacuapin namchi, jeye:

—Taema meniyo eque jeba. ¿Jopa nebautisabim tsane? jeichichi Felipe.

³⁷ Felipe barai, jeye:

—Icha daxita carepaya jume cowantame nejantá coyenetha, methaunxuae bara cabautisabinchi, jei Felipe.

Etiopía nacuapin Felipe jume notatsi, jeye:

—Bara yabara jume cowantan xua Jesucristo, bara Nacom pexanto tatsi, jei bapon.

³⁸ Nexata Etiopía nacuapin cobe itoroba xua duntabina pon xua cawayu pecomaecaein. Nexata duneicabe Felipe Etiopía nacuapinno. Meniyo bejonecabe. Nexata Felipe meniyotha bautisaba Etiopía nacuapin.

³⁹ Poxonae meniyo wejuinabe, Nacom pia Peju-mope tñaxu tatsi Felipe puxanatsi. Felipe eque-icha jopa taetsi Etiopía nacuapin. Saya equeicha Etiopía nacuapin jantema pona pia nacua beya.

⁴⁰ Felipe taerucapatsi ichamonae Azoto tomaratha. Felipe daxita tomaran tamropate-capona xua pecueicueijeiva Jesucristo pia pexeinya jume diwesi tatsi, beya yacui jopa Cesarea tomaratha.

9

*Meje yabara poxonae Saulo jume cowanta Jesús
(Hch 22.6-16; 26.12-18)*

¹ Awiya came Saulo ichipa daxita pejutebiwa pomonae Jesucristo pejume cowantsi jiwi tatsi, pon Jesús Pecanamataxeinaein jiwi. Daxota Saulo siwa pona sacerdotemonae pia pepa pentacaponaein tatsi.

² Saulo wuca: “Necare cartan judiomonae pia penacaetutsi bon pia pentacoponaewi nexa. Tha tacaponaetsi Damasco tomara beya. Icha caxinaein pomonae Jesús pejume cowantsiwi tha jiwi pecubi botha caponaetsi Jerusalén tomaratha, pebiwino, yabuxino”, jei Saulo.

³ Saulo Damasco tomara beya pona. Poxonae bara muxu pepatopae, bapoxonae pin coicha yacaincha matawacaicha matatsun uncuatabicatsi. Barapo coicha peitaboco wejopeica.

⁴ Nexata iratha jopa Saulo. Yawa jume taneno xua pejume xua baraichichi, jeichichi: “Saulo, Saulo, ¿eta xua metha tamonae inta abe exaname?” jei pejume.

⁵ Saulo jume nota, jeye: “Pon jiwi Pecanamataxeinaem, ¿jintamumda?” jei Saulo. Saulo u pejume jume notatsi, jeye: “Apara bara xan Jesús, ponxaein inta abe cana exaname tamonae.

⁶ Nontaponde, tomara be-iyande. Baraxotiya catsipaebina pocotsiwa bewa exanaename”, jeichichi Saulo.

⁷ Pebiwi, pomonae Saulo puna poinchi bichocono pijunuwi moya umena tsipei saya u pejume jume tane ichitha pepon jopa xapain taeyo.

⁸ Saulo nantacotaxuba asiya uncua. Poxonae necotaxuba jopa xapain taeyo. Daxota pomonae Saulo puna poinchi cobe capoinchi Damasco tomara beya.

⁹ Baraxota Damasco tomaratha Saulo eca acoibi po matabibe. Jopa xapain necotsiyo. Barapo acoibi po matabibetha jopa nabanaeyo, jopa apaeyono.

¹⁰ Baxota Damasco tomaratha popona pon pejume cowantsin Jesucristo. Bapon pewun Ananías. Ananías tsita naitapeinya xeinatsi Jesús poxonae camaita. Ananías tsipaebatsi Jesús jeichichi: “¡Ananías!” jeichi. Ananías jume nota, jeye: “Jai, apara xote ecanje, pon jiwi Pecanamataxeinaem”, jei.

¹¹ Nexata Jesús Ananías baraichi: “Nontaponde. Namto beya ponde, po namto pewun Bopiya perucuiyae namto. Poxonae Judas pia botha patopame, yainyabare barapo botha. ‘¿Incane Saulo, Tarso tomaramonaepin?’ jande. Iraunxuaer Saulo Nacom tsipaebauya.

¹² Saulo amachinae xua cacamaita, xua Ananiam xua itacuere wunaetsiname Saulo necobetha”, jei Jesús.

¹³ Nexata Ananías jume nota, jeye: “Pon jiwi Pecanamataxeinaem, pinmonae netsipaeba xua pinae bapon cata abe exanatsi jinya jiwimonae, pomonae Jerusalén tomaratha jinompa.

¹⁴ Bapon carta capatopa xote, po carta bayatha sacerdotemonae pia pentacoponaewi caitoroba. Saulo carta capatopa poxoru sacerdotemonae jume jejei xua Saulo pinae bara caponaena jiwi

pecubi bo beya pomonae cawun ununeiba poxonae Nacom tsipaebibatsi”, jei Ananías.

¹⁵ Jesús Ananías baraichi, jeichichi: “Ponde tsipei yaitama bapon bayatha Saulo itapetan. Bapon Saulo tsipaebina tajume diwesi icha nacuantha, po nacuantha jinompa pomonae jopa judiomonae naexanaeyo. Matautano tsipaebina pomonaetha pomonae jiwí itorobiya pia pepa peewatsiwichi. Matautano tsipaebina barapo tajume diwesi israelmonaetha.

¹⁶ Tha bexa Saulo tsita itutichi po coyene xua bewa atene tsane tajume diwesi penatsipei cueicueixae tsane”, jei Jesús.

¹⁷ Nexata Ananías pona ichaxota Saulo eca. Poxonae joniya botha, Saulo pecobetha ainya cobethabe mata jayabatsi. Ananías namchi, jeye:

—Saulom, pon be tayapin catsicotainchi, nejume cowantsixae Jesús. Bapon Jesús pon jiwí Pecanamataxeinaein neitoroba, pon namtotha catsita naitata xuano xua catsipaebano. Jesús neitoroba nenecotsinexa tsane yawa Nacom necajuntá coyene yuca exanaenexa pia Pejumope tñaxutha, jei Ananías xua Saulo tsipaebatsi.

¹⁸ Barapoxonae caena nainya peitacueretotha be petsebocoton taothopeinatsi. Bapoxonae equeicha caewa wñnaeya daxita carepaya tane. Saulo asiya uncuá bapoxonae caena bautisabatsi.

¹⁹ Poxonae nabane bapoxonae cui thñnei tsanaya. Be caentacabiyobe Saulo eca Damasco tomaratha ichaxota ena pomonae pejume cowantsiwi Jesucristo.

*Meje yabara poxonae Saulo Jesús pejume diwesi
paeba Damasco tomaratha*

²⁰ Caena nainya Saulo pona judiomonaе pia penacaetutsi bontha tatsi. Tsipaeba barapomon-aetha, jeye: “Barapon Jesús, apara Nacom Pexanto tatsi”, jei.

²¹ Daxita pomonaе jume tayena barapomonaе yabara najuntɨ coyene cabenaeca, nabarai, najei:

—Bara baraponda, pon cain matha Jerusalén tomaratha patopa xua abe peexanaponaenexatsi pomonaе Jesucristo pewɨn ununaewichi poxonaе Nacom wɨqueibatsi. Apara bapon pon bayatha xote patope xua peteicaenexatsi pomonaе pejume cowɨntsiwi xuano xua pecaponaenexatsi pomonaetha pomonaе sacerdotemonaе pia pentacaponaewi xua Jerusalén tomara beya, najei.

²² Ichitha bapon Saulo awiya jume tsacatsacapiya cueicueijei. Bapon tsita itapeinya xeina xua Jesús apara Mesías. Daxota barapomonaе judiomonaе moya umenarɨcɨpa tsipei yabara najuntɨ coyene cabenaeca pocotsiwa xua Saulo paeba.

*Meje yabara poxonae Saulo panepa judiomonaе
pecuiyainwa*

²³ Poxonaе ainya maticabin yapucaewa judiomonaе caemonaе pebɨrɨya nanta xeina xua bepa bexubichei Saulo.

²⁴ Saulo ichɨn muxu baraichi: “Bepa cabexubei ichamonaе”, jei. Saulo ewatumeinchi tomara coibotontha po coiboton xua tomara peyacaincha toxoroto dutsiwa coiboton. Barapo coibotontha

Saulo ewatumeinchi daxita matakabi, yawa merawino.

²⁵ Ichitha Saulo merawi panepa poxonae pjiimonae pitatsi yawa yacote yorecatsi pepa tomara juma deca xua tomara peyacaincha toxoroto dutsiwa juma deca.

Meje yabara poxonae Saulo Jerusalén tomaratha popona

²⁶ Poxonae Saulo Jerusalén tomaratha patopa bepa bequein bar_u nacaetutei Jesús pejume cowantsiwichi tatsi, ichitha barapomonae Saulo cunuwatsi tsipei nanta xeina xua Saulo jopa xapain Jesús pejume cowantsiwichi jiwana tatsi.

²⁷ Ichitha Bernabé Saulo cuaranotatsi Jesús pia peitorobi jiwu tatsi peitabaratha tatsi. Bernabé barapomonaetha namchi, jeye: “Pinae bayatha Saulo namtotha tsita nait_utatsi Jesús pon jiwu Pecanamataxeinaein. Mata_utano pinae Saulo muxu tsipaebatsi. Mata_utano pinae tsipaeba Jesús pejume diwesi Damasco tomaratha xua pinae cui tsacatsacapiya cueicueijej_i”, jei Bernabé.

²⁸ Daxota Saulo napopona ducuaeta Jerusalén tomaratha ichaxota Jesús pia peitorobi jiwu tatsi. Saulo Jerusalén tomaratha jume tsacatsacapiya cueicueijej_i ducuaeta Jesús pejume diwesi tatsi pon jiwu Pecanamataxeinaein.

²⁹ Saulo yabara bar_u natsipaeba Jesús pejume diwesi, yawa bar_u najume matsontsonobatsi judiomonae, pomonae xua griego jume penatsipaebiwi. Barapomonae judiomonae, ichichipa xua Saulo pebexubiwatsi.

³⁰ Pomonae iru Jesús pejume cowantsiwi tatsi jume tane, xua bepa Saulo imoxoyo bexubichei judiomonae. Daxota Saulo Cesarea tomara becayiyatsi. Baxota punaxubathopatsi. Equeicha Saulo dabe pu itorobiyatsi Tarso tomara beya.

³¹ Daxita Jesús pejume cowantsi jiwi tatsi jantema jinompa Judea nacuatha, Galilea nacuatharu, Samaria nacuatharu, tsipei jopa ichamonae abe exanaeyo barapomonaetha. Matautano barapomonaе mataropeichiya nacuidubapona xua pejume cowantaponaewa Nacom. Matautano exanapona pocotsiwa Nacom ichichipa. Nacom pia Pejumope tñaxu tatsi barapomonaе yaweinchi pejuntu coyeneintha tatsi. Pinmonae Jesús jume cocowantapona.

Meje yabara poxonaе Eneas axaibi exanatsi

³² Poxonaе Pedro siwa pona ducuaeteiba daxita tomaran Jesús pejume cowantsi jiwi tatsi, bapoxonaе yawa siwa ponano pomonaе Jesús pejume cowantsi jiwi pomonaе ena Lida tomaratha.

³³ Baxota Pedro caxina pon pecuenobinchi xua saya camatha boca. Bayatha caena xeina baxua ocho po weibe. Bapon pewun Eneas.

³⁴ Pedro, Eneas baraichi:

—Eneas, Jesucristo caaxaibi exana. Asiya uncuatabare. Jinya cama xaxainta xore, jei Pedro.

Barapoxonaе caena yacuinaya nantacotaxuba Eneas.

³⁵ Nexata Lida tomarapiwi, iru Sarón tomarapiwino, barapomonaе Eneas tainchi xua equeicha beta pona. Bapoxonaе barapomonaе naci barapenta xua copiya jume cowanta pejume

cowantsinexa Jesucristo, pon jiwi Pecanamataxeinaein.

Meje yabara poxonae Dorcas equeicha caewa asu exanatsi poxonae tupa

³⁶ Iruru jame caena bayatha Jope tomaratha popona powa pejume cowantsiwayo Jesús. Bapowa pewun Tabita. Barapo wun seicaya griego jume wun “Dorcas” baraichi. Barapowa pocotsiwa wuna itapeta exaneiba nawita. Matautano barapowa yaweneiba pomonaetha pomonae peapeibiwi.

³⁷ Barapowa caena nainya atene tsanaya. Caena nainya tupanaya. Daxita petupaein matapaeta peru iquicatsi. Bapoxonae po tutu athabeicha baxota boichatsi.

³⁸ Jope tomara Lida tomara imoxoyo nacaquita ecabe. Baxota Pedro popona Lida tomaratha. Baxota Jope tomaratha pomonae Jesús pejume cowantsiwichi tatsi jume tane xua juinya Pedro Lida tomaratha popona. Bapoxonae itoroba pebinbe nacueyatabe xua bepa pinae tawabathopiyaetsi xua Pedro pewabathopiyaenexatsi Lida tomara beya. Baponbe namchibe. Pedro baraichi: “Cawaba pomonae Jesús pejume cowantsiwichi tatsi. Bepa pinae anetha iyaem”, jeibe baponbe.

³⁹ Bara Pedro puna pona baponbetha. Poxonae Pedro patopa Jope tomaratha, baru jonyatsi Pedro, ichaxota po tututha boca petupaewa Dorcas. Daxita pecuenta werapaewaxichi piseurixi caquita wecoyei tsumenaetsi Pedro. Yawa barapowaxi Pedro tsita itubatsi doroburu, camisanno

xua bayatha Dorcas taxuxuca poxonae cataunx-
uae abu popona.

⁴⁰ Pedro pesato beitaueya daxita barapomonae.
Pedro imoxoyo caquita eca pentabocototha. Na-
comtha tsipaeba. Bapoxonae powa tɔpuncua
Pedro pexainya benecoaya, Pedro barai bapowa,
jeye:

—Tabita, asiya uncuatabare, jei Pedro.

Bapoxonae powa tɔpuncua necotaxuba. Pox-
onae Pedro tainchi, bapoxonae nantacotecataba.

⁴¹ Pedro Dorcas cobe pitatsi. Asiya cuarano-
tatsi. Bapoxonae Pedro waba pomonae Jesús pia
pejume cowuntsi jiwi tatsi, iruru powaxi pecuenta
werapaewaxichi piseurixi. Barapomonae Pedro
tsita itata xua equeicha Dorcas asu.

⁴² Jope tomarapiwi jume taerucupa xua eque-
icha Dorcas petupaewa nacosata. Bapowa eque-
icha asu popona. Daxota pinmonae jume cowunta
Jesús pon jiwi Pecanamataxeinaeinchi.

⁴³ Jope tomaratha Pedro baxota popona ainya
matababin. Pedro popona Simón pia botha tatsi
pon xua duwei peboco wunaeteibin.

10

Meje yabara Pedro iru Cornelio

¹ Iruru jame Cesarea tomaratha pebin wara-
paeya popona. Bapon pewun Cornelio. Cornelio,
jame yatsicaya pia nacua tatsi Italia nacua. Bapon
soldadomonae pia pentacaponaein tatsi. Iruru
soldadomonae pia nacua tatsi Italia nacua.

² Cornelio piamonae baru jume cowanta Nacomtha. Matautano Nacom wuna jaintatsi. Barapon Cornelio matowa yaweneiba judiomonae, pomonae peacopeibiwi. Bapon paratixi catsibeiba barapomonaetha. Bapon Cornelio tsipaebai Nacomtha.

³ Icha mataqueitha, Cornelio mataqueitha quiripitha amachinae.

Cornelio tane Nacom pia matatsunpin tatsi be poxonae camaita. Matatsunpin patopaeya namchi, jeye: “¡Cornelio!” jei.

⁴ Cornelio junuwiya camaitiya tane matatsunpin. Cornelio jume epa pita, jeye: “Pon jiwi Pecanamataxeinaem, zeta xua jinyatsi?” jei Cornelio. Cornelio jume notatsi matatsunpin jeye: “Bayatha Nacom cajume tane poxonae tsipaebame pexainya beya. Cacui taneno xua yaweneibame peacopeibiwi. Nacom cayabara nanta xeina.

⁵ Cornelio, ichamonae Jope tomara beitorobiyama pewabinexa tsainchi pon ainya wunbe pexeinaein. Bapon Simón baraichi yawa Pedro baraichi.

⁶ Barapon Simón Pedro eca icha Simón pia botha tatsi pon Simón seicaya pon duwein peboco wunaeteibin. Barapon Simón mar mene itapatha yabo uncua”, jeichichi Cornelio matatsunpin.

⁷ Poxonae matatsunpin napitaba, barapoxonae Cornelio ichamonae waba, pomonae xua pia botha petanacuichiwichi. Iru soldadomonaepin waba, pon xua pia botha tanacuitatsi. Barapon soldadomonaepin pejuntu coyene xanepanaein Nacomtha.

⁸ Barapomonaetha tsipaebatsi pocotsiwa bayatha Cornelio tsipaebatsi matatsunpin. Cotacaya Cornelio itoroba barapomonaē Jope tomara beya.

⁹ Icha mataqueitha barapomonaē warapa Jope tomara beya. Poxonaē cataunxuae itiya pona poxonaē mateinyaxae, poxonaē bara imoxoyo patichaba, bapoxonaē ἰϋρῆ Pedro bo matatupa beecoinyarῆ, po bo matatupa pereca. Nacom tsi-paebawiya poxonaē bayatha mataeinyaxae tsuxubi.

¹⁰ Pedro bichocono jainpeca, bepa bequein xaei. Ichitha poxonaē awiya cataunxuae tasetatsi, Pedro tsita naitatatsi be poxonaē camaita.

¹¹ Pedro athabe necoicha xua peitaboco nayausaranaxuba. Yawa taneno xua pin paparuwa pexainya betaruneicatsi, be xua jiton nantiya caruneicabe.

¹² Bapoxonaē barapo paparuwatha Pedro tane daxita xua xuan saya pecobetha pona be cawayun. Yawa tane daxita xua xuan saya petaxutha bobenapona be maquibῆn. Yawa tane daxita xua xuan saya petompacuetontha bobenapona be jomon. Matautano tane daxita xua xuan saya yapupuna be peyapupunaewi.

¹³ Nexata Pedro peitabocotha jume tane xua namchi, jeye: “Pedro asiya uncuatabare. Pon xua ichichipame, pire. Moya bexore. Yawa xaema”, jei barapo jume.

¹⁴ Nexata Pedro jume nota, jeye: “Bara, bayatha apara jopa bapana camatsawan xaeinyo, xua tamonaē jopa copatsiyo xua pexaewa”, jei Pedro.

¹⁵ Equeicha Pedro jume tane pejume xua tsi-paebatsi, xua jeichichi: “Xua Nacom catsijainya

exana, baraxua jopa camatsawa jaintocuaetsi”, jeichichi.

¹⁶ Pedro matha acoibi po jumeyobe tsipae-batsi baxua. Bapoxonae paparuwa caibe juinya peitaboco beicha.

¹⁷ Xua Pedro baraichi Nacom, baxua Pedro yabara nanta xeina nawita: “¿Eta xua metha Nacom yabara nejumichira?” najei. Pomonae Cornelio itoroba, barapomonae i dapo bon yainyainyaba tsiniya: “¿Incane Simón pia bo?” jei. Bapoxonae bapomonae pata Simón pia curara coibototha tatsi. Poxonae barapomonae pata, Pedro cataunxuae yabara nanta xeina xua tsipaebatsi xua Nacom tsipaeba.

¹⁸ Poxonae Cornelio pijimonae tatsi pata baxota, pin jumetha namchi, jeye: “¿Incane Simón pon icha wɯn ‘Pedro’ baraichi? ¿Baxota bara ecara?” jei.

¹⁹ Awiya came Pedro baxua yabara nanta xeinequiya xua pocotsiwa bapon tane. Nexata bapoxonae Nacom pia Pejumope tɯnaxɯ tatsi Pedro baraichi, jeye: “Pedro, nejume taema. Acoibi poyobe pebiwi cawenawenei tsompae.

²⁰ Nontaponde nainya ira bedunatabareinca. Barapomonae naponde, beitatema napontabare, yaitama barapomonae itoroban”, jeichichi Pedro.

²¹ Bara nexata Pedro ira bedunatabareca. Pedro barai barapomonae, jeye:

—Apara bara xan, po jiton xua pana newenawenei tsompae. ¿Eta xua metha papatame? jei.

²² Barapomonae Pedro jume notatsi, jeye:

—Papatan yaitama Cornelio, pon soldadomonaē pia pentacaponaein tatsi, bapon pana itoroba. Barapon pejuṁtṁ coyene xanepanaein. Barapon Nacom jume cowṁntatsi. Irṁṁ daxita judiomonaē barapon barṁ cui itura jineibatsi yawa antobetsi. Pinae Nacom pia matatsunpin tatsi Cornelio itorobatsi Simón Pedro wabare nejume taenexa tsane jei pinae, jei barapomonaē, xua Pedro tsipaebatsi.

²³ Nexata Pedro waba barapomonaē xua petamaitenaewa tsainchi barapo botha. Icha matabitha piawa xaxainta xua caponaena. Bapoxonaē Pedro napona barapomonaē. Irṁ ichamonaē naponano, pomonaē irṁ Jesús pejume cowṁntsiwi tatsi, pomonaē xua ena Jope tomaratha.

²⁴ Icha matabitha pata Cesarea tomaratha. Baraxota Simón Pedro ewatatsi. Cornelio pia matabṁṁyomonaē pewabixae barṁ ewateca, yawa pia jiwi tatsino.

²⁵ Poxonaē Pedro Cornelio pia botha tapatopatsi, Cornelio Pedro jacobatsi. Bapoxonaē Cornelio Pedro peitabaratha pentabocototha tauncuatsi, pewṁnaē jainchinexa tsainchi Pedro.

²⁶ Ichitha Pedro, Cornelio asiya cuaranotsiya baraichichi, jeye:

—Cornelio, nontaponde. Saya apara xan pebin naexanan icha xam ichim barichin apara, jei Pedro.

²⁷ Poxonaē Pedro natsipaebiya jonyabe, baxota Pedro pin bicheito tane xua nacaetuta.

²⁸ Nexata Pedro barai barapomonaē, jeye:

—Bara bayatha payaputaneme xua waxainchi judiomonaē jiwichi wacui coyenewa xeinatsi

xua jopa nacui yabara copatichi xua wabarũ nacaetuteibiwa pomonae jopa judiomonae naexanaeyo. Mataũtano jopa nacui yabara copatichi xua pia bonthano waponeibiwa. Ichitha Nacom aunxuae necuiduba xua pinae jopa bewa ichamonae catsapiwi jaintin tsane.

²⁹ Daxota bichoina patopan yaitama pinae pana wabame. ‘Bara’, jopa janyo. Methaunxuae paca yainyabinchi: ¿Eta xua metha pana tsiwabame? jei Pedro.

³⁰ Nexata Cornelio, Pedro jume notatsi, jeye:

—Petain cuatro po matabibe tsuxubi, quiripitha xote tabohta poxonae yabara nainbotan xua Nacom tsipaeban barapoxonae matatsunpin jemeicha tabohta patopa. Barapo matatsunpin paparua nama xatata po paparua bichocono daedaena.

³¹ Matatsunpin nebarai: ‘Cornelio, bayatha Nacom cajume tane poxonae tsipaebame pexainya beya. Cacui taneno xua yaweneibame peacopeibiwi daxota Nacom cayabara nanta xeina’, jei.

³² Nebaraino: ‘Ichamonae Jope tomara be itorobiyama, pewabinexa tsainchi pon ainya wũnbe pexeinaein. Bapon Simón baraichi, yawa Pedro baraichi. Pedro eca ichũn Simón pia botha tatsi, pon Simón pon seicaya duwein peboco wũnaeteibin. Barapon Simón mar mene itapatha yabo uncua’, nejei.

³³ Daxota nainya itoroban ichũnbe acoibi poyobe yaitama apara cawabatsi. Barabũ patopame. Daxita paxan xote Nacom peitabaratha pajinoman. Mataũtano paca ewatatsino tsipei yaitama

tha paca jume taetsi xua Nacom, pon Pecanamataxeinaein, cana cajume itoroba, jei Cornelio.

Meje yabara poxonae Pedro pin diwesi paeba Cornelio pia botha tatsi

³⁴ Pedro barapomonaetha namchi, jeye:

—Anoxuae yaputan xua Nacom jopa cana exanaeyo jiwi xua ichan ainya cui xua beyacaincha ichan. Nacom daxita jiwi tsita najupatsi.

³⁵ Daxita nacuantha pomonae xua Nacom wunae jaintatsi xuano xanepanaya exanano, Nacom antobe barapomonaetha.

³⁶ Bayatha payaputaneme xua Nacom Pejume Diwesi nacariwesi itoroba paxantha pomonae Israel pia pemomoxi susato jiwi tatsi panxaein. Barapo pexeinya diwesi jume jantema jinompa pana exana poxonae Jesucristo pajume cowantan. Nacom Jesús Pecanamataxeinaein exanatsi daxita carepaya jiwi nexa.

³⁷ Paxam bara payaputaneme xua Juan Jesús yabara cueicueijeichi yawa bautisaba jiwi Galilea nacuatha. Bapoxonae iruru Jesucristo tamropata pitaba xua cueicueije Galilea nacuatha yawa daxita Judea nacuatha.

³⁸ Matautano bara payaputanemeno xua Nacom cata pia peayapusu itorobi coyenewa, Jesucristo Nazaret tomarapin catatsi. Yawano Jesucristo nacana jumope tnanaxu catatsi. Bapoxonae Jesús daxita carepaya tomarantha popona ducua-naeta. Yawa axaibi exana ducua-naetano peatene jiwi. Yawa taitaweta ducua-naetano pomonae xua cauri pexeinaewi. Daxota bapon baxua beta exana Nacom pebaru poponaexae.

³⁹ Bayatha pacui tan daxita carepaya xua Jesús exana Judea nacuatha, Jerusalén tomarathano ichaxota jinompa judiomonae. Bapoxonae nama Jesús naetotha cobe matatabarutatsi, xua poxonae tupa exanadutatsi naetotha.

⁴⁰ Poxonae acoibi po matababibe tsuxubi Nacom petupaein equeicha asu exana. Matautano bapon pana netsita naituta exana.

⁴¹ Ichitha daxita jiwi jopa tsita naituta exanaetsi. Saya paxan pana netsita naituta exana. Nacom pana itapeta pia patayopichinexa ichamonaetha pocotsiwa Jesús exana xuano xua paebano. Paxan Jesús pabar naban, matautano pabar aranno poxonae equeicha asu popona.

⁴² Jesús pana itoroba daxita nacuantha pata paebinexa tsane Nacom Pejume Diwesi, xuano bapon pejume diwesino. Nacom cana exana, Jesu-cristo cana exanatsi be pon jiwi peyabara paebin penatsicuentsiwa xua abe peexanaexae. Bexa tsane Jesús daxita jiwi nanantaustiya jiwana torotsiya itawetsina, pomonae cataunxuae jinompa yawa pomonae bayatha werapano.

⁴³ Bayatha pomonae Nacom pia peitorobi jume pepaebiwí Jesús pejume diwesi paeba. Barapomonae namchi: 'Daxita pomonae Jesús pejume cowantsiwichi barapomonae Nacom yabara jantemainaena abe pia peexanae cuiru coyenein tatsi Nacom pia peayapuswathaxae', jei barapomonae, jei Pedro.

Meje yabara poxonae pomonae jopa judiomonae naexanaeyo pejunt coyeneintha tapatatsi Nacom pia Pejumope twnax tatsi

⁴⁴ Poxonae cataunxuae Pedro cueicueijei, baroxonae Nacom pia Pejumope t̃nax̃ tatsi tapatatsi pomonae jume tane xua Pedro paeba.

⁴⁵ Judiomonae, Jope tomarapiwi, pomonae pejume cow̃ntsixae Jesucristo, barapomonae Pedro puna poinchi. Barapomonae daxita yabara naj̃nt̃ coyene cabenaeca xua ir̃ barapomonae pomonae jopa judiomonae naexanaeyo ir̃ pej̃nt̃ coyeneintha taenatsi Nacom pia Pejumope t̃nax̃ tatsi.

⁴⁶ Judiomonae yaputane xua bara xaniwaicha Nacom pia Pejumope t̃nax̃ tatsi tapatatsi pomonae jopa judiomonae naexanaeyo. Yaputane tsipei barapomonae barompaya tsanaya icha jumeintha cueicueijei. Ichitha barapomonae jopa xapain najume copi yaputaeyo. Judiomonae jume taneno xua pomonae jopa judiomonae naexanaeyo Nacom w̃nae jaintatsi.

⁴⁷ Pedro namchi, jeye:

—Barapomonae apara Nacom pia Pejumope t̃nax̃ tatsi xeina icha waxainchi ichichi. Jiton dapon aibi pon jeye: ‘Jopa bewa bautisabi, apara pomonae jopa judiomonae naexanaeyo’, xua pon pejeiwa, jei Pedro.

⁴⁸ Pedro cui itoroba judiomonae. Pedro namchi, jeye: “Pabautisabare barapomonae pomonae jopa judiomonae naexanaeyo. Jesucristo pew̃n paw̃n taibare poxonae pabautisabame”, jei Pedro. Baroxonae pirapae barapomonae, pomonae xua aena taenatsi Nacom pia Pejumope t̃nax̃ tatsi, Pedro apusiwatsi xua jopa warapae tsane yawa xua caeto ab̃ ecaenano.

11

Meje yabara poxonae Pedro diwesi tsipaeba pomonaetha pomonae Jesús pejume cowantsi jiwi Jerusalén tomaratha

¹ Jesús pia peitorobi jiwi tatsi iruru pomonae pejume cowantsiwi Jesús, pomonae ena Judea nacuatha, barapomonae daxita jume tane xua iruru pinae pomonae jopa judiomonae naexanaeyo bayatha jume cowanta Nacom Pejume Diwesi.

² Poxonae Pedro Jerusalén tomara bewarapiya, judiomonae pomonae xua jume cowanta xua ainya cui Jesús pejume cowantsi jiwi tatsi pewi thabiwa tsainchi, barapomonae Pedro jume daunweya tsipaebatsi.

³ Pedro baraichi, jeye:

—¿Eta xua metha barapomonae siwa poname pomonae jopa judiomonae naexanaeyo? ¿Eta xua metha naxaneme barapomonaetha? jei judiomonae.

⁴ Nexata Pedro diwesi eetapona xua cueicueije barapomonaetha. Po diwesiin eetapona, barapo diwesiin xua poxonae siwa pona pomonae jopa judiomonae naexanaeyo. Pedro namchi:

⁵ —Poxonae Jope tomaratha Nacom tsipaeban, pin paparuwa tan be poxonae camaitan. Barapo paparuwa peitaboco weruneica be pematontha nantiya yacaincha opi queraba. Taxainya dunica.

⁶ Barapo paparuwatha tan xua bobena. Baraxuan tan xua saya pecobetha pona be cawayun. Baraxuanno tan xua saya petaxutha bobenapona

be maquibun. Baraxuanno tan xua saya petompacuetontha bobenapona be jomon. Baraxuanno tan xua saya yapupuna be peyapupunaewi.

⁷ Peitabocotha jume tan xua nebarai: ‘Pedro asiya uncuatabare. Pon xua ichichipame, pire. Moya bexore. Yawa xaema’, nejei.

⁸ Jume notan nexata: ‘Bara, bayatha apara jopa bapana camatsawan xaeinyo xua tamonae jopa copatsiyo xua pexaewa’, jan.

⁹ Equeicha peitaboco wenebaraichica: ‘Xua Nacom catsijainya exana, baxua jopa camatsawa jaintocuaetsi’, nejei.

¹⁰ Acoibi po jumeyobe nebarai. Saya ɯ barapo jumethabe nebarai. Bapoxonae paparuwa equeicha peitaboco beicha caibe caicha.

¹¹ Paparuwa caibe juinya, irɯɯ pebiwi acoibi poyobe patarɯ. Bapoyobe Cesarea tomarapiwi, taxantha pata. Barapo acoibi poyobe, pomonae Cornelio itoroba.

¹² Nacom pia Pejumope tɯnaxɯ tatsi nebarai: ‘Napuna ponde. Beitatema pontabare’, nejei. Irɯ nebarɯ pona seis poyobe Cesarea tomara beya pomonae pejume cowɯntsiwi Jesús. Pajojonian Cornelio pia botha tatsi.

¹³ Cornelio pana netsipaeba xua pinae pia botha tapatopatsi matatsunpin. Matatsunpin namchei: ‘Pebiwi Jope tomara beitorobiyama, pewabinexa tsainchi pon xua ainya wɯnbe xeina, Simón yawa Pedro.

¹⁴ Barapon Simón Pedro paca tsipaebina Jesús pejume diwesi, paca necayawa capanenebiyaenexa tsane Nacom’, jei pinae matatsunpin poxonae pinae Cornelio tsipaebatsi,

jei Pedro barapomonaetha.

¹⁵ Pedro equeicha namchi:

—Poxonae Jesucristo pejume diwesi paebaxoyan Corneliobarutha, barapoxonae Nacom pia Pejumope t̃nax̃ tatsi tapatatsi barapomonaetha. Icha cain painta ichi, barichi pomonaetha Nacom nacana jumope catsiba.

¹⁶ Bapoxonae nantana pitaban Jesús pejume, poxonae pana barai: ‘Juan saya ̃ meratha bautisaba. Ichitha Nacom seicaya barompaya pia cuitha paca bautisaba. Ichitha Nacom seicaya barompaya pia cuitha paca bautisabina. Bapoxonae painya j̃nt̃ coyeneintha pacata patsina Nacom pia Pejumope t̃nax̃ tatsi’, jei Jesús.

¹⁷ Xaniwaicha beta yaputan xua Nacom nacana jumope t̃nax̃ cata barapomonaetha pomonaetha jopa judiomonaetha naexanaeyo, icha cain ichi poxonae Nacom nacana jumope t̃nax̃ cata pata xantha poxonae Jesucristo pajume cow̃ntan. Daxota Nacom jopa cui yancatabinyo poxonae ichichipa exana barapomonaetha, jei Pedro.

¹⁸ Poxonae Jesucristo pejume cow̃ntsi jiwi, pomonaetha ena Jerusalén tomaratha, poxonae baxua jume taer̃c̃pa moya umenar̃c̃pa. Matautano Nacom w̃nae jaintatsino. Barapomonaetha namchi, jeye:

—¡Maisa w̃nae, ir̃ Nacom nacana cui cata pomonaetha pomonaetha jopa judiomonaetha naexanaeyo xua barapomonaetha pejume cow̃ntsiwa tsaner̃ Jesús, yawa xua j̃ntema pejinompraewa tsaner̃! Baraxua Nacom ichichipa xua barapomonaetha naj̃nt̃ cui coyene barapenta xua abe, petaxeinaenexa tsainchi peaj̃nt̃yarus̃wa, po

peajuntayapusuwa xua jopa weraweracaeyo, jei barapomonaе.

Mejeyabara poxonaе Jesús pejume cowantsi jiwi tatsi jinompa Antioquía tomaratha

¹⁹ Jesucristo pia pejume cowantsi jiwi tatsi ducupa, tsipei peanaepanaewi yotaba, poxonaе po matabitha Esteban bexotsi. Barapomonaе tsanarucupa, ichun Fenicia nacua beya, ichun Chipre nacua tunaeto beya, ichun Antioquía tomara beya. Barapomonaе saya judiomonaetha cueicueijeі Jesucristo pejume diwesi.

²⁰ Ichamonaе, pomonaе pejume cowantsiwi Jesús, Chipre nacua tunaetopiwi, Cirene tomarapiwino, barapomonaе Antioquía tomaratha pata. Daxita barapomonaе tsipaeba pomonaetha pomonaе jopa judiomonaе naexanaeyo Jesús pejume diwesi tatsi pon jiwi pia Pecanamataxeinaeinchi.

²¹ Barapomonaе yawenatsi nawita Nacom pia peayapusuwa tatsi. Daxota pin bicheito pomonaе jopa judiomonaе naexanaeyo, barapomonaе jume cowantatsi Jesús, pon jiwi Pecanamataxeinaeinchi.

²² Jerusalén tomaratha, Jesucristo pejume cowantsi jiwi tatsi, barapomonaе, jume tane xua Antioquía tomarapiwi jume cowanta Jesucristo pomonaе jopa judiomonaе naexanaeyo. Daxota Bernabé Antioquía tomara beitorobiyatsi.

²³ Poxonaе Bernabé Antioquía tomaratha patopa be ita cui wunaetsi xua Nacom yawena barapomonaetha. Bapoxonaе Bernabé juntu coyene weiweina. Bernabé barapomonaе barai,

jeye: “Paajuntũcoyenyapũya jinompare Nacomtha. Mataũtano Nacom ajuntũyapũya pajume cowũntarõnde”, jei Bernabé.

²⁴ Bernabé pejuntũ coyene xanepanaein. Bapon juntũ coyene yũcatsi Nacom pia Pejumope tũnaxũ tatsi tsipei daxita i daxuan exana pocotsiwa Nacom itoroba. Mataũtano bichocono Nacom jume cowũntatsi. Daxota pin bicheito jume cowũnta Jesús, pon jiwi Pecanamataxeinaeinchi.

²⁵ Nexata Bernabé Tarso tomara bewarapiya, pewanaweneinexatsi Saulo.

²⁶ Poxonae Saulo caxinatsi baxota, Antioquía tomara bebarũ warapiyatsi Saulo. Baraponbe cae wei naecabe baxota, cuidubabe pin bicheito xua Jesús pejume diwesi. Baraxota jiwi matha Jesús pijimonae tatsi wũn dutatsi xua Antioquía tomara piwi wũn duta xua jeye: “Cristobarũmonae”, jeichichi barapomonae pomonae Jesús pijimonae tatsi.

²⁷ Poxonae Bernabé irũ Saulo cataunxuae cuidubapõnabe Antioquía tomaratha, Nacom pia peitorobi jume pepaebiwi baxota pata, Jerusalén tomara werendena.

²⁸ Bara caein jiwana pewũn Agabo. Agabo asiya uncua barapõnaetha. Bapon wũnae tsiwanaya paeba. Agabo yaputane exanatsi Nacom pia Pejumope tũnaxũ tatsi. Agabo namchi, jeye: “Bexa tsane daxita carepaya nacuantha jainbo tsane”, jei Agabo. Baraxua xainyei poxonae jũmba matha Claudio romanomonae itorobiya pia pepa peewatsinchi tatsi naexana, bapoxonae pin jainbo tsurucuae.

²⁹ Daxota Jesús pejume cowũntsiwi tatsi,

pomonae ena Antioquía tomaratha, ichipa yawena pomonae iru pejume cowantsiwixae Jesús pomonae peenaexae Judea nacuatha. Daxota barapomonae pomonae Jesús pejume cowantsiwixae peburaya nanta xeina xua paratixi taitorobina. Daxita barapomonae carepaya paratixi cata be xua po coyene cobe itacupatsi xua pecatsiwa.

³⁰ Barapomonae baxua exana. Barapo paratixi Bernabé iru Saulo caitorobatsibe pitiri jiwi nexa xua Judea nacua beya.

12

Meje yabara poxonae Santiago bexotsi iru xua poxonae Pedro jiwi pecubi botha capoinchi

¹ Barapoxonae Herodes pon Judea nacuapiwi peyanacua ewatsinchi, bapon tamropata pitaba xua pomonae Jesús pejume cowantsiwi tatsi peraxa exanatsi.

² Herodes itoroba pia jiwi, xua pin cusitha Santiago pebexubiwatsi, pon Juan peweicho tatsi.

³ Herodes jume tane xua judiomonae tsita xanepanatsi xua Santiago bexotsi. Daxota Herodes cui itoroba piamonae xua Pedro pewaetabiwatsi xua pecaponaenexatsi jiwi pecubi botha. Baxua exana poxonae Pascua wan matababintha poxonae jiwi pan xane po pan xua jopa xeinaeyo levadura xua pocotsiwa cotowa exana.

⁴ Poxonae Pedro jiwi pecubi botha eca, soldadomonae yapucaumena, Pedro yapucaumeinchi. Soldadomonae, cuatro po bicheito matabuxuyobe. Cae matabuxuyobe xeina be cuatro

pojobe. Be cae matabuxuoyo tamroropatapona poxonae yacaincha umeneibatsi Pedro. Herodes yabara nanta xeina xua peexanaewa tsane xua Pedro pin bicheito peitabaratha cuaranotinchi pepa tomaratha poxonae Pascua wun maticabin yapu caewina.

⁵ Awiya came Pedro jiwí pecabi botha eca. Ichitha Jesús pejume cowantsiwichi jume daunweya wuca Nacom, Pedro tawacatsi.

Meje yabara poxonae Nacom, Pedro capanepatsi jiwí pecabi bo weya

⁶ Herodes merawi nanta xeina xua baya tsane Pedro cuaranotinchi pepa bicheitha peitabaratha. Barapo merawitha, abucataunxuae Pedro nantiya cobe nain camaituncuatsibe soldadomonaepinbe. Iru soldadomonaepinbe yacaincha uncuabe jiwí pecabi bo boupa.

⁷ Caena nainya Jesús pia matatsunpin tatsi Pedro tsita naitutatsi. Jiwí pecabi botha pin coicha pentha tsuxubi bichocono. Matatsunpin Pedro yaubaxotsi. Nexata Pedro nacosataxuba. Matatsunpin namchi, jeye: “Pedro, nanainya nonta ponde”, jei matatsunpin. Bapoxonae Pedro nantiya cobe nain jopeicabe iratha.

⁸ Bapoxonae matatsunpin Pedro baraichi, jeye: “Coreinya bocoto bichocono nacoto epa catutabare. Nainya nataxu xatare jinya nenataxu xatatsiwa”, jei. Baraxua Pedro exana. Equeicha matatsunpin namchi, jeye: “Pire jinya camisa po paparuwa xua nainya weruyame. Antha nepuna ponde”, jei matatsunpin.

⁹ Nexata matatsunpin Pedro pecoiboto bepuna joniya, pesato beya. Ichitha Pedro xapain jopa naita cui coyene taeyo xua jiwí pecabi bo wepuna joniya matatsunpin. Saya nanta xeina be amachinae.

¹⁰ Pedro iru matatsunpin xenta jonyabe soldadomonaepin pon yacaincha uncuá ichaxota Pedro etatsi. Bapoxonae equeicha icha soldadomonaepin xenta jonyabe pon ewatuncua pepa boupa xua pesatotha. Pedro iru matatsunpin peboupa penainwa xua peyacaincha dutsiwa bara wejonyabe tomara beya. Barapo boupa jemeicha nacoibo yausaranaxuba. Pedro matatsunpinno namtotha ponabe. Poxonae icha namtotha patopabe bapoxonae jemeicha matatsunpin Pedro cuenta aichurucuaetsi tomara namtotha.

¹¹ Barapoxonae Pedro xaniwaicha naita cui coyene tane. Bapon nabarai, jeye: “Bara yatsicaya xainyei Jesús pia matatsunpin inta itoroba tsipei metha bepa necapanepae Herodes pia xainya weya tatsi xuano xua judiomonae pia xainya weya tatsi, pomonae ichichipa abe inta peexanaewa”, najei.

¹² Poxonae baxua nacui cananta xeina, Pedro pona María pia bo tatsi beya. Bapowa Juan pena tatsi. Juan icha wun xeina, Marcos. María pia botha tatsi pin bicheito nacaetuta pewunqueibinexa Nacomtha. Baxota Pedro patopa.

¹³ Pedro curara coiboto dadacata. Yabuyo powa pewun Rode muxu naya pia yaputaetsi pon patopā.

¹⁴ Poxonae barapowa Pedro jume copi tainchi xua wawai abu jopa saranaxubiyo peboupa.

Bapowa bichocono jantũ coyene weiweina daxota caibe cuinaya piamonae tsiwũn caya. Namchi:

—Pedro curara coibototha uncua, jei Rode.

¹⁵ Barapomonae namchi, jeye:

—¡Apara camatayaiba! jei.

Equeicha bapowa jume nota, jeye:

—¡Babara xainyan, Pedro bapon yatsicaya! jei.

Equeicha barapomonae jume nota, jeye:

—Metha apara Pedro pia matatsunpin tatsi, pon yantatsi, jei.

¹⁶ Awiya came Pedro peboupa dacadacatuncua. Poxonae barapomonae peboupa saranaxoya, Pedro yabara najantũ coyene benaecaeya tainchi.

¹⁷ Pedro pecobetha moyã jume matawenta. Cotacaya Pedro diwesi tsipaeba barapomonae xua bayatha capanepatsi jiwi pecubi bo weya, xua Jesús capanepa pon jiwi Pecanamataxeinaeinxae tatsi. Pedro namchi, jeye:

—Barapo diwesi Santiago patsipaebare irũ ichamonae patsipaebare pomonae Jesús pejume cowantsiwi tatsi, jei Pedro.

Barapoxonae Pedro icha namto be-iyã.

¹⁸ Poxonae baya penta tsina soldadomonae nabenaenompa tsipei jopa yabara yaputaeyo po coyene xua Pedro aichurucuae.

¹⁹ Herodes soldadomonae itorobatsi xua jei-tatsi Pedro. Ichitha jopa Pedro taebichi. Daxota Herodes cana exana xua barapo soldadomonae

natsiaenae cuenta pepanepaexae Pedro. Barapoxonae Herodes icha soldadomonae cui itorbatsi xua barapo soldadomonae jutebinchi. Barapoxonae Herodes Judea nacua wewarapiya, Cesarea tomaratha pepoponaenexa.

Meje yabara poxonae Herodes tupa

²⁰ Herodes pon Judea nacuapiwi peyanacua ewatsinchi, bapon Tiro tomarapiwi casebatsi iru Sidón tomarapiwino casebatsi. Bequein bayatha copiya Herodes itoroba pexaewa barapo tomarabe nexa ichitha anoxuae jopa daichiyo poxoru Herodes caseba barapo tomarapiwibe. Daxota Sidón tomarapiwi iru Tiro tomarapiwino itoroba pebiwi pesiwa ponaenexa tsainchi Blasto pon peainya cui jiton xua Herodes pon tanacuitatsi. Barapomonae ichichipa xua Herodes xaniwaicha caewa be piamonae exana, daxota barapomonae Blasto tsipaebatsi xua barapomonae peyabara jume yawenaenexatsi xua poxonae petsipaebinexatsi Herodes.

²¹ Daxota Herodes wun duta, barapo matabi, po matabitha xua Herodes siwa ponaeinchi barapomonae. Poxonae matabi tsuxubiba barapo matabitha Herodes pia paparuwa nama xatataba po paparuwa tsobia, pocotsi paparuwan nama xataba pentacaponae wi. Bapoxonae pia peecaewatha eca. Herodes piamonaetha tsipaeba.

²² Nexata barapomonae wawai Herodes baraichi, jeye: “¡Apara xua bapon paeba, jopa be pebinyo, apara bara nacom tsecae!” jei barapomonae.

²³ Bara caena bapoxonae Nacom pia matatsunpin tatsi Herodes iratha xotsi. Iratha xotsi yaitama bapon jopa Nacom baru cui itura jinaetsi poxonae pia coya Nacom naexana. Oro unu caewita poinchi. Jana caewita poinchino. Tsapita poinchino. Herodes tupaanaicha.

²⁴ Pomonae xua jume cowanta Jesús, barapomonae tajua tsipaebapona Nacom Pejume Diwesi daxita nacuantha. Daxota daxita pinmonae jume cowantatsi Jesús.

²⁵ Poxonae Bernabé Saulono nacui wetabe baxua, Jerusalén tomara wewarapiyabe. Antioquía tomara bewarapiyabe. Juan Marcos baru warapatsi.

13

Meje yabara poxonae Bernabé Saulono Nacom Pejume Diwesi caponabe

¹ Baraxota Antioquía tomaratha jiwana jinompa pomonae pejume cowantsiwi Nacom pomonae Nacom pia peitorobi jume pepaebiwi iru pomonae jiwi pecuidubiwi Moisés pia peitorobi coyene. Barapomonae meje: Bernabé iru Simón pon icha wunno, Negro baraichi, iru Lucio Cirene tomarapin ecaru. Iru Saulo ecaru. Iru Manaén ecaru, pon Herodes bayatha caepinbe naexanabe xua nacuara wichaba ponabe. Herodes Galilea nacuapiwi peyanacua ewatsinchi naexana.

² Caentacabi, poxonae barapomonae Nacom pejume coyene canatsipaeba exana, yawa yabara nainbota, barapoxonae Nacom pia Pejumope tunaxu tatsi barapomonae tsipaebatsi, jeye:

“Paitorobare Bernabé, Saulono, petsipaebinexa tsanebe Nacom pia pexeinya jume diwesi tatsi po penacuichiwa baponbe bayatha tsiwabanbe”, jei Nacom pia Pejumope tɨnaxɨ tatsi.

³ Nexata poxonae xua Nacom wɨca najume weta, xuano poxonae weta xua yabara nainbota, barapoxonae Bernabé Saulono pecobetha mataboco jayabatsibe. Bapoxonae napeyabatsibe.

Meje yabara poxonae Nacom pia peitorobi jiwi tatsi, Nacom pia diwesi tatsi cueicueijeji Chipre tunaetotha

⁴ Bapoxonae Bernabé Saulonɨɨ itorobatsibe Nacom pia Pejumope tɨnaxɨ tatsi. Seleucia tomara bewarapiyabe. Bapoxonae ponabe jeratha po naetha po nae pin nae, petunaeto beya. Barapo tunaeto pewɨn Chipre.

⁵ Poxonae patopa Salamina tomaratha, Nacom pia pexeinya diwesi tatsi cueicueijeji judiomonae pia penacaetutsi bontha tatsi. Juan Marcos bichi naponna Bernabé Saulono peyawenaenexatsi.

⁶ Barapoyobe daxita barapo tunaeto matawacaicha enapona petsipaebinexa Nacom pia pexeinya jume diwesi tatsi. Bapoxonae Pafos tomaratha pata. Barapo tomaratha bapoyobe caxinabe judiomonaepin pon pewɨn Barjesús. Bapon Barjesús mara pexeinaein, pon saya naeraba paeba. Bapon Barjesús namchi, jeye: “Xan tacueicueijein Nacom nexa”, jei.

⁷ Barapon napuna poneiba pontha pon Chipre tunaetopiwi peyatunaeto ewatsinchi ponxae pewɨn Sergio Paulo. Bapon Sergio Paulo peyaputaein. Bernabé Saulono wabatsibe pia

jume taetsibe xua Nacom Pejume Diwesi tatsi pepaebiwa.

⁸ Barapon pon mara pexeinaein icha w_{un} xeina, griego jume, “Elimas”, baraichi. Bapon Bernabé Saulono jume yancatabatsibe, tsipei jopa ichipaeyo xua Sergio Paulo jume cow_{ants}ina Nacom Pejume Diwesi.

⁹ Nexata Saulo, pon icha w_{un}xae Pablo, Nacom pia Pejumope t_{un}ax_u tatsi j_{un}t_u coyene y_ucatsi. Pablo bichocono pexainya beya tane.

¹⁰ Pablo barai, jeye:

—¡Barjesús, xam pon jiwi nemuxuitorobeibin, abe neexanaein, cauri pexantom, daxita xua pew_{una}ewan neaichaxaibim! ¿Eta xua daichim jiwi cui yancababeibame xua pejume cow_{unte}iwiwa Jesús, pon jiwi Pecanamataxeinaeinchi?

¹¹ Bara anoxuae Nacomtha natsiaenae cuentsiname. Daxota caitacuere piontababa. Jopa caeto pesato taem tsane, beya poxona matapainya Nacom copatsina xua netaewa tsane, jei Pablo.

Bapoxonae Elimas nainya itata quirei. Bapon ichawa beya ich_{un} nacobena jayaba, pecobe caponaenexatsi peitata nac_utsinxae.

¹² Poxonae Sergio Paulo baxua tane bapoxonae bapon Nacom jume cow_{unt}atsi tsipei tsita w_{un}aetsi pocotsiwa Pablo Bernabeno yabara cuidubabe Nacom pon jiwi Pecanamataxeinaeinchi.

Meje yabara poxonae Bernabé Pablono Antioquía tomaratha ecabe xua Pisidia nacuattha

¹³ Pablo ir_u pijimonae tatsino Pafos tomara we-warapiya. Perge tomara be-iyiya jeratha, po nae

pin nae. Perge tomaratha pata, Panfilia nacuatha. Barapo nacuatha daxita barapomonae Juan Marcos w_u pona. Barapoxonae Jerusalén tomara be-warapiya.

¹⁴ Nexata Pablo ir_u pijimonae tatsi Antioquía tomara be-iyiya. Barapo tomara Pisidia nacua nacacuita ecabe. Barapo matabitha, po matabitha pentaquei seicae matabitha, judiomonae pia penacaetutsi botha tatsi pata, yawa enoundeca.

¹⁵ Baraxota ich_un yoroba Moisés pia peitorobi coyene diwesi tatsi. Yawa yoroba xua Nacom peitorobi jume pepaebiwí paeba. Bapoxonae poxonae najume weta pentacaponawí, pomonae peyabara umenawí penacaetutsi bo, barapomonae Pablo wabatsi ir_u piamonae tatsi wabatsi. Barapomonae jeye:

—Pata tajiwiwimonaem, icha paxei name diwesi, po diwesi xua barapomonae peju_{ntu} coyene tsacabiwatsi xua ju_{ntema} pejinompaewa nexa barapomonae pomonae xote ene, bara moya papaebare barapo diwesi, jei barapomonae.

¹⁶ Nexata Pablo asiya uncua. Pecobetha jume matawenta xua moya peenaenexa. Pablo barai, jeye:

—Incane pajume taema, israelmonae pam, ir_u paxamno pomonae Nacom abe paca necaexanaeyainwa pam xua icha abe paexaname, pomonae judiomonae jopa naexanaeyo pam.

¹⁷ Wamo susato jiwi, pomonae Israel piamonae, barapomonae Nacom cana exana xua barapomonae nayoyotapona beya xua pin

bicheito naexanapona, poxonae cataunxuae Egipto nacuatha jinompa. Nacom itapeta waba barapomonaе, xua petanaexanaenexatsi pijimonaе jiwana tatsi. Daxota Nacom pia peayapusuwatha wamo jiwi capanepatsi Egipto nacua weya.

¹⁸ Wamo jiwi ira xuepana susato tsurucuae nacua beya warapa cuarenta po weibe. Nacom yaweneiba barapomonaе bequein barapomonaе abe exaneiba cuarenta po weibe.

¹⁹ Wamo susato jiwi tsimaxu dubatsi Nacom poxonaе jutebatsi Canaán nacuamonaе. Nacom caewitaxuba Canaán nacuamonaе siete po bicheito matabuxuyobe. Wamo susato jiwi barapo ira xuya catatsi, Nacom cata.

²⁰ Daxita baraxua Nacom exana barapomonaetha cuatrocientos cincuenta po weibetha.

“Bapoxonaе Nacom jiwana cana exana pomonaе jiwi peyabara paebiwichi xua penatsicuentsiwa xua abe peexanaexae pentacainompaenexa tsane barapomonaе. Nacom baxua exana beya poxonaе pon pewu Samuel popona pon Nacom pia peitorobi jume pepaebin.

²¹ Nexata israelmonaе Nacomtha wuca pon be yatsicaya barapomonaе barompaya itorobiya pia pepa peewatsinchi tatsi tsane. Daxota Nacom taexana barapomonaetha pon pewu Saúl, Cis pexanto tatsi, pon Benjamín pia pemomoxi susato jiwana tatsi. Bapon Saúl, pon jiwi itorobiya pia pepa peewatsin naexana cuarenta po weiyobe.

²² Bapoxonaе Saúl cui matawentatsi Nacom abe peexanaexae. Equeicha exana ichu pon

jiwi itorobiya pia pepa peewatsinchi, pon pewun David. Nacom yabara jume jei David: ‘David tan, pon Isaí pexanto. David netsita juntu coyene xanepana yawa wunaexanano. David itapeta exanaena daxita pocotsiwa ichichipan’, jei Nacom.

²³ David pia pemomo susato jiwana tatsi, bapon pewun Jesús. Jopa cain bayatha Nacom Pejume Diwesi paebi penamchixae Jesús capanepa Israel nacuamonae. Baraxua caena bayatha Nacom yabara tsiwanae muxu duta.

²⁴ Pewunaeya poxonae Jesús tamropata pitabina xua pecuidubiwa Nacom nexa copiya matha Juan daxita Israel nacuapiwi tsipaeba xua pinae bewa nacui barapentsina abe peexanae cuiru coyenein xua Nacom petsita xeinaenexatsi icha juntu coyenein, xuano xua bewa pinae nabautisabina.

²⁵ Poxonae Juan bara imoxoyo tupa, jeye: ‘Jopa daponyo xan, pon xua payabara nanta xeiname, pon Mesías baraichi. Cotacaya ichun patopaena xua pon nepuna patopaena. Pocotsiwa bapon exana bichocono ainya cui beyacaincha pocotsiwa exanan. Bichocono pin ura tsita xeinan xua daxota bewa jopa tataxu mu isanaxubiwa tsane pia penataxu xatatsiwa tatsi’, jei Juan”, jei Pablo.

²⁶ Equeicha Pablo jeye: “Tamonae pam, Abraham pia pemomoxi susato jiwi tatsi pamxaem, iruru pomonae Nacom abe paca necaexanaeyainwa pam xua icha abe paexaname. Nacom pacata itoroba barapo pecapanenebiyae diwesi jume po diwesi Juan yabara paeba.

27 Barapomonae pomonae Jerusalén tomaratha jinompa iru pia pentacaponae tatsi jopa Jesús yaitaetsi po coyene xua bapon apara Mesías. Matautano barapomonae jopa yaputaeyo xua bayatha Nacom peitorobi jume pepaebiwí yabara wunae tsiwanaya paeba xua bexa Jesús cana exanaeinchi. Pentaquei seicae matakabitha poxonae ichamonae yoroba po diwesi xua Nacom pia peitorobi jume pepaebiwí tina, judiomonae pia penacaetutsi botha tatsi barapomonae jopa yabara yaputaeyo barapo diwesi. Poxonae Jesús naetotha tɔparucua exanatsi, barapomonae nanta jɔpiya exana Jesustha icha be pocotsi coyeneya bayatha Nacom pia peitorobi jume pepaebiwí paeba.

28 Barapo judiomonae jopa xeinaeyo po coyeneya xua Jesús pebexubiwa tsainchi. Bequein Jesús jopa abe exanaeyo ichitha barapomonae Pilato wɛcatsi xua Pilato itorobina soldadomonae xua Jesús pebexubiwa tsainchi.

29 Barapomonae exana daxita po coyene bayatha xua Jesús yabara wunae tsiwanaya paebatsi Nacom Pejume Diwesitha. Barapoxonae Jesús pijimonae petɔpaein naeto wepichicatsi. Pijimonae mɛthɛtha xotsi petɔpaein pitapatororo mɛthɛtha.

30 Ichitha Nacom, Jesús equeicha caewa asu exanatsi petɔpae cuiru coyene weya.

31 Matha cain Jesús puna jinompeibatsi ichamonae poxonae Galilea nacuatha popona, Jerusalén tomarathano. Barapomonaetha equeicha Jesús tsita naituta ducuanaebiya ainya matakabi dapaein. Pomonae Jesús bayatha tsita naituta, barapomonae apara pomonae xua

anoxuae daxita tomaran tsipaeba dubenanaebiya Jesús yabara.

³² “Daxota paca tsipaebatsi Jesucristo pia pex-einya diwesi jume xua bayatha Nacom yabara tsiw_unae muxu duta wamo susato jiwitha.

³³ Baxua Nacom exana poxonae Jesús equeicha as_u exanatsi. Nacata exana poxoru waxainchi wamo susatopiwi pijimonaetsi. Icha be pocotsi coyeneya bayatha tina Nacom Pejume Diwesitha xua salmos penax_unae weixi diwesintha, po wei xua ichaxota ‘dos’, jei xua jeye: ‘Xam, taxantom, itawan caexanatsi bara’, jei.

³⁴ Nacom, Jesús as_u exanatsi, xua equeicha jopa pet_upaenexa tsane, xua equeicha jopa tsabanuncuae tsane. Daxota jei pejume diwesitha: ‘Paca catinchi xua bayatha David tayabara tsiw_unae muxu dutan’, jei.

³⁵ Daxota pon xua tina salmos penax_unae weixi diwesintha, barapo diwesintha Nacom baraichi: ‘Jopa copatsim xua nexanto petsabanuncuaewa tsane pon bichocono pej_unt_u coyene xanepanaein’, jei.

³⁶ Xainyei, David exana xua Nacom ichipa poxonae bar_u popona Israel nacuapiwi. David bayatha t_upa. M_uth_utha xotsi ichaxota pamo jiw_u tatsi yam_uth_u umena. Yawa bayatha tsabanuncua.

³⁷ Ichitha barapo pepon po pepon Nacom as_u exana, barapo pepon jopa tsabanaeyo.

³⁸ Tamonae pam, maisa bepaya bara yaputae-name Jesús po coyene xua bapon Jesús pacata cayawa t_upa abe painya neexanae cuiru coyenein xua daxota Nacom j_untemaina barapo abe painya neexanae cuiru coyenein.

³⁹ Tsipei Jesús tupa daxota daxita pomonae jume cowanta bapontha, Nacom juntu coyene wanaetsina. Bequein jiwi exana daxita pocotsiwa Moisés pia peitorobi coyenewatha itoroba, ichitha barapo coyenewa bapana jopa jiwi juntu coyene xanepana exanaetsi abe pia peexanae cuiru coyenein tatsi weya.

⁴⁰ Dota, icha metha jopa Nacom pajume cowantsipaem, bara paichim tsipae icha be pocotsi coyeneya bayatha pomonae Nacom peitorobi jume pepaebiwi yabara tina. Namchiya tina, jeye:

⁴¹ ‘Ja, jiwi pecui caponaemonae pam, bara pana nabenaecare, pawerapare. Xan, Nacom, anoxuae exanaein bichocono pepa pewanaewa poxonae cataunxuae pajinompame. Baxua xua exanan, jopa pajume cowantsim, bara bequein ichamonae paca tsipaeba’, jei Nacom”, jei Pablo.

⁴² Pablo, iru pia pepuna ponaewichi daxita barapoyobe judiomonae pia penacaetutsi bo tatsi wejojoniya. Pomonae baxota umena pomonae jopa yacuiya naexanaeyo xua judiomonae penaexanaewa, barapomonae Pablo wucatsi xua bepa pinae Pablo equeicha cuidubina po diwesi anoxuae paeba xua equeicha icha diwesi mataropeichiya cuidubina xua icha mataqueitha tsane xua pentaquei seicae matabitha.

⁴³ Poxonae najume weta Pablo iru Bernabé, puna poinchibe judiomonae iru pomonae jopa judiomonae naexanaeyo. Barapomonae Nacom jume cowanta nawita icha judiomonae ichi. Pablo Bernabeno tsipaebabe barapomonae:

“Nacom pajume cowanta dubenanaebiyama xua Nacom wnae pia pacata exanaenexa painya janta coyeneintha pia paca necaantobexae”, jeibe.

⁴⁴ Icha matabi, po matabitha pentaquei seicae matabitha, pin bicheito pomonae tomaratha ena, nacaetuta xua pejume taenexa Nacom pia pexeinya jume diwesi tatsi, pon Pecanamataxeinaeinchi jiwi.

⁴⁵ Ichitha poxonae judiomonae pinmonae necota, jume uwa tsipei pinmonae nacaetuta pejume taenexatsi Pablo. Pablo jume matawentatsi xua paeba yawa tsama jume baru paebatsino.

⁴⁶ Nexata Pablo Bernabeno tsipaebabe barapomonae. Jopa auriya paebiyobe. Jeibe:

—Bara xanepana xua copiya Nacom Pejume Diwesi paca tsipaebatsi pomonae judiomonae pamxaem. Daichitha, jopa bepajume taem barapo diwesi tsipei jopa paichichipaem xua painya nexainaewa peajantayapuswa po peajantayapuswa ataya tsiteca. Daxota anoxuae ichamonaetha pata tha ponaetsi pomonaetha pomonae jopa judiomonae naexanaeyo.

⁴⁷ Pata Tanecanamataxeinaein Nacom pana itoroba. Pana baraino, jeye:

‘Paca exanatsi xua painya neyawenaewa daxita pomonae jopa judiomonae naexanaeyo xua xanepanaeya pejinompaenexa tsane. Matautano paca exanatsi xua beta painya netsipaebinexa Nacom Pejume Diwesi daxita nacuantha, xua jiwi pecapanenebiyaenexa tsainchi Nacom abe pia peexanae cuiru coyenein weya tatsi’,

jei Nacom, jei Pablo.

⁴⁸ Poxonae baxua jume taerucupa, pomonae jopa judiomonae naexanaeyo, barapomonae bichocono juntu coyene weiweinarucupa, juntea jinompano. Pablo tsipaebatsi: “Nacom Pejume Diwesi jume xeica. Bichocono jume wanae”, jei. Daxita barapomonae jume cowanta pomonae Nacom cuita itapeta petaxeinaenexa tsainchi peajuntuyarusuwa, po peajuntuyarusuwa ataya tsiteca.

⁴⁹ Barapomonae pomonae Jesús pejume cowantsiwichi daxita nacuantha tsipaeba Jesús pia pexeinya jume diwesi tatsi, pon jiwi Pecanamataxeinaein.

⁵⁰ Ichitha judiomonae anaepana exana yabuxi powaxi Nacom cananta xeinatsi bichocono. Yawa pebiwi pomonae peainya cui jiwi, barapo pebiwi anaepana exanatsiru. Iru judiomonae Pablo Bernabeno abe yabara cueicueijeichibe, daxota daxita jiwi Pablo iru Bernabé casebatsibe. Barapo jiwi Pablo Bernabeno itawetaxotsibe pia nacua beya.

⁵¹ Nexata Pablo Bernabeno nataxu nunatababe tsoobo. Baxua exanabe petsita itapeinya xeinaenexa po coyene hapomonae abe exana poxonae jume itaweta Nacom Pejume Diwesi. Barapoxonae warapabe Iconio tomara beya.

⁵² Ichitha pomonae Jesús jume cowanta, barapomonae bichocono juntu coyene weiweina. Matautano barapomonae juntu coyene yucatsi Nacom pia Pejumo pe tuxaxu tatsi.

14

Meje yabara poxonae Pablo Bernabeno Iconio

tomaratha poponabe

1 Iconio tomaratha Pablo Bernabeno judiomonae pia penacaetutsi botha tatsi jonyabe. Beta paebabe daxota pinmonae Jesús jume cowanta. Judiomonae jume cowanta, iruru pomonae jopa judiomonae naexanaeyo jume cowanta Jesús.

2 Ichitha po judiomonae jopa Jesús pejume cowantsiwichi barapomonae cui tsacaba pomonae jopa judiomonae naexanaeyo cui tsacabatsi. Daxota barapomonae pomonae jopa judiomonae naexanaeyo abe yabara nanta xeina xua pomonae Jesús pejume cowantsiwi tatsi abe yabara nanta xeinatsi.

3 Pablo Bernabeno barapo tomaratha ecabe. Ainya matabi dapaein baraponbe ecabe baraxota. Nacom Pejume Diwesi jume daunweya cueicueijeibe Pecanamataxeinaein nexa. Baponbe Nacom cata pia peayapuswa peexanaenexabe pexeinya petsita itutsi coyenewan. Poxonae jiwi cui tane xua baponbe exanabe, barapo jiwi yaputane xua Nacom yawena baponbe, peantobexaetsibe.

4 Daxita jiwi tomaratha be ainya jiwibe natsababe. Ichamonae judiomonae ichichipa. Ichamonae Jesús pia peitorobi jiwi tatsi ichichipa. Daxota ainya bicheitobe nacana exanabe.

5 Nexata bapoxonae judiomonae iru pomonae jopa judiomonae naexanaeyo peburaya yabara jume baru nanta xeinaruara xua pentacaponae aewi paeba po coyene xua Pablo yawa Bernabé abe peexanaewa tsainchibe xuano xua ibotontha pecuinbabinexatsibe.

⁶ Poxonae Bernabé Pabloe jume taebabe nainya naetsirucuabe Listra tomara beya, Derbe tomara beyano. Barapo tomarabe Licaonia nacuatha ecabe. Matautano icha tomaran beya ponabe Pablo Bernabeno xua po tomaran ena barapo Licaonia nacuatha.

⁷ Barapo tomarantha cuiduba ducuaenaebiyabe Jesús pia pexeinya jume diwesi tatsi.

Meje yabara poxonae Pablo Listra tomaratha ibotontha cuinbabatsi

⁸ Listra tomaratha pebin popona pon pemabinchi, pon xua jopa peponaein. Bapon pexuyotha caena yawa naexaneca, xuano bapana jopa ponae.

⁹ Bapon pon pemabinchi Pablo jume tainchi xua pocotsiwa cueicueije. Pablo pemabinchi tane. Pablo nanta xeina, xua pon pemabinchi bara Nacom jume cowantatsi. Pablo nanta xeinataba xua axaibi peexanaewa tsainchi pon pemabinchi. Daxota bichocono Pablo naita cui duya bapontha beya.

¹⁰ Nexata Pablo jume daunweya barai, jeye:

—Asiya uncuare, jei.

Pon pemabinchi asiya uncuatabiya jirawana yawa nainya ponano.

¹¹ Poxonae Pablo cui tainchi barapomonae, jume daunweya wawai pin jumetha, Licaonia pijumetha tatsi:

—¡Nacombe be pebin juta tsecae waxainya berena patopabel jei.

¹² Barapomonae namchi: “Maisa Bernabé bara mexeya nacom tsecae, po nacom pewan Zeus. Iru

Pablo bara mexeya icha nacom tsecae, po nacom pewan Hermes”, jei. Barapomonaē bapo wan duta poxoru tsipei Pablo penantacapaēbin tsecae.

¹³ Irū barapo nacom Zeus pia sacerdotemon-aēpin xeinarū, pon Zeus wūnaē jainteibatsi pia penacaetutsi bo tatsitha. Barapo penacaetutsi bo uncua tomara coiboto juma weya. Barapo sacerdotēpin vaca pebton wiyaba pentonon pecaponaenexa Zeus pia penacaetutsi botha tatsi. Barapo tomarapiwi irū Zeus pia sacerdotēpin ichichipa jutēba vaca pebton petautsinexa xua petuxusi exanaenexa Pablo irū Bernabé nexabe pia Pablo irū Bernabé yabara nanta xeinabe barapomonaē xua barapomonaē bara pejuntū coyene xanepanaewi.

¹⁴ Bernabé Pablobe jume tanebe xua taex-anaeinchibe baxua barapomonaē. Bapoxonaē anaya nama paparuwa tsitsinaxubabe. Cuinaē-ponaya wawaibe poxoru aichaxaibibe xua baxua barapomonaē exanaena. Jeibe:

¹⁵ —¿Eta xua daxua pana canautame? Aparā saya jiwi panbe. Be paxam paichim bara paichinbe. Papatopanbe tsipei apara pata paca catsipaēbinexa tsainchi xua painya nenacui barapentsiwa tsane barapo coyenexi xua jopa pecui xanepanaewiyo. Maisa Nacomtha panantana pende. Barapo Nacom pon peantūcuiyapūsan, exana peitaboco, iranno, pin mēninno. Daxita xua xuanno yawa muxuna dubena tsiniya Nacom bayatha exana.

¹⁶ Wawūnaeya Nacom cui copata daxita nacuapiwi xua bara pejinompaenexa icha be pocotsi coyeneya ichichipa xua pejinompaewa.

Daxita jiwi pia cui nata exana saya.

¹⁷ Nacom xua pewnaewan nacopiniwa tsita ituba daxota jiwi naita cui coyene tane xua Nacom exana. Barapon Nacom apara pon ema pacata itorobica, pexuwiwanno paca tsijain exaneica catsicano. Pexaewa paca cata. Paca juntu coyene weiweina exana, jei.

¹⁸ Bequein Bernabé Pablobe jume daunweya yabara paebabe baraxua, awiya barapomonae ichichipa jutebina vaca pebton xuano xua wnae pejainchinexatsibe Pablo iru Bernabé. Barapomonae muxu pejutebi vaca daichitha jopa jutebiyo.

¹⁹ Bapoxonae judiomonae pomonae jopa pejume cowantsiwi, Antioquia tomara weparena, iruru Iconio tomara weparena. Daxita barapo judiomonae Listra tomarapiwi baru cueicueijeichi pebaru anaepanaenexatsibe Pablo iru Bernabeno. Nexata barapomonae Listra tomarapiwi ibotontha cuinbabatsi Pablo. Barapomonae najuntu coyene xeina xua bayatha tupa Pablo. Pablo tomara coiboto juma bejojontapoinyatsi.

²⁰ Jesús pejume cowantsiwichi Pablo cacuita mata wacaicha umenarucupatsi. Bapoxonae Pablo asiya uncuataba. Equeicha tomara bepoinya. Icha mataqueitha Bernabé Pablobe Derbe tomara beya ponabe.

²¹ Barapoxonae Bernabé Pablobe muxu tsipae-babe Jesús pia pexeinya jume diwesi tatsi. Pinmonae jume cowanta Jesús. Equeicha bapoxonae Listra tomara beya, caibeya ponabe. Iconio tomarano, Antioquia tomara beyano bara be-warapiyabe.

22 Bernabé iru Pablo barapo tomarantha juntu coyene tsacababe pomonaetha pomonae pejume cowantsiwi xua xanepanaya pejinompaewa tsane. Matautano cui itorobabe barapomonaetha xua bewa barapomonae beta xanepanaya jume cowanta dubenanaebiyaena. Barichino matautano tsipaebabe xua pinae poxonae ichamonae pepatsiwa tsane Nacom pia peitorobi nacua beicha bewa matha ajuntucoyenetane exaneibinchi xua ichamonae taexanaena.

23 Bernabé Pablobe tamroropata itapeta tsiniyabe pitiri jiwi daxita Jesús pejume cowantsiwi pia penacaetutsi bontha. Barapo pitiri jiwi itapetatsi peyawenaenexa xua peyawenaenexatsi pomonae Jesús pejume cowantsiwi. Poxonae daxita najume weta xua Nacomtha petsipaebiwa, xuano xua yabara nainbota pitiri jiwi nexa, barapoxonae Pablo iru Bernabé, Nacom pon Pecanamataxeinaein jiwi, jeichichi: “Nacom, barapo pitiri jiwi beta eenare jinya necajume cowantsixae”, jeibe.

Meje yabara poxonae Bernabé iru Pablo Antioquía tomaratha equeicha caibe patopiyabe xua po tomara peecaexae Siria nacuatha

24 Copiya matha Pisidia nacua bewarapiyabe. Bapoxonae Panfilia nacuatha patopabe.

25 Jesús pia pexeinya jume diwesi tsipaebabe Perge tomaratha. Barapoxonae equeicha Atalia tomara bewarapiyabe.

26 Baraxotiya Atalia tomaratha Antioquía bewarapiyabe jeratha, po naetha po nae pin nae. Antioquía tomara barapo tomara ichaxota

bayatha matha barapomonaē Bernabé iru Pablo tawuꝑatsibe Nacomtha poxonaē juntucuru warapabe. Bayatha cain barapo Antioquía tomarapiwi tawuca Nacomtha, xua Nacom beta eenaena peantobexae xua Pablo iru Bernabeno beta eenaēinchibe poxonaē nacuitabe Nacom pia penacuichiwa. Baxota equeicha Pablo Bernabeno pecoutha patopabe tsipei barapo pia penacuichiwabe bayatha wetabe.

²⁷ Bernabé iru Pablo poxonaē patopabe Antioquía tomaratha caetutabe pomonaē pejume cowuꝑtsiwi Jesús. Baponbe barapomonaētha tsipaebabe po coyene bayatha Nacom Pablo iru Bernabé taexanatsibe. Matautano tsipaebabe xua Nacom pon Pecanamataxeinaein jiwi, pomonaē jopa judiomonaē naexanaeyo tacopatatsi xua iru barapomonaē peitacupaewatsi xua pejume cowuꝑtsinexatsi Jesús.

²⁸ Bernabé iru Pablo baraxotiya ainya dapaein naecabe barapomonaē pia xantha tatsi pomonaē Jesús pejume cowuꝑtsi jiwichi.

15

Meje yabara poxonaē nacaetuta Jerusalén tomaratha Jesús pia peitorobi jiwi tatsi iru penapatae jiwi

¹ Barapoxonaē iru pebiwi, pomonaē Judea nacuatha jinompa, pata Antioquía tomaratha. Barapomonaē tamropata notarucupa xua pecuidubiwa pomonaētha pomonaē iru pejume cowuꝑtsiwixae Jesús. Jeye: “Icha paichichipame xua painya nepaca capanenebiwa matha

pana nawi thabare pebiwi pam ichaxota pana nareixacaename icha be ichi pocotsi coyeneya bayatha Moisés paca itoroba”, jei.

² Pablo iru Bernabeno jume daunweya tsipaebabe xua baxua jopa xainyeyo. Ichitha jume matsontsonobatsibe barapomona. Daxota Pablo iru Bernabé wun dutatsibe, iru ichamonae wun dubatsi xua daxita barapomona peponaenexa Jerusalén tomara beya. Matautano barapomona itorobatsi xua barapo penawi thabi coyene yabara petsipaebinexatsi Jesús pia peitorobi jiwi tatsi, iruru pitiri jiwi petsipaebinexatsi pomona penacaetutsi jiwi jiwana xua Jerusalén tomaratha.

³ Barapo Antioquia tomarapiwi pomona Jesús pejume cowuntsiwi pu taeumena. Pablo iru Bernabé iru icha pebiwi pu taeumeinchi. Barapoxona Pablo Bernabeno iru icha pebiwino warapa. Barapomona siwa pona Fenicia nacua beya, Samaria nacua beyano. Barapomona Pablo Bernabeno tsipaebabe, jeibe: “Pomona xua jopa judiomona naexanaeyo, barapomona pia cui coyenein nacui barapenta po coyenein xua jume cowanta bayatha pia jume cowantichi Nacomtha”, jeibe Pablo, Bernabeno. Daxita pomona iru pejume cowuntsiwixae Jesús bichocono juntu coyene weiweina poxona jume tane baxua.

⁴ Bernabé iru Pablo poxona patopabe Jerusalén tomaratha, pomona pejume cowuntsi jiwi baponbe matenta weiweinaya wabatsibe. Iruru Jesús pia peitorobi jiwi tatsi matenta weiweinaya waba. Barichiru pitiri jiwi matenta

weiweinaya waba. Bernabé iru Pablo tsipaebabe barapomonaetha po coyene bayatha Nacom taexana baponbetha.

⁵ Ichitha ichamonae fariseomonaе, pomonaе bayatha jume cowanta Jesús, asiya umena. Barapomonaе namchi, jeye:

—Pomonaе jopa judiomonaе naexanaeyo pomonaе pejume cowantsiwi Jesús bewa exanaetsi xua penawi thabiwa tsane xua ichaxota nareixacaena xua ichaxota pebiwixae xeina. Matautano bewa cui itorobichi xua bewa exanaponaena pocotsiwa bayatha Moisés itoroba pia peitorobi coyenewatha, jei.

⁶ Bapoxonaе Jesús pia peitorobi jiwi tatsi iru pitiri jiwimonaeno nacaetuta peyabara paebinea barapo penawi thabi coyene.

⁷ Caena bayatha bapomonaе najume matsontsonobompa. Bapoxonaе Pedro asiya uncuataba. Barai barapomonaetha, jeye:

—Tamonae pam, pomonaе iru painya nejume cowantsiwixae Jesús, paxam payaputaneme, xua caena bayatha Nacom neitapeta painya xantha. Newaba tacueicueijeinexa tsane Jesús pia pexainya pecapanenebiyae diwesi jume pomonaetha pomonaе jopa judiomonaе naexanaeyo, xua iruru barapomonaе pejume cowantsinexa barapo diwesi.

⁸ Nacom pejuntu coyene yaputaein jiwi daxota naca yaputane exana xua bapon tsitatsi xua barapomonaе pejuntu coyene xanepanaewi bequein jopa judiomonaе naexanaeyo. Nacom bara nana-jumope tunaxu cata barapomonaetha icha matha naca cana ichi.

9 Nacom bichocono antobe barapomonaē icha ichi xua bichocono naca antobe. Nacom jũntũ coyene puxana exana barapomonaē xua abe pia peexanaē cuiru coyenein tatsi pejume cowũntsixaetsi icha naca ichi.

10 Maisa anoxuae jopa bepayabara yaputaem pocotsiwa Nacom exana. Mataũtano barapo pejume cowũntsiwi pomonaē jopa judiomonaē naexanaeyo pacui itorobame xua penawi thabiwa xua ichaxota nareixacaena xua ichaxota pebiwichi xeinatsi. Mataũtano be paca ita cui jicha xua barapomonaē bewa exanaena pocotsiwa Moisés itoroba. Apra baraxua jopa naca itacũpaeyo xua waexanaewa. Irũrũ wamo susato jiwi jopa itacũpaetsi xua peexanaewa baxua.

11 Nama apra waxainchi wanaca capanenebiyae jiwichi xua saya amanaya xua Jesús pon jiwi Pecanamataxeinaein peichichipaexae baxua. Barapo pejume cowũntsiwi irũ bara cana ichichi, jei Pedro barapomonaetha.

12 Bapoxonaē barapomonaē moya umena. Barapomonaē Bernabé irũ Pablo jume taeumenatsibe. Tsipaebabe: “Paponeibanbe pomonaetha pomonaē jopa judiomonaē naexanaeyo. Paexaneibanbe barapomonaetha pexeinya petsita itatsi coyenewan Nacom pia peayapusũwiyatha tatsi”, jeibe.

13 Poxonaē Bernabé irũ Pablo najume wetabe xua paebabe, bapoxonaē Santiago namchi, jeye:

—Tamonaē pam, pomonaē irũ painya nejume cowũntsiwixae Jesús, pana nejume taema:

14 Simón Pedro aunxuae naca tsipaeba. Pedro namchi: ‘Poxonae Nacom copiya tamropata pitaba xua yawena pomonae jopa judiomonae naexanaeyo, Nacom jiwana itapeta pomonae xua peantobenexa tsainchi bapon’, jei Pedro.

15 Xuaunxuae Pedro paeba caena bayatha Nacom pia peitorobi jume pepaebiwi yabara tsiwanae muxu dutsiya tina Nacom Pejume Diwesitha xua Nacom nexa, jeye:

16 ‘Poxonae daxita baraxua wetsina, xan Nacom equeicha patoparecaein.

Exanaein xua caein, pon David pia pemomo jiwi tatsi jiwana matacapoponaena piamonae, icha matha David ichi poxonae piamonae matacapopona.

17 Poxonae baraxua exanaein, barapoxonae icha monae pomonae jopa judiomonae naexanaeyo newenawenei

tsane pia tanejume cowantsinexa tsane.

Barapomonae pia Pecanamataxeinaein tatsi naexanaein taitapetsixae barapomonae.

18 Nacom pon jiwi yaputaeya

exanatsi barapo coyenein caena bayatha pepaebixae baxua daxota xaniwaicha

Nacom exanaena’, jei Nacom pia peitorobi jume pepaebiwi, Nacom Pejume Diwesitha xua Nacom nexa, jei Santiago.

19 Santiago cataunxuae awiya cueicueijei, jeye: “Daxota nanta xeinan, equeicha waxainchi jopa bewa itorobi tsainchi pomonae jopa judiomonae naexanaeyo xua peexanaewa po coyenein xua taayapubetsi. Barapomonae nacui barapenta pia

cui coyenein po coyenein xua jume cowanta bayatha pia jume cowantichi Nacomtha.

²⁰ Betatinaetsipatsi carta pomonae jopa judiomonae naexanaeyo. Barapo cartatha jeichipaetsi: ‘Jopa equeicha pewi paxaeinde po wi jiwi tajeba ibo nacom nexa. Painya xoba yabuxi panotame po yabuxi jopa painya seurixi. Painya xoba duwei paw xaneme pon saya pipato tupa xuano pon saya bunopa. Matautano jopa paxaeinde pejanan’, bejei tsipaetsi.

²¹ Baraxua bewa exanaetsi poxoru caena cain bayatha pomonae Nacom Pejume Diwesi pecanatsipaebi jiwi yorobeiba barapo diwesi judiomonae pia penacaeuttsi bontha tatsi. Daxita tomarantha xua po maticabintha pentaquei seicae maticabintha barapomonae yorobeiba Nacom Pejume Diwesi, po diwesi xua Moisés tina bayatha pocotsiwa yabara tsiwinae muxu duta Nacom”, jei Santiago.

Meje yabara poxonae barapo bicheito carta tatina pomonaetha pomonae jopa judiomonae naexanaeyo

²² Jesús pia peitorobi jiwi tatsi iruru pitiri jiwi, iru daxita pomonae pejume cowantsiwi juntu-curu najiwana itapeta. Bapoxonae xua Antioquia tomara beya penajiwana itorobinexa Pablo iru Bernabé. Judas wan dutatsi pon icha wan Barsabás. Iru Silas wan dutatsi, baponbe ponbe bichocono peainya cui jitonbe xua pomonae iru pejume cowantsiwi pia xantha tatsi.

²³ Jesús pia peitorobi jiwi tatsi iruru pitiri jiwi, iru pomonae Jesús pejume cowantsiwi, bara-

pomonaē carta tina xua pecaitorobinexa xua Pablo iru Bernabé iru Judas iru Silas barapoyobe pecaitorobinexatsi. Barapo carta namchi, jeye:

“Paxan Nacom pia peitorobi jiwī tatsi pan, iru pitiri jiwī panno xua nacaemonae jiwichi xua wajume cowantsiwichi Jesús. Paxan pajacoban patamonaē pomonaē jopa judiomonaē naexanaeyo pomonaē iru Jesús pejume cowantsiwichi, pomonaē pejinompaexae Antioquíá tomaratha, xuano xua pejinompaexae Siria nacuatha, Cilicia nacuathano.

²⁴ Payaputan ichamonaē xua patamonaē pata tomara weya pipato paca siwa pona painya tomara beya. Paca cajume acaura. Barapomonaē namchi: ‘Pana nawi thabare. Matautano paexande pocotsiwa Moisés pia coyenewatha itoroba’, jei. Jopa paitorobinyo barapo jume.

²⁵ Daxota be juntucuru pawnaein xua cuita pananta jupaya nanta xeinan. Paitoroban ichamonaē pata xainya weya pia paca necataenexa tsane. Napuna ponabe Bernabé Pablono ponbe bichocono paantobein.

²⁶ Baponbe Pablo iru Bernabé muxu pebocaebe xua pebexubiwatsibe pecueicueijei tsurucuanaebiyaexaebe Jesucristo nexa, pon Wanacanamataxeinaein.

²⁷ Paitorobanbe Judas Silasno. Baraponbe saya pia coutha paca tsipaebinabe daxita xua barapo cartatha papaeban painya neyaputaenexa.

²⁸ Paxan iru Nacom pia Pejumope tñaxu tatsi pananta jupaya nanta xeinan xua jopa bepaca itorobichi icha cui coyene po cui coyene bichocono pacata ayapube xua painya neexanaewa

tsane. Meisa saya ɯ baxua xua pacata tinatsi po cartathe baxua panantawenoname xua painya neexanaewa tsane.

²⁹ Painya xoba paxaneme pewi po wi jiwi tajeba ibo nacom nexa poxonae tauta barapo duwei xua tuxusi exana barapo ibo nacom nexa. Barichi painya xoba duwei pawī xaneme pejanano po duwei pipato tɯpumena. Matautano ichamonae painyamonae jiwana pia xoba nota yabɯxi powaxi jopa piseurixi tatsi. Icha baraxua panacui barapentsiname xanepanaya pajinompaename. Baja”, jei barapo cartatha.

³⁰ Bernabé irɯ Pablo, irɯ Judas Silasno barapomonaeyobe peitorobixaetsi bara Antioquía tomara be-iyiya. Barapo tomarathiya barapomonaeyobe caetuteta pomonae pejume cowantsiwi. Matautano barapomonaeyobe barapo carta cata barapomonaetha.

³¹ Pomonae irɯ pejume cowantsiwixae Jesús bara yoroba barapo carta. Barapomonaē bi-chocono jɯntɯ coyene weiweina tsipei barapo cartatha cui matateicaeya yabara paebatsi.

³² Judas irɯ Silas peitacɯpaexaetsibe xua beta petsipaebiwabe Nacom Pejume Diwesi xua Nacom yaputane exana, daxota jɯntɯ coyene tsacababe barapomonaetha pomonae irɯ Jesús pejume cowantsiwi tatsi xua beta pejinompaewa tsane. Matautano baponbe cui matateicabe.

³³ Barapoyobe barapo pejume cowantsiwitha naecabe caena bayiyo. Barapoxonae barapomonaē pomonae pejume cowantsiwixae Jesús barapoyobe jɯntɯ coyene xanepanaya pu napeyabatsi xua penawibiyaexae

caibeya ichaxota werena bayatha pomonae peitorobirenaexaetsi.

³⁴ Ichitha Silas juntucuru narunta.

³⁵ Pablo iru Bernabé Antioquía tomaratha ecabe. Baponbe iru ichamonaeno pomonae pinmonae, daxita barapomonae cuiduba dubenanaebiya yawa tsipaeba dubenanaebiya Jesús pon Pecanamataxeinaein jiwi pia pexeinya jume diwesi tatsi.

Meje yabara poxonae Pablo equeicha warapa nacueyatabe po cuiyobetha xua Jesús pia pexeinya jume diwesi tatsi pecueicueijejwa nexa

³⁶ Pirapaeyo icha mataqueitha, Pablo barai, Bernabé baraichi, jeye:

—Antha equeicha Jesús pejume cowantsiwi siwa ponaeinchi daxita jupaya tomarantha ichaxota matha cain Jesús pon jiwi Pecanamataxeinaein pia jume diwesi tatsi tsipaebatsibe. Wayaputaenexabe icha metha bara beta jinompa bapomonae, jei Pablo.

³⁷ Bernabé ichichipa xua puna poinchibe pon Juan, pon icha wanno Marcos.

³⁸ Ichitha Pablo jopa ichipaeyo xua pebaru ponaewatsi Juan Marcos tsipei bayatha Panfilia tomaratha Bernabé iru Pablo cuenta ponatsibe. Bayatha Juan Marcos juntucuru jopa benapuna nanacuichiyo Jesús pia pexeinya jume diwesi tatsi.

³⁹ Najume matsontabe. Bernabé iru Pablo nawu tsatajopabe. Bernabé tsana baru jopa Marcos. Weratha ponabe Chipre tunaeto beya.

40 Barapoxonae Pablo cuita waba Silas. Antioquía tomaratha pomonae pejume cowantsiwixae Jesús, Pablo Silasno tatsipaebatsibe Nacomtha xua Nacom peenaenexa peantobexae xua Pablo iru Silas peenaenexatsibe poxonae cueicueijeibe Nacom Pejume Diwesi.

41 Pablo iru Silas warapabe Siria nacua beya, Cilicia nacua beyano. Baponbe juntu coyene tsacababe pomonaetha pomonae pejume cowantsiwi Jesús xua beta pejinompaewa nexa.

16

Meje yabara poxonae Timoteo cueyata, Pablo iru Silas cueyatatsibe

1 Pablo iru Silas Derbe tomaratha patopabe. Equeicha bapoxonae Listra tomaratha patopabe. Baraxota Listra tomaratha caxinabe pebin pon pejume cowantsin Jesús. Bapon pewun Timoteo. Pena tatsi saya judiomonaewayo. Barapowa iru pejume cowantsiwayo Jesús. Timoteo paxa tatsi griegomonaepin.

2 Jesús pejume cowantsiwi, pomonae jinompa Listra tomaratha, iru pomonae Iconio tomaratha jinompano, barapomonae Timoteo beta yabara paebatsi xua pinae pejuntu coyene xanepanaein.

3 Pablo ichichipa xua bepuna ponaeichatsi Timoteo xua peyawenaenexatsi. Ichitha matha copiya cui itorobatsi Timoteo xua pewi thabinexatsi xua ichaxota nareixacaeca xua ichaxota pebinxae xeina. Pablo baxua exana tsipei jopa ichipaeyo xua judiomonae anaepana peexanaewa tsainchi xua jopa

pewi thabixae tsipaetsi Timoteo. Tsipei Pablo yaputane xua judiomonae nawita ichaxota poneibinabe. Barapomonae judiomonae nawi thabeiba tsipei pia cui. Matautano barapomonae judiomonae yaputane xua Timoteo paxa tatsi griegomonaepin. Daxota Timoteo jopa caena bayatha wi thabichi tsipei canta griegomonaepin jopa daxua exaneibiyo.

⁴ Daxita jupaya tomarantha pateiba, Pablono, Silasno, Timoteono. Barapomonaeyobe tsipaebabe pomonaetha pomonae Jesús pejume cowantsiwi pocotsiwa bayatha Jesús pia peitorobi jiwi tatsi iru pitiri jiwi tina cartatha poxonae nacaetuta Jerusalén tomaratha pomonae pejume cowantsiwi Jesús.

⁵ Daxota pomonae penacaetutsi jiwi bara xanepanaya beta jume cowanta. Daxotano pinmonae jume cowanta. Daxita matabi mataropeicha pinmonae tsoponae xua jume cowantapona Jesús.

Mejeyabara poxonae Pablo camaita Macedonia nacuapin

⁶ Nacom pia Pejumope tuxaxu tatsi Pablo jopa copatichi xua pecueicueijejiwa tsane Nacom pejume diwesi Asia nacuatha. Daxota Pablobaru Frigia nacua iya pona xuano xua Galacia nacua iya pona.

⁷ Misia nacua iyiya. Baraxotiya bequein ichichipa pata Bitinia nacuatha, ichitha Jesús pia Pejumope tuxaxu tatsi apusiwa.

⁸ Daxota Misia nacua iyiya. Troas tomaratha mene itapatha pata.

9 Baraxota merawi Pablo camaita pebin pon Macedonia nacuapin. Bapon Macedonia nacuapin nantacotuncua. Pablo jume daunweya wabatsi: “¡Anetha denande! Macedonia nacua berena. ¡Pana yawende!” jeichichi Pablo.

10 Pablo camaita bapon, daxota paxainxainyan xua pata warapaenexa Macedonia nacua beya. Irꝯ xan, Lucas tsocuaein, naponan. Paxan tsipei payaputan xua bara Nacom pana itoroba barapo nacuatha xua pata cueicueijejewa tsane Jesús pia pexeinya jume diwesi tatsi.

Meje yabara poxonae Pablo irꝯ Silas Filipos tomaratha ecabe

11 Jeratha pawarapan, po naetha po nae pin nae. Paponarꝯcupan Troas tomara mene itapa weya. Weratha bopiya payiyan petunaeto cacuitiya Samotracia tunaeto. Icha matabitha papatan Neápolis tomaratha.

12 Equeicha baxotiya Filipos tomara bepaiyan, po tomaratha xua romanomonae cueranta ena. Barapo Filipos tomara yatsicaya pepa tomara, pepa Macedonia nacua. Baraxota ainya matabin paenan.

13 Caentacabi, po matabi pentaquei seicae matabitha, tomara pepuya beya paponan mene itapa beya, ichaxota judiomonae Nacom wꝯqueiba. Paenan baraxotiya. Jesús pejume diwesino pacueicueijan yabꝯxitha powaxi xua cou bayatha nacaetuta.

14 Barapowaxi caewayo jiwana pana jume tane. Barapowa pewꝯn Lidia, Tiatira tomarapiwayo. Baropowa caenaeteiba parabꝯꝯ, po parabꝯꝯ mꝯ

tsobia po papaburꝥ ainya matoman. Barapowa wꝥnae jainteiba Nacom. Barapowa beta jume tane pocotsiwa Pablo paeba. Nacom pon jiwi Pecanamataxeinaein, barapowa icha jꝥntꝥ coyene cana exanatsi xua peexanaenexa pocotsiwa Pablo paeba.

¹⁵ Barapowa bautisabatsi, yawa piamonae matabꝥꝥꝥꝥ tatsi bautisabatsi. Bapoxonae baropowa pana barai, jeye:

—Icha bara metha xaniwaicha pananta xeiname xua Jesús tajume cowꝥntsiwayo, pon jiwi Pecanamataxeinaein, nexata antha tabohta pamaire, pana nejei Lidia.

Pecono jumeyohta pana barai, bepa pinae xua pia botha pamaichin.

¹⁶ Icha mataqueitha poxonae namtohta paenaponan xua poxonae paponan ichaxota jiwi wꝥꝥꝥꝥꝥ Nacomtha, baxota yabꝥꝥꝥꝥ pacaxinan namtohta. Barapowayo cauri xeina. Barapowayo pebusi cui taetaewayotsi xua amanaya petanacuichiwa pia pentacaponaein nexa. Mataꝥꝥꝥꝥ barapowayo paratixi caetuba pia pentacaponaein tatsi nexa xua bapowa pecueicueijeĩ tsaibixae pocotsiwa cauri yaputane exana.

¹⁷ Barapowa, Pablo, irꝥ paxan pana pu wabapona. Bapowa wawaya namchi, jeye:

—¡Barapomonae tanacuita Nacom nexa, po Nacom itabocohta eca! ¡Paca muxu tsipaeba Nacom pia pecapanenebiyae diwesi! jei barapowayo.

¹⁸ Bapowa baxua exaneiba ainya matakabin. Pablo amuxufaetabi. Pablo barapowa taitaweta cauri. Pablo cauritha namchi, jeye:

—Jesucristo wantha caitawetatsi. Naetsiriware. Xubariware bapowayo, jei Pablo.

Bara caena barapowayo copatabatsi cauri.

¹⁹ Barapoxonae yabuyo cui tainchi pia pentacaponawewichi tatsi xua equeicha jopa amanaya tacaetubi tsane paratixi barapomonae nexa. Daxota Pablo Silasno waetabatsibe. Pematacaitorobi bicheito jiwi peitabaratha capoinchibe tomara panatha.

²⁰ Barapomonae Pablo iru Silas cuaranotatsibe peitabaratha tatsi pomonae jiwi peyabara paebiwi xua penatsicuentisiwa xua abe peexanaexae. Barapomonaetha jeye:

—Baponbe judiomonae jitonbe, watomaratha baponbe wamonae cui tsacabatsi xua najume matsontsonoba.

²¹ Baraponbe pia cui coyeneya naca cuiduba. Barapo coyene jopa becopatichi xua wajume taenexa xuano xua waexanaenexa, tsipei romanomonaetsi, jei barapomonae.

²² Bara nexata Pablo iru Silas baru anaepanaruapatsibe jiwi. Matautano pomonae jiwi peyabara paebiwi xua penatsicuentisiwa xua abe peexanaexae, barapomonae ichamonae cui itorobatsi xua Pablo iru Silas penuma xuenaxubinexatsibe paparuwa, bapoxonae xua pecuainchinexatsibe iwatontha.

²³ Matha bichocono cuaintatsibe. Bapoxonae caponatsibe jiwi pecubi bo beya. Pon peyabara equeibin pomonae cubebatsi jiwi pecubi botha bapon cui itorobatsi jeichichi: “Beta yapu eenare, xua jopa penaetsiriwanexabe”, jeichichi barapon.

²⁴ Poxonae bapon jume tane pocotsiwa pentacaponaeui cui itoroba, bapoxonae po tutu tajū beya baxota Pablo irū Silas cuaranoyatsibe. Bichocono naepaewatha taxu cateitabetatsibe jiwi petaxu cateibabi naewatha.

²⁵ Papaetha Pablo irū Silas Nacomtha tsipae-babe yawa Nacom pijume weino naxūnabe. Ichamonae baraxota cūbebatsi jiwi pecūbi botha. Barapomonae Pablo irū Silas jume tayenatsibe.

²⁶ Barapoxonae jemeicha bichocono jijiyataxuba. Ibowano jijiyataxubano xua bomūxū peyūtanotsiwa. Bapoxonae jemeicha nainya saya dubenanaya peboupan. Mataūtano pomonae jiwi pecūbi botha jebatsi daxita taxu nain sarababatsi.

²⁷ Pon peyabara equeibin pomonae cūbebatsi, bapon nacosataxuba. Bapon tane xua barapo jiwi pecūbi bo saya peboupa umenarūcupa. Bapoxonae pia cusi namara jonta. Muxu penabexubi, tsipei bapon nanta xeina xua bara daxita panenebiya, Pablo, Silasno irū ichamonaeno.

²⁸ Ichitha Pablo waba bapon pon peyabara equeibin pomonae cūbebatsi jiwi pecūbi botha, jeye:

—jopa jinya coutha nabexubinde, tsipei apara cataunxuae xote pajinompan! jei Pablo.

²⁹ Nexata pon peyabara equeibin pomonae cūbebatsi jiwi pecūbi botha, wawaya namchi, jeye: “Painta itanatabare”, jei. Jijiyeya cuinaepondenā. Pablo irū Silas imoxoyo petaxutha pentabocototha caquita tauncuatabatsibe.

³⁰ Bapoxonae bapon pon peyabara equeibin pomonae cūbebatsi jiwi pecūbi botha, bapon

Pablo iru Silas pesato becayatsibe. Pablo iru Silas baraichichibe, jeye:

—Ja, zeta bichocuaein tsane xua tana necapanepaewa tsane Nacom beicha? jei bapon.

³¹ Pablo iru Silas jume notabe, jeye:

—Jume cowunde Jesús pon jiwi Pecanamataxeinaein, bapoxonae necapanepae jitom tsane iru jinyamonae matabuxuyo pecapanenebiyae jiwi tsainchi, jeibe.

³² Tsipaebabe bapontha, Jesús pon jiwi Pecanamataxeinaein, pia pexeinya jume diwesi tatsi. Matautano tsipaebabe piamonae matabuxuyo jiwitha tatsi, pomonae pia botha petaenaexaetsi.

³³ Caena barapoxonae, pon peyabara equeibin pomonae cubebatsi jiwi pecubi botha, Pablo, iru Silas wan quiatatsibe. Bapoxonae bapon bautisabatsi iru piamonae matabuxuyo tatsi bautisabatsi. Pablo, iru Silas bautisababe.

³⁴ Bapoxonae Pablo iru Silas bo beya caponatsibe. Pexaewa catatsibe. Bapon piamonae matabuxuyo tatsino bichocono juntu coyene weiweina pejume cowuntsixae Nacom.

³⁵ Pomonae jiwi peyabara paebiwi penatsicuentisiwa xua abe peexanaexae, barapomonae caemumbotha itoroba, policiamonae itorobatsi ichaxota pon peyabara equeibin pomonae cubebatsi jiwi pecubi botha. Bapon copatatsi xua bara Pablo iru Silas pepu copatsinexatsibe.

³⁶ Nexata pon jiwi peyabara equeibin pomonae cubebatsi jiwi pecubi botha, bapon Pablo baraichi, jeye:

—Pomonae jiwi peyabara paebiwi penatsicuentisiwa xua abe peexanaexae,

barapomonaē necui itoroba xua tapaca isanaxubiwa tsainchibe. Bara paca itac̄pabe xua bara papu seicaenamebe, jei bapon.

³⁷ Ichitha Pablo barai policiamonaetha, jeye:

—Apara barapomonaē pana cuainta pepa bicheito peitabaratha. Dacotsiwa barapomonaē abe painta exana. Seicaya apara romanomonaē pan. Copiya matha jopa pana caponaeyobe ichaxota pon jiwi peyabara paebin xua penatsicuenta siwa xua abe peexanaexae. Saya barapomonaē pia coutha paeba xua abe paexananbe. Daxota jiwi pec̄bi botha pana caponabe. Deta aena poxonaē juntucuru pana isanaxubapaebabe moya namicha pana itorobabe. Pentacaponae wi patsipaebare, pomonaē pana cuainta, b̄ jame barapomonaē pia coutha pana nepu sotababe, jei Pablo.

³⁸ Baxua policiamonaē bayatha jume yopita pomonaetha pomonaē jiwi peyabara paebiwi xua penatsicuenta siwa xua abe peexanaexae. Barapomonaē bichocono junuwa poxonaē jume tane xua Pablo ir̄ Silas apara romanomonaē pinbe.

³⁹ Barapomonaē ponar̄c̄pa jiwi pec̄bi botha, Pablo, ir̄ Silas siwa poinchibe peauraxae xua bayatha Pablo, ir̄ Silas cuaintatsibe. Barapomonaē Pablo ir̄ Silas tsipaebatsibe, jeichichibe: “Maisa paauran tsipei abe paca exanatsibe. Moya paponarebe. Jopa po tomarathe paecaeindebe. Jopa pana neyopichinde”, jei.

⁴⁰ Poxonaē Pablo ir̄ Silas jiwi pec̄bi bo we-naetabiyabe, Lidia pia bo tatsi be-iyabe. Siwa ponabe pomonaē pejume cow̄ntsiwixae Jesús. Bara-

pomonaetha baponbe juntu coyene tsacababe xua xanepanaya pejinompaewa tsane. Barapoxonae bara wewarapiyabe.

17

Meje yabara poxonae Tesalónica tomarapiwi namtsebiya anaepanaeya wawai xua Pablo, iru Silas pecasebixaetsibe

¹ Pablo iru Silas Anfípolis tomara iyabe. Apolonia tomara iyabeno. Barapoxonae Tesalónica tomaratha patopabe po tomara ichaxota judiomonae pia penacaeuttsi bo tatsi uncua.

² Pablo pia cui xeina xua judiomonae pia penacaeuttsi bontha tatsi pateiba. Daxota baxota eca acoibi po semanabe. Matautano daxita pentaquei seicae matakabintha barapo judiomonae pia penacaeuttsi botha Pablo iru Silas cuidubabe.

³ Pocotsiwa Nacom Pejume Diwesi paeba, baxua Pablo tsipaeba po coyene xua pinae pon Mesías bewa bexubinchi ichamonae, xuano xua pinae barapoxonae equeicha asu tsane. Pablo jeye barapomonaetha:

—Pon xua Jesús xuaunxuae yabara paca muxu tsipaebatsi, bapon apara bara Mesías, jei Pablo.

⁴ Ichamonae, judiomonae jume cowanta. Barapomonaetha Pablo, iru Silas caemonae naexanatsibe. Barichi pin bicheiton griegomonae jume cowantar, pomonaetha Nacom wanae jaintatsi. Barapomonaetha jume cowanta Jesús. Iru ainya yabaxi bicheiton jume cowanta Jesús powaxi baru cui itura jineibatsi xua jiwi baru cui itura jineiba.

⁵ Ichitha icha judiomonae pomonae jopa pejume cowantsiwi, baxua yabara uwa. Daxota barapomonae pebiwi baru nacaetuba po pebiwi peajuntucoyeneyapubewi xua po pebiwi saya pejinompaewi namtontha. Daxita barapomonae namtsebiya wawai tomaratha. Jasón pia botha tatsi anaepanaya joniya xua Pablo iru Silas pejeichinexatsibe xua pewaetabinexatsibe xuano xua pecaenaetsinexatsibe jiwitha.

⁶ Ichitha baxota Pablo iru Silas jopa taebichibe. Daxota catsaya waetabatsi Jasón, iru ichamonae pomonae pejume cowantsiwixae Jesús. Pablo iru Silas waetabatsibe. Daxita barapomonae pentacaponae jiwitha becayiyatsi. Daxita barapomonae yabara wawaichiya jeichibe:

—¡Barapo pebinbe daxita nacuantha abe paeba ducuaenaebiyabe yawa waxainya becui joparenabe!

⁷ Jasón barapomonae matenta weiweinaya waba pia botha. Jasón pia botha maitecabe. Daxita Pablo baru jopa exanaeyo po peitorobi coyenewan xua pon romanomonae itorobiya pia pepa peewatsinchi itoroba. Matautano barapomonae paeba xua pinae ichun popona pon jiwitrorobiya pia pepa peewatsinchi, bapon pinae Jesús, xua jopa yabara cananta xeinaetsi pon romanomonae itorobiya pia pepa peewatsinchi, jei barapomonae xua namtsebiya wawai.

⁸ Poxonae baxua jume tane, pentacaponae iru pomonae xua baxota umena, daxita barapomonae anaepanaeya namtsebiya wawai.

⁹ Barapo pentacaponae wecobe nota paratixi xua Jasón iru pomonae pejume cowantsiwi we-

cobe notatsi. Barapo pentacaponae wi namchi xua pinae equeicha caewa catsinchi Jasón barapo paratixi poxonae Pablo bar̃u tomara weya pon-aena. Bapoxonae pentacaponae wi Pablo bar̃u pu sorobabatsi pewarapaenexa tsane tomara weya.

Meje yabara poxonae Pablo ir̃u Silas Berea tomaratha poponabe

¹⁰ Barapo merawitha pomonae ir̃u pejume cow̃antsiwixae Jesús, barapomonae Pablo, ir̃u Silas itorobatsibe xua nainya pewarapaenexabe Berea tomara beya. Poxonae barapo tomaratha patopiyabe judiomonae pia penacaetutsi botha tatsi jonyiabe.

¹¹ Judiomonae, pomonae Berea tomarapiwi, barapomonae pejant̃u coyene xanepanaewi icha be jopa Tesalónica tomaratha ichiyo. Jame barapo Berea tomarapiwi bara xanepanaya jume tane Jesús pejume diwesi. Daxita matabi barapomonae Nacom Pejume Diwesitha yorobeiba pia yaputaetsi barapo diwesi, po diwesi xua Pablo ir̃u Silas paebabe icha metha baraxua bara xainyeibe.

¹² Daxota pinmonae jume cow̃anta Jesús. Judiomonae jume cow̃anta Jesús. Ir̃u griegomonae jume cow̃antano, yab̃axi, ir̃u pebiwi. Powaxi jume cow̃anta Jesús, barapowaxitha jiwi bar̃u cui itura jineiba.

¹³ Judiomonae, Tesalónica tomaramonae, jume tane xua Pablo cuiduba Nacom Pejume Diwesi Berea tomaratha. Daxota bapomonae Berea tomara be-iyiya. Baxotiya barapomonae namtse-biya wawai xua Pablo ir̃u Silas pecasebixaetsibe.

14 Ichitha pomonae pejume cowantsiwixae Jesús, Pablo itorobatsi xua nainya peponaenexa imoxoyo mar mene beya poxonae cataunxuae Silas iru Timoteo ecabe Berea tomaratha.

15 Pomonae Pablo cueyabatsi barapomonae Pablo punaxubathopatsi Atenas tomaratha. Barapomonae equeicha caibe nawibiya Berea tomara beya. Barapomonae Silas iru Timoteo tsipaebatsibe xua Pablo najume caruta xua bepa pinae Silas iru Timoteo nainya patopaenabe Atenas tomaratha.

Meje yabara poxonae Pablo Atenas tomaratha popona

16 Pablo ewata, Silas iru Timoteo ewatatsibe Atenas tomaratha. Barapoxonae barapo tomaratha Pablo tane xua barapomonae ainya ibo nacomun xeina. Daxota bichocono yabara najuntu coyene exaba.

17 Daxota Pablo tsipaeba Nacom Pejume Diwesi judiomonaetha judiomonae pia penacaetutsi botha tatsi. Matautano baxotano tsipaeba pomonae bequein jopa judiomonae naexanaeyo, barapomonae Nacom wuna jaintatsi. Barichi daxita matabi pomonae Pablo caxibeiba pomonae nacaetuteiba tomara pin panatha barapomonaethano Pablo cuidubeiba Nacom Pejume Diwesi.

18 Barichi griegomonae ichichipa xua pejume taewa pocotsiwa Pablo paeba. Ichamonae griegomonae itapeta jume cowanta pocotsiwa epicureomonae cuiduba. Iru ichamonae griegomonae itapeta jume cowanta pocotsiwa estoicomonae cuiduba. Barapomonaebe Pablo

tsipaeba. Bapoxonae ichamonae Pablo yabara jeichichi, jeye:

—¿Eta xua bapon naca barai tsipae, pon xua jopa juniya cueicueijeji tsaibiyo? jei.

Ichamonae jeye:

—Mexeya maisa bapon cueicueijeji pia nacomun nexa, jei.

Barapomonae baraxua paeba, tsipei Pablo Jesús pia pexeinya jume diwesi paeba ducuaenaebiya, matautano poxoru paeba xua Jesús equeicha pinae asu.

¹⁹ Nexata ichamonae Pablo teicatsi pecapon-aenexatsi atororotha ichaxota ba pentacapon-aewi nacaetuteiba, poxonae ichauxi muxu pe-exaneibi. Barapo pentacaponae wi matabuxu yo pewun Areópago, Pablo yainyabatsi, jeichichi:

—Pana netsipaebare bepayabara yaputaein po diwesi xua cuidubiya paeba ducuaenaebiyame.

²⁰ Xuaunxuae pana tsipaebame, barapo diwesi jopa payaputaeyo bayatha. Pata bequein yabara yaputaetsi xua po diwesi baxua yabara caunuta, jei barapomonae.

²¹ Atenas tomaramonae iru pomonae penanapaincha jinompaewi xua icha nacua werena peponaewi, pomonae anoxuae jinompa xote, daxita barapomonae u saya pepaebeibi. Yawa saya u cou paebeiba poxonae pena jume jume taiba, saya baxua paebeiba.

²² Nexata Pablo Areópago wun matabuxu yo peitabaratha tatsi asiya uncuataba. Pablo namchi, jeye:

“Paxam Atenas tomaramonae pam. Bara paca cui yaputainchi xua painya nacomun wunaē pajaintame.

²³ Poxonae ponan ichaxota painya nacomun wunaē pajaintathopeibame tan ainya ibo nacom matabon. Matautano tan baxota, ichaxota nacom wunaē pajaintame, xua cou ichaxota pocotsiwatha xua be pexaethopaewa xua ichaxota duwei patautathopame baxua cou panta tinadutame. Baxua panamchim couje: ‘Barapo nacom xua pon jiwi jopa yaputaeyo’, pajam. Xuaunxuae cou asiya pawun dutame pon, bapon, apara pepa Nacom. Xuaunxuae po diwesi yabara paca tsipaebatsi, barapon pejume diwesi apara.

²⁴ “Barapon pon pepa Nacom, daxita barapo ira exana. Daxita carepaya jupaya exana. Barapon pon pia coya peewatsin barapo susato nacuano, yawa barapo itabocono. Po bon patsiacabeibame Nacom xua po botha jiwi wunaē pejaintithopeibinexa Nacom, apara ba Nacom jopa poponaeyo barapocotsi botha.

²⁵ Xua pocotsiwan jiwi taexana Nacom nexa, baraxua Nacom jopa nantawenoneibiyo. Barapo Nacom saya pia coutha daxita nacata exana. Peayapusawano, naca cata. Daxita barapo petusato tutu joibo naca cata. Baxuan daxita amanaya saya nacata exana. Daxita ichauxino muxuna exanano.

²⁶ “Copiya meisa bapon Nacom compa exana pebin, bara caein. Barapo cae janatha daxita yanacua exana jiwi. Daxita wunaē tsiwanaeya yaputaneno poxonae naexanaena daxita jiwi. Matautano yaputane xua eta po weiyobetha ji-

nompaena. Matautano yaputane xua pia irantha bexa naexanumenaponaena.

²⁷ Icha pebin cuita cananta xeinaetsipa Nacom, bara Nacom cana exanaetsipa xua bapon bara Nacom pejume cowantsiwa tsainchi. Nacom jopa taj_u ecaeyo ichitha bara waxantha imoxoyo pona.

²⁸ Nacom pepoponaexae daxota as_u jinompatsi. Nacom naca exana, daxota beta nacuiyenabatsi, yawa daxota wacobexitha _u waexanae. Ichaunxuae ichin xua paca tsipaebatsi barichi painyamonae baxua paeba pomonae diwesi petinaewi poxonae jei, 'Nacom apara pia jiwichi waxainchi', jei.

²⁹ Waxainchi Nacom pia jiwichixaetsi, daxota jopa bewa nanta xeinaetsi xua Nacom po Nacom pepa Nacom, apara j_upa po nacom_un jiw_i exana pecobetha. Barapo nacom_un po nacom_un xua jiw_i cana exana xua oro nainton yawa xua plata nainton yawa xua ibowan, saya jiw_i pia coyene cuirutha nanta xeina xua peexanaewa barapo nacom_un.

³⁰ Matha copiya bayatha Nacom saya beitatemaya tane jiw_i abe pia peexanaewan tatsi, tsipei barapomonae jopa yabara yaputaeyo pocotsiwa Nacom ichichipa. Ichitha matapainya anoxuae daxita jiw_i Nacom cui itoroba xua petsita xeinaenexatsi icha j_unt_u coyene, xua jopa equeicha peexanaenexa abe peexanae coyene. Saya _u penanta xeinaenexa tsane pocotsiwa Nacom ichichipa.

³¹ Nacom matababi w_un duta xua po mataqueitha tsane Jesús caetucaetutetsina daxita jiw_i pia

peitabaratha. Barapo matabaratha tsane Jesús xaniwaicha yabara paebina daxita jiwi xua penatsicuentisiwa xua abe peexanaexae. Pomonae xua abe exana itawetsinchi, pomonae xua wɨnae exana jopa itawetsi tsainchi. Nacom itapeta, xua Jesús tsiitapetatsi barapo penacuichiwa tsipei Jesús saya xaniwaicha pepaebin. Poxonae Nacom Jesús asɨ exanatsi petɨpaewitha, Nacom naca tsita itapeinya xeina xua apara Jesús tsiitapetatsi barapo penacuichiwa”, jei Pablo.

³² Poxonae barapomonae Pablo jume tainchi po coyene xua equeicha petɨpaewi pinae asɨ tsaibi tsane, ichamonae Pablo jume cui caponatsi nawita. Ichamonae namchi, jeye:

—Bexa paca jume taeinchi equeicha xuaunxuae paebame, jeichichi Pablo.

³³ Nexata Pablo cuenta ponataba barapomonae.

³⁴ Ichitha ichamonae Pablo puna poinchi yawa bapomonae Jesús jume cowɨntatsi. Ichɨn barapomonae jiwana pewɨn Dionisio. Bapon Dionisio Areópago wɨn matabɨxɨyo jiwana pin. Petsiriwa powa irɨ napona powa irɨ pejume cowɨntsixa Jesús, barowa pewɨn Dámaris. Ichamonae irɨ napona pomonae irɨ Jesús pejume cowɨntsiwichi.

18

Meje yabara poxonae Pablo Corinto tomaratha popona

¹ Pirapae equeicha Pablo Atenas tomara we-warapiya. Corinto tomara bewarapiya.

² Baraxota Pablo caxina judiomonaepin, pon pewɨn Aquila. Bapon Ponto nacuapin. Piowa tatsi

pewan Priscila. Piseuribe mexuaetha Italia nacua wewaraparenabe, tsipei pon romanomonae itorobiya pia pepa peewatsinchi pon pewan Claudio, bapon judiomonae daxita itorobatsi xua pewarapaewa tsane barapo Roma tomara weya. Daxota Corinto tomaratha patopabe. Pablo siwa pona, Aquila petsiriwano siwa poinchibe.

³ Pablo naeca Aquila pia botha tsipei bapon pia penacuichiwiyo iru xeina icha Aquila piawabe ichi. Pia penacuichiwiyo xeina xua chivo boco bouton exana. Aquila piowabe nacuitabe, iru Pablo piawa nacuita.

⁴ Daxita matabi, po matabantha pentaquei seicae matabantha Pablo poneiba judiomonae pia penacaetutsi botha tatsi. Baxota Pablo jume daunweya cueicueijeji pomonaetha pepa judiomonaetha iru pomonaetha jopa judiomonae naexanaeyo. Pablo cueicueijeji barapomonaetha tsipei ichichipa xua barapomonaetha Jesús pejume cowantsiwa tsainchi.

⁵ Poxonae Silas iru Timoteo Macedonia nacua wepatoparenabe, barapoxonae daxita matabantha Pablo cuidubeiba judiomonaetha. Pablo paeba xua pinae pon Jesús jeichichi xua apara pinae bapon apara bara Mesías, pon xua pinae barapomonaetha pewanae ewatsixae.

⁶ Barapomonaetha tamropata pitaba xua Pablo abe yabara paebatsi yawa tsumu jume baru paebatsi. Nexata Pablo pepatomeicha nama pararuwa nuntaba. Baxua exana poxoru barapomonaetha anthaetabiya jume tane. Pablo barai barapomonaetha, jeye:

—Bara apara painya coutha icha pana

natsicuentame xua daxota poxonae pawneracaename. Jopa tacouthinyo xua jopa paxeinaem tsane peajuntacuiyapusawa, tsipei bayatha yabara paca tsipaebatsi barapo peajumeyapusu diwesi. Tha anoxuae Nacom Pejume Diwesi caponaetsi pomonaetha pomonae jopa judiomonae naexanaeyo, jei Pablo.

⁷ Barapoxonae Pablo judiomonae pia penacaetutsi bo tatsi wewarapiya. Pablo pona Justo pia bo beya tatsi. Bapon Justo, icha wun xeina, Ticio baraichi. Bapon wuna pejainteibin Nacom. Bapon yabo uncua ichaxota imoxoyo judiomonae pia penacaetutsi bo tatsi peuma werena.

⁸ Iru Crispo, pon judiomonae pia penacaetutsi bo peyapucauncuaein, bapon piamonae matabuxuyo baru jume cowanta Jesús pon jiwi Pecanamataxeinaein. Barichi pinmonae pomonae Corinto tomaratha jinompa poxonae jume tane Nacom Pejume Diwesi, bapomonae iru jume cowanta Jesús. Pomonae pejume cowantsiwi barapomonae daxita bautisabatsi.

⁹ Bapoxonae Pablo merawi camaituncua Nacom pon Pecanamataxeinaein jiwi. Pablo baraichichi, jeye: “Jopa junuwinde. Nacom Pejume Diwesi paeba ducuaenaebiyama. Jinxoba moyam.

¹⁰ Tsipei apara, xan cabaru popoinchi, daxota ichamonae jopa itacupaetsi xua abe necaexanaewa. Barapo tomarathe tamonae, pinmonae apara inta jinompa”, jei Jesús.

¹¹ Pablo baxota popona dieciocho po xometiyobe Corinto tomaratha. Baxota Pablo cuiduba ducuaenaebiya Nacom Pejume Diwesi.

¹² Irurū pebin popona pon pewan Galión. Bapon Galión Acaya nacuapiwi pia peyanacua ewatsinchi exanatsi. Barapoxonae judiomonae pomonae Acaya tomarapiwi nacaetuta Pablo yabara nacaetutatsi pecasebixaetsi xua pecaponaenexatsi Galión peitabaratha tatsi.

¹³ Judiomonae namchi, Galión baraichi, jeye:

—Poxonae bapon Pablo paeba ducuaebeiba pinmonae baraxua jume jejei tsaibi. Pablo cuidubeiba jiwi, xua pinae jame bewa jiwi wanae jainteibi Nacom po coyene jopa jupaeyo Moisés pia peitorobi coyenewa tatsi, jei barapomonae.

¹⁴ Pablo bara muxu pepaebi, irū Galión pae-baxoyarū. Nexata barapon namchi judiomonae baraichi, jeye:

—ǂ judiomonae pam. Painya xoba pana tsipaebame. Jame icha bapon caiba, icha jiton bexotsi, icha ichawiyoy exana xua abe, metha jame bapoxonae paca jume jejei tsipaetsi. Ichitha bapon jopa abe exanaeyo.

¹⁵ Saya ũ payabara cueicueijam tsaibi barompaya painya cui xua painya amo jiwi pia cui coyeneya tatsi. Moya baxua paxam paexande pocotsiwa Pablo payabara paebame. Tsipei jopa bepacata naexanaetsi be pon jiwi peyabara paebin xua penatsicuentisiwa xua abe peexanaexae. Moya painya coutha pacui itawere, jei Galión.

¹⁶ Bapoxonae Galión pesato benapuna torobabiya barapo judiomonae.

¹⁷ Bara nexata daxita judiomonae Sóstenes waetabatsi pon judiomonae pia penacaetutsi bo tatsi peewatsin. Barapomonae Sóstenes b̄atsi

Galión peitabaratha tatsi. Daichitha baxua Galión saya cui tane, jopa tsita ainya cuichi.

Meje yabara poxonae Pablo equeicha Antioquía tomara beya caibeya warapa. Baxotiya tamropata pitaba xua warapa acoibi po cuiyobetha xua pecue-icueijeinexa Jesús pia pexeinya jume diwesi tatsi

¹⁸ Pablo awiyya came baxota popona ainya maticabin Corinto tomaratha. Bapoxonae nama copiyya napeyaba pomona pejume cowantsiwixae Jesús. Siria nacua bewarapiyya weratha, po naetha po nae pin nae. Aquilano piowabe naponabe. Barapoxonae juntucuru bara ponatabichiba copiyya matha nanta catepateyya sibaxuba Cencrea tomaratha xua penayabara tsita itapeinya xeinaenexa xua nayabara jume cui wetsina xua exanaena xua bayatha Nacomtha nayabara tsiwɥnae muxu duta.

¹⁹ Bara Efeso tomaratha patarɥcɥpa. Baxota Pablo Aquila piseuribe xubetatsibe pia ponaetsi ichaxota judiomona nacaetuta barompaya pia penacaetutsi botha. Baraxota Pablo barɥ cue-icueije barapo judiomona.

²⁰ Efeso tomarapiwi bequein Pablo apusiwatsi xua abɥ peecaewa tsane. Ichitha Pablo juntucuru jopa beecaeyo baxota ainya maticabin.

²¹ Nexata Pablo napeyaba barapomona. Pablo namchi, jeye: “Tha nama Jerusalén tomara beequiyaetsi. Tha naewatequiyaetsi xua jiwi petsinacaetutsinexa pexaewa xua penabanaewa. Metha equeicha paca taeyoparenaeinchi icha Nacom metha newɥnae ichipaena”, jei Pablo.

—Bara warapataba Pablo. Efeso tomara we-warapiya jeratha po naetha po nae pin nae.

²² Poxonae Cesarea tomaratha patopa Jerusalén tomara be-iyá, pia jacobichi pomonae Jesús pe-jume cowantsiwichi. Bapoxonae equeicha Antio-quía tomara bewarapiya.

²³ Poxonae bara juntucuru yaainya merawin jopa baxotiya equeicha icha nacuabe bewarapiya. Galacia nacua bewarapiyano. Frigia nacua bewarapiyano. Baxota Jesús pejume diwesi cuiduba Pablo pomonaetha pomonae Jesús pejume cowantsiwi. Pablo juntá coyene tsacaba xua barapomonae ajantá yapusáya pejume cowantaponaewa tsane Jesús.

Meje yabara poxonae Apolos Nacom Pejume Diwesi cueicueije Efeso tomaratha

²⁴ Caein judiomonae jiwanapin Efeso tomaratha patopa. Bapon pewán Apolos. Bapon seicaya irá Alejandría tomarapin. Bapon Nacom Pejume Diwesi peyaputaein yawa beta cacueicueije barapo diwesi.

²⁵ Apolos beta yabara cuidubatsi ichamonae xua Jesús, pon Pecanamataxeinaein jiwi, pia cui. Juntá coyene weiweinaya paeba. Xaniwaicha piamonae cuiduba Jesús yabara bequein saya yaputane xua po coyene pinae Juan pebautis-abiwa jiwi xua icha juntá coyene pexeinaenexa Nacomtha.

²⁶ Apolos judiomonae pia penacaetutsi botha tatsi bichocono juntá coyene wánaeya cueicueije Nacom Pejume Diwesi. Priscila, Aquila piowabe

jume tanebe bapon. Wababe bapon, pia bo be-cayabe. Aquila, Priscila pia pebinbe yabara muxu tsidutabe icha diwesi xua Nacom pia pepa diwesi po diwesi xua jopa yaputaeyo.

²⁷ Apolos ichichipa xua peponaewa Acaya nacua beya. Bapoxonae pomonae pejume cowantsiwixae Jesús, Apolos canatsiwana tinaxotsi carta xua tatinatsi pomonae pejume cowantsiwixae Jesús. Daxota barapomonae tatina xua Apolos pententa weiweinaya wabinexatsi. Poxonae Apolos patopa Acaya nacua, bapon yawena pomonaetha pomonae bayatha Nacom jume cowantatsi pomonae Nacom peantobexae.

²⁸ Apolos daxita jiwi peitabaratha jume amanayaba poxonae Jesús beta yabara paebatsi. Daxota barapomonae judiomonae jopa itacupaetsi xua pejume notsiwatsi bapon po coyene xua poxonae bapon abe pepaebiwa. Poxonae Apolos yoroba Nacom Pejume Diwesi bapon tsita itapeinya xeina xua Jesús apara Mesías pon Nacom itorobica.

19

Meje yabara poxonae Pablo Efeso tomaratha popona

¹ Poxonae Apolos Corinto tomaratha eca, bapoxonae iru Pablo seicaya ducuaenaebiya daxita tomaran jupaya, po tomarantha ichaxota atororon. Efeso tomaratha patopa, baxota Pablo caxina ichamonae pomonae Cristo pejume cowantsiwichi.

² Pablo yainyaba barapomonae, jeye:

—¿Bayatha Nacom pia Pejumope tɯnaxɯ tatsi painya jɯntɯ coyenetha pacata pata poxonae pajume cowɯntame Jesús? jei.

Barapomonaе Pablo jume notatsi, jeye:

—Jume, jopa payaputaеinyo. ¿Eta pocotsiwara xua Nacom pia Pejumope tɯnaxɯ tatsi? Bayatha jopa payabara jume taeinyo baxua, jei.

³ Pablo yainyaba, jeye:

—¿Eta pabichim poxonaе pajume cowɯntame poxonaе paca bautisaba? jei.

Pablo jume notatsi, jeye:

—Apara saya payabara jume cowɯntan xua Juan cuiduba, po coyene xua Juan itorobatsi xua jiwi pebautisabiwatsi, jei.

⁴ Pablo jume nota, jeye:

—Aja, Juan bautisaba pomonaetha pomonaе abe pia peexanaе cuiru coyenein nacui barapenta xua pomonaе pejume cowɯntsiwichi Nacom. Daxota metha Juan piamaetha barai: ‘Pajume cowɯnde pon xua tsiwana patopan’, jei Juan piamaetha. Xua Juan namchi: ‘Pon xua tsiwana patopan’, jei, bapon apara Jesús, pon ‘Mesías’ baraichi, jei Pablo.

⁵ Poxonaе baraxua Pablo jume taerɯcupatsi, caena barapomonaе bautisabatsi Jesús pia pewɯnthata tatsi pon Pecanamataxeinaеin jiwi.

⁶ Poxonaе Pablo barapomonaе pecobetha mata jayaba, barapoxonaе barapon Nacom pia Pejumope tɯnaxɯ tatsi barapomonaе tapatatsi pejɯntɯ coyeneintha, yawa cueicueijeji exanebatsi icha jumeintha xua ichamonaе pia jume tatsi. Mataɯtano barapoxonaе barapomonaе

cueicueijeji Nacom Pejume Diwesi pocotsiwa Nacom yaputane exana.

⁷ Daxita bapomonaе pomonaе baxota ena doce pomonaе matabaxuyobe pomonaе xua Jesús pejume cowantsixaetsi.

⁸ Baxota Efeso tomaratha, Pablo judiomonaе pia penacaetutsi botha tatsi poneiba acoibi po xometiyobetha Nacom Pejume Diwesi pecueicueijejewanexa. Bapon jopa junuwiyo poxonaе cueicueijeji. Matautano yabara tsipaeba po coyene Nacom waba jiwi petanaexanaenexatsi piamonaе tatsi pomonaе itorobiya peewatsixae.

⁹ Ichitha ichamonaе aichaxaibi jume tane. Jopa juntucuru bejume cowantsiyo. Saya barapomonaе jiwi peitatha tatsi abe yabara paeba Jesús pia pena pecuidubiwa tatsi. Nexata barapomonaе pia xainya weya tatsi Pablo napitaba. Saya meisa baru pona pomonaе Jesús pejume cowantsiwichi po bo penacuidubi bo beya. Pebin pon pewan Tirano barapo bo, bapon pia bo tatsi. Barapo botha Pablo daxita matababi Nacom Pejume Diwesi cuidubeiba.

¹⁰ Baraxota Pablo ainya weibe paeba ducuaеabiya Nacom Pejume Diwesi. Daxita pomonaе Asia nacuapiwi judiomonaе iru pomonaе jopa judiomonaе naexanaeyo barapomonaе jume cowanta Jesús pia pexeinya jume diwesi tatsi, pon Pecanamataxeinaein jiwi.

¹¹ Nacom Pablo yawenatsi xua pexeinya pet-sita itatsi coyenewan exana Nacom pia peayapuwatha tatsi.

¹² Ichamonaе paparuwan yawa painyaweran capona Pablo beya xua barapo paparuwantha

Pablo peperu jayababinexatsi. Barapo paparuwan nata capona peatene jiwitha. Bapoxonae barapo paparuwantha nainya axaibi tsouneibi. Iru pomonae cauri xeina barapo paparuwantha nacapanenebiya tsaibi. Barapomonae cauri wepu poneibatsi.

¹³ Ichamonae judiomonae, pomonae saya pejinompaewi, barapomonae pia cui xeina xua jiwitaitaweteibatsi cauri. Barapomonae ichichipa Jesús wun wun taibatsi poxonae itaweta cauri. Barapomonae caurimonae baraichi, jeye: “¡Bara Jesús pewantha paca itawetatsi, pon Pecanamataxeinaein jiwí, xua pon Pablo wun yopita ducuaenaebiya!” jei barapomonae.

¹⁴ Iru barapoxonaeru judiomonaepin pon pewan Esceva, xeina siete poyobe tatsi pebiwi. Barichi barapo siete poyobe wun wun taibatsi Jesús, poxonae itaweta cauri. Esceva sacerdotemonae pia pentacaponaewi jiwana tatsi.

¹⁵ Poxonae barapomonae paeba barapo wantha, Jesús pewantha tatsi, barapomonae jume notatsi cauri, jeye: “Bara tayaputaein Jesús, Pablono bara yaputanno. ¿Incane paxamda? ¿Jintam pamda?” jei bapon cauri.

¹⁶ Bapoxonae barapo siete poyobe pexainya betanaxorenatsi pon cauri xeina. Barapomonae butsi. Matautano barapomonae jopa nacuiyenabiyo. Barapo siete poyobe daxita tamasa jebompatsi yawa wan dubatsi. Bo bejumasa ducupiya.

¹⁷ Pomonae Efeso tomaratha peenaewi, judiomonae, iru pomonae jopa judiomonae naexanaeyo, daxita bapomonae jume tane xua siete

po yobe jumasa dɛcɛpa. Barapomonae junuwa bi-chocono. Daxota barapomonae Jesús pon Pecanamataxeinaein jiwi wɛnae jaintatsi.

¹⁸ Pomonae Jesús jume cowɛntatsi pinmonae barapomonae jiwana baxota pata. Barapomonae jiwi peitɛtha tatsi paeba xua bepa pinae bayatha abe exana poxonae mara coyeneya exana nawita.

¹⁹ Pomonae Jesús pejume diwesi coyene nacuiduba, barapomonae carendena diboron po diboron xua mara yabara penacuidubiwana. Barapo diboron tauteba. Poxonae barapo diboron tauteba daxita nataeumena. Barapomonae yabara matoma ununa xua pinae barapo diboron matoma nawita, cincuenta mil po paratiximonaebe pinae nantomata.

²⁰ Barapoxonae pin bicheito jume cowɛnta Jesús, pon Pecanamataxeinaein jiwi. Yawa barapomonae tsita itapeinya xeina dubenanaebiya xua bara Nacom apara xeina peayapusɛ itorobi coyenewa.

²¹ Poxonae baxua weta Pablo najɛntɛ coyene weta xua pesiwa ponaewa tsane tomaran xua Macedonia nacuatha, yawa xua Acaya nacuathano xua bapoxonae Jerusalén tomara bepewarapiyaenexa. Nanta xeinano xua peponaewa tsane Roma tomara beya.

²² Ponbe Pablo yawenatsi, Timoteono Erastono, baponbe Pablo Macedonia nacua beitorobiyabe. Cataunxuae abɛ bapon Pablo Asia nacuatha eca.

Meje yabara poxonae jiwi namtsebiya wawai Efeso tomaratha Pablo pecasebixaetsi

23 Barapoxonae Efeso tomarapiwi anaya anaepanaeya najume cayayataxuba poxoru aichaxaibi xua pejume taewa xua Pablo yabara cueicueijeí Jesús pia pena pecuidubiwa tatsi.

24 Pon xua abe penajume cayayataxubin xua poxonae namtsebiya wawai bapon pewan Demetrio. Bapon pinmonae xeina pomonae petanacuichiwichi xua petaexanaewichi penainwixi. Barapomonae Demetrio taexanatsi tsiqui penain boxi xua Artemisa pia bo canaxobeba. Artemisa Efeso tomarapiwi pia nacomwa tatsi. Barapowa jopa be pepa nacomiyo.

25 Bapon Demetrio pia petanacuichiwichi waba. Pomonae iru Artemisa pia penain boxi peexanaewi wabatsino. Demetrio namchi daxita barapomonaetha, jeye: “Bara metha payaputaneme xua paratixi xeinatsi poxoru Artemisa pia penain boxi exanatsi wacaenaetsinexatsi, daxota xeinatsi paratixi.

26 Pon pataneme yawa pajume tanemeno, barapon Pablo. Bapon paeba ducuaenaebiya xua pinae pomonae icha nacom canaetsiya exana apara pinae xapain jopa daxua pepa nacomiyo. Pomonae Pablo cuidubeiba jume jejei tsaibichi ayei jiwi Efeso tomarathano, Asia nacuathanoru jume jejei pinmonae.

27 Baxua bichocono nacata abe, tsipei icha jiwi jopa comocaetsipae barapo penain boxi xua waxainchi exaneibatsi bapoxonae jopa xeinaetsipaetsi paratixi. Jiwi namchi tsane: ‘Artemisa pia pin bo tatsi abe. Xapain jopa pepa Nacom pin pia boyo’, jeí tsane. Cataunxuae

anoxuae barapo jivi Asia nacuapiwi iru daxita nacuanpiwi Artemisa wuna jainteibatsi. Ichitha icha jume cowantsinchi Pablo, metha equeicha jopa bewuna jainteibichipaetsi Artemisa”, jei Demetrio.

28 Poxonae baxua Demetrio jume taerucupatsi, anaepanarucupa barapomonaе. Yawa barapomonaе namtsebiya wawai, jeye: “¡Maisa Artemisa powa pata tanecanamataxeinaewa, barapowa bichocono pejuntu coyene xanepanaewa! ¡Maisa Efesiomonaе pan Artemisa wuna pajaintan!” jei barapomonaе.

29 Barapoxonae daxita tomarapiwi jupaya anaepana. Gayo iru Aristarco, ponbe Macedonia nacuapinbe, ponbe Pablo pepuna ponaexatsibe, baraponbe waetabatsibe. Po botha ichaxota jivi nacaetuteiba pecueicueijeinexa tsaibi tsane bara bemaхu cayatsibe.

30 Bepa bequein Pablo najoniyaei barapo botha, petsipaebinexa tsane barapomonaе, ichitha Jesús pejume cowantsiwichi Pablo jopa pu copatichi.

31 Barichi pomonaе pentacaponae wi jiwana Asia nacuatha, barapomonaе Pablo pia jivi tatsi cou tana cajume caitorobatsi xua bepa pinae Pablo jopa najoniyae tsane baxota.

32 Barapoxonae barapo penacaetutswatha, ichamonaе icha caununaya wawai iru ichamonaе icha caununaya wawai. Daxita barapomonaе najume cayayataxubiya wawai. Ichamonaе jopa yaputaeyo po coyene xua barapomonaе yabara nacaetuta.

33 Barapo penacaetutswimonaе anaepana. Pablo yabara anaepanatsi iru pijimonaе tatsi

tayabara anaepanatsi. Daxota judiomonae caemonae najiwana napuna totabiya pebin xua bapon peitabaratha peuncuaenexa barapo penacaetutswatha. Bapon pewan Alejandro. Bapon pecobetha jume matawenta tsipei ichichipa bequein yabara jume yawena judiomonae barompaya piamonae.

³⁴ Poxonae barapomonae Alejandro yaitaerucapatsi xua Alejandro judiomonaepin, barapoxonae equeicha daxita namtsebiya wawai tsompae ainya horabe. Barapomonae namchi, jeye: “¡Maisa pata tanecanamataxeinaewa Artemisa! ¡Maisa barapowa pejuntú coyene xanepanaewa! ¡Maisa efesiomonae pan Artemisa wanae pajaintan!” jei barapomonae.

³⁵ Nexata, pon xua tomara peewatsin, bapon uncua barapo penacaetutsi itabaratha. Bapon jume matawenta xua equeicha jopa penamtsebiya wawainexa tsane barapomonae. Barapoxonae bapon namchi, jeye: “Pomonae Efeso tomaramonae pam. Bara daxita nacuamonaepiwi naca yaputane xua waxainchi notatsi Artemisa pin pia bo tatsi. Matautano yaputane xua waxainchi botatsi po iboto xua athawe jopeica. Barapo iboto apara bara Artemisa tsipei be Artemisa pia pawí.

³⁶ Jiton dapocotsin aibi pon xua nejume barai xua naeraban, daxota saya iru moya pande. Painya xoba ichawa pananta xeiname poxonae jopa beta pananta xeinaem.

³⁷ Ponbe, Gayo iru Aristarco, ponbe pacarendename, baponbe jopa abe paebiyobe. Baponbe jopa caibiyobe xua xoyo boca Artemisa pin pia botha tatsi. Matautano Artemisa nacomwa jopa

cui aebiyobe.

³⁸ Icha Demetrio ir_u petanacuichiwichi nanta xeina xua ichamonae Demetriobar_u abe taexainchi moya jame barapomonae bewa ponaena po bo ichaxota ena pomonae jiwi peyabara paebiwi xua penatsicuentsiwa xua abe peexanaexae. Bapoxonae barapomonae itac_upatsi xua petsipaebiwa pomonaetha pomonae tomara pentacaponae wi po coyene xua ichamonae abe exana barapomonaetha.

³⁹ Icha ichawa painya paebichi ab_u anoxuae jopa papaebinde. Po mataqueitha poxonae pentacaponae wi ba nacaetuta pejume taenexa xua jiwi paeba bapoxonae jame papaebare.

⁴⁰ Wanamtsebiya wawaijeixae anoxuae daxota romanomonae naca yabara anaepanaena tsipei nanta xeinaena xua waxainchi aichaxaibichi xua barapomonae naca itoroba. Jopa xeinaetsi po diwese xua yabara tsipaebinchi barapomonaetha pocotsiwa xua yabara namtsebiya wawaichi”, jei tomara peewatsin.

⁴¹ Poxonae najume wetaba baxua, barapomonae pesato beitorobiyatsi.

20

Meje yabara poxonae Pablo siwa pona Macedonia nacua, Grecia nacuano

¹ Bara najume wetar_uc_upa daxita poxonae namtsebiya wawai tsompae. Bapoxonae Pablo waba pomonae Jesús pejume cow_untsiwichi pebar_u nacaetutsinexa. Barapomonaetha Pablo yabara tsipaeba Jesús pejume diwesi xua barapomonae peaj_unt_uyap_us_uya xanepanaya

pejinompaenexa tsane Nacomtha. Bapoxonae Pablo barapomonae napeyaba. Macedonia nacua bewarapiya.

² Daxita barapo tomaran, Pablo siwa pona barapo Macedonia nacuatha, cuidubano pomonaetha pomonae Jesús pejume cowantsiwichi, xua peajantayapusa xanepanaya tajinompaenexa tsainchi Nacomtha. Poxonae nacui wetaba equicha Grecia nacua bepatopiya.

³ Baraxota Pablo acoibi po xometiyobe yapucaewa. Bara juntucuru Siria nacua beya warapa jeratha po nae pin naetha. Bapoxonae jume tane xua pinae judiomonae anaepana xua Pablo bexubapaebatsi. Daxota Pablo najantui cui weta xua caibeya peponaewa tsane petaxutha Macedonia nacua beya.

⁴ Pablo yanabatsi ichamonae. Iru ichun naponabaron pewun Sópater, pon Berea tomarapin, pon Pirro pexanto tatsi. Iru ichunbe naponabe baponbe pewunbe Aristarco iru Segundo, baponbe Tesalónica tomarapinbe. Iru ichun naponabaron pewun Gayo, Derbe tomarapin. Iru ichun naponabaron pewun Timoteo. Iru ichunbe naponabe, ponbe pewunbe Tíquico iru Trófimo, baraponbe Asia nacuarinbe.

⁵ Barapomonae daxita pana netsiwana nantacaponabaron, Troas tomaratha cou baxota pana ewata.

⁶ Ichitha Filipos tomara weya pawarapan jeratha, po naetha po nae pin nae poxonae weta Pascua wun matabin. Barapo Pascua matabintha jiwi xane pan xua pocotsiwa jopa cotowiyo. Poxonae cinco po matabibe caewa papatan Troas tomaratha, baxota barapomonae

pacaxiban. Baraxota paenan siete po matakabibe.

Meje yabara poxonae Pablo Troas tomara siwa pona

⁷ Pentaquei seicae matakabitha, domingotha, pana nacaetutan, pata epanantarabi janacaenexa tsane pan. Pablo cuiduba pomonae Jesús pejume cowantsiwichi, tsipei baya warapaena Pablo. Daxota poxonae cueicueijeji beya yapapae.

⁸ Po tutu athabeicha barapo tututheicha pana nacaetutan. Barapo tututha ainya coichan dubena.

⁹ Pewowindu pewun Eutico, barapoyo bomuxu tututha ventanatha pemuxuburutha eca. Pablo bayiyo tsuxubi xua Nacom Pejume Diwesi cueicueijeji. Barapoxonae Eutico nantacotiya maitecataba. Tajux wejopeica. Po tututha Pablo cueicueijeji tsuncuae xua ichaxota acoibi tututheicha barapo tutu wejopeica. Eutico petupaeyo pitatsi.

¹⁰ Bara nexata Pablo dunatabica. Pablo Eutico caquita ecatsi pentabocototha. Pablo naisa cateita waetaba. Piamonae barai Pablo, jeye:

—Jopa pajunuwinde, bara apara asu, jei.

¹¹ Nexata Pablo equeicha caibe juinya. Pan epa janaxuba, yawa xane. Barapoxonae equeicha Pablo matowa cueicueijeji Nacom Pejume Diwesi, beya yajume pentha tsina. Bapoxonae weta. Bara cou nama matakabi wuna tsuxubiba Pablo warapa.

¹² Barapo pewowin Eutico equeicha bara asu. Eutico piamonae bo becayiyatsi. Daxita saya juntu coyene tsacabatsi xua junte ma jinompa xua equeicha Eutico peasuxae.

Meje yabara poxonae Pablo jeratha Troas tomara wewarapiya po naetha po nae pin nae xua Mileto tomara bewarapiya

¹³ Paxan copiya jeratha paponan weratha Aso tomara beya tsipei yaitama Pablo pana itoroba xua bepa pinae weratha paponaein. Bapon yaitama bepa petaxutha ponaei. Bara xotiya, Aso tomaratha paichichipan payapitan Pablo.

¹⁴ Poxonae Pablo Aso tomaratha pacax-ibarucupan, bapon equeicha pana yantaba. Mitilene tomara beya pawarapan.

¹⁵ Mitilene tomara wepawarapiyan. Bapoxonae icha matabitha imoxoyo Quío tunaetotha papatan icha muxunenetha. Baraxota caentacabitha paenan. Equeicha icha matabitha Samos tunaetotha papatan. Barapoxonae equeicha icha matabitha Mileto tomaratha papatan.

¹⁶ Baxua Pablo exana tsipei bapon nanta xeina xua jopa beecaeyo ainya matabin Asia nacuatha. Bapon aichaxaibi pona Efeso tomaratha. Ichichipa Jerusalén tomara beya bichoina peponaewa tsane, tsipei imoxoyo bara Pentecostés matabi tsane, icha bara pecui jupaenexatsi.

Meje yabara poxonae Pablo tsipaeba penapatae jiwi Efeso tomaratha

¹⁷ Pablo Mileto tomaratha eca. Pablo najume caitoroba ichamonae xua Efeso tomaramonae pitiri jiwi pewabinexatsi pomonae Jesús pejume cowantsiwichi, xua Mileto tomaratha pepatsinexa.

18 Poxonae Efeso tomarapiwi, penapatae jiwi pata baxota, Pablo barai, jeye: “Bara paxam payaputaneme xua wɥnae poponan poxonae copiya patopan Asia nacuatha painya xantha. Awiya cataunxuae barichin wɥnae poponan.

19 Daxita matabi Jesús pejume diwesi cueicueijan tsaibi. Jopa bichocono atsaca tsaibinyo. Jume wɥnaeya natsipaeban saya. Poxonae Nacom pon jiwi Pecanamataxeinaein pejume diwesi cueicueijan, bichocono yaitawanaeya cueicueijan yawa nejume yancababeiba judiomonae yawa bepa nejutebeibei.

20 Paxam payaputaneme xua jopa nacui baraxubinyo xua tapaca tsipaebiwatsi Jesús pejume diwesi xua po coyene painya nepaca yawenaewa tsane. Paca cuidubatsi jiwi peitabaratha tatsi. Mataɥtano painya boxithano paca cuidubatsi.

21 Judiomonae jume daunweya cuiduban. Irɥrɥ pomonae jopa judiomonae naexanaeyo jume daunweya cuiduban xua barapomonae bewa icha jɥntɥ coyene pexeinaenexa Nacomtha xuano pejume cowɥntsinexatsi Jesús pon Wanacanamataxeinaein.

22 Nacom pia Pejumope tɥnaxɥ tatsi neitoroba xua bewa ponaetsipanjei Jerusalén tomara beya. Ichitha jopa nayaputaeyo pocotsiwa xua baxotiya tsane ichamonae inta exanaena.

23 Jame anoxuae saya meisa yaputan xua Nacom pia Pejumope tɥnaxɥ tatsi yabara netsipaeba xua daxita tomaran ichaxota pateibin. Nebarai, jeye: ‘Jiwi pecɥbi bontha cajebeibina, yawa caperaxa exaneibinano’, nejei Nacom pia Pejumope tɥnaxɥ tatsi.

²⁴ Juntucuru xua icha tɔpan, baraxua jopa net-sita ainya cuiyo. Bara jemba tsane icha saya poponaein. Icha tɔpan, bara jemba tsane. Daxota neitacɔpa xua jantɔ coyene weiweinaya exanaein pocotsiwa Jesús neitoroba beya yacuiya tɔpajopaein. Matautano daxota neitacɔpa xua wetsin pocotsiwa Jesús neitoroba, pon Pecana-mataxeinaeinchi jiwi, xua tapaca tsipaebiwatsi barapo pexeinya jume diwesi po coyene xua bi-chocono jiwi peantobewatsi Nacom.

²⁵ “Bayatha paca tsipaebatsi Nacom Pejume Diwesi po diwesi yabara xua Nacom waba jiwi, petanaexanaenexa tsainchi pijimonae jiwana tatsi pomonae itorobiya peewatsixae. Anoxuae bara xaniwaicha yaputan paxam pomonae pamxaem xua paca tsipaebatsi barapo diwesi, equeicha jopa pana netaem tsane.

²⁶ Daxota anoxuae paca tsipaebatsi icha jopa pajume cowantsim, baraxua apara jopa tacoyiyo. Bara apara painya coyam tsipei bayatha bequein matowa paca tsipaebeibatsi pexeinya jume diwesi.

²⁷ Daxita xua Nacom neitoroba barapo diwesi omeicha paca tsipaebatsi. Jopa icha diwesiyo copatsinyo.

²⁸ Painya coutha xanepanaya pana najantɔ coyene yabara nanta xeinare. Matautano xaniwaicha payapu eenare pomonae Jesús pejume cowantsiwichi. Paxam pitiri jiwi pam, baxua paexande tsipei Nacom pia Pejumope tɔnaxɔ tatsi paca itoroba painya neyapu cainompaenexa tsane Jesús pejume cowantsiwi tatsi. Matautano baxua paexande tsipei barapomonae Nacom pia-

monae tatsi, tsipei pexanto tatsi tsitupa xua barapomonae jopa peweraweracaewa tsane.

²⁹ Yaputan poxonae warapaein tacoutha patsina ichamonae. Barapomonae Jesús pejume cowantsiwichi abe exanaeinchi. Barapomonae Jesús pejume cowantsiwichi ducapa exanetinchi icha neuthi ichi.

³⁰ Barichi painya jiwi jiwanamonae ajumebeya cuidubina xua jopa xainyeyo. Barapomonae cuidubina penaerabi diwesi, xua pomonae Jesús pejume cowantsiwichi pejume cowantsinexa barapo penaerabi diwesi.

³¹ Dota pam, xua peabe jume, painya nejume cowantsiwa. Pana necui yabara nanta xeinare xua paca cuidubatsi acoibi po weiyobe. Paca cuidubatsi merawithano, mataqueithano. Matautano paca siwa wecoyeichi ichacuitha.

³² "Tamonae pam, Nacomtha pacata tsipaebatsi xua paca necayawenaewa tsane, xuano xua Nacom Pejume Diwesi painya necayawenaenexa po diwesi xua paca cuiduba xua pinae Nacom paca antobe. Barapo Nacom Pejume Diwesi peayapuswa xeina xua ajuntuyapusya paca cana exanapona. Matautano paca catsina daxita pocot-siwa bayatha pepa piamonaetha yabara tsiwanae muxu duta xua catsiba paeba.

³³ Jopa taichichi tsaibinyo xua ichan pia paratixi tatsi matautano xua ichan pia paparuwan tatsi.

³⁴ Jame bara payaputaneme xua tacoutha natsiyabara nacuitan. Bara tawa comotan. Matautano xua pexaewa comotan, paparuwano. Matautano yawenan pomonae xua necueyaba.

³⁵ Bayatha payaputaneme xua daunweya

nacuitan. Baxua exanan tsipei ichichipan xua painya neyaputaewa tsane, xua painya neyawenaenexa pomonae peacopeibi jiwi. Jopa pajuntemainaeinde xua Jesús pon Pecanamataxeinaein jiwi namchi, xua jeye: ‘Ba juntu coyene weiweina bichocono pon cata beyacaincha xua pon pecatsixaetsi’, jei Jesús”, jei Pablo.

³⁶ Poxonae Pablo najume wetsiya paeba, poxonae xua pitiri jiwi tsipaebatsi, bapoxonae pentabocototha uncua. Pablo daxita baru tsipaeba Nacomtha.

³⁷ Barapoxonae daxita matowa wecoyei. Yawano matowa naisal teicatsino Pablo poxonae tsutsubatsi, peantobexaetsi.

³⁸ Barapomonae bichocono wecoyei tsipei Pablo bayatha namchi, jeye: “Equeicha jopa pana netaem tsane”, jei. Barapoxonae barapomonae Pablo jera bepuna tayathopiyatsi po naetha po nae pin nae.

21

Meje yabara poxonae Pablo weratha Jerusalén tomara bewarapiya po naetha po nae pin nae

¹ Poxonae Jesús pejume cowantsiwichi pacuenta ponan, barapoxonae Cos tomara bepawarapiyan weratha. Barapoxonae icha matabitha Rodas tomara bepawarapiyan weratha. Barapoxonae equeicha icha matabitha Pátara tomara bepawarapiyan weratha.

² Pátara tomaratha baxota equeicha icha nae panotarucupan. Fenicia tomara bepawarapiyan.

³ Poxonae Chipre tunaeto patan pamatawacaicha toqueban. Barapo tunaeto pata tatsocoana iya paxenta iyiyan. Siria nacua bepaiyan. Barapo nae Tiro tomaratha botouna, pejotsinexa tsane xua capona. Tiro tomaratha paxubarucupan barapo nae. Baxota painompanno.

⁴ Baraxota Tiro tomaratha pacaxibarucupan pomonae Jesús pejume cowantsiwichi. Barapomonae pia xantha tatsi pajinompan siete po merawiyobe. Barapomonae Pablo tsipaebatsi, jeichichi: “Jopa Jerusalén tomara beya ponaeinde”, jeichichi. Nacom pia Pejumope tɨnaxɨ tatsi barapomonae yabara tsiwanaya tsipaebatsi po coyene xua ichamonae Pablo cana exanaeinchi barapo tomaratha.

⁵ Poxonae barapo siete merawiyobe payapucaewan paponarucupan. Daxita pomonae Jesús pejume cowantsiwichi, tomara weya pana nepu taeumenathopiya yabɨxino pexuino. Taetabo mene itapa bepaiyan. Baraxota pentabocototha paumenan. Nacom patsipaeban.

⁶ Pana napeyaban barapomonae, pana naisa teica pata taneantobexae. Bapoxonae equeicha jera panotarucupan, barapomonae equeicha pia boxi benawibiya.

⁷ Bara papanenebiyan tsɨrɨcupae xua Tiro tomara weya paponan. Tolemada tomara beya papanenebiyan. Baxota equeicha pajacoban pomonae Jesús pejume cowantsiwichi. Caentacabitha baxota pajinompan.

⁸ Icha matabitha, Pablono yawa xua pomonae pata tacueyabixae pan Cesarea tomaratha

papatan. Barapo tomaratha Felipe pia bo tatsi bepaiyan. Bapon Nacom Pejume Diwesi pecueicueijeji ducuaenaebiyae jiton. Bapon jiwana pomonae siete poyobe pomonae peyawenae jiwi. Barapo siete poyobe, matha cain itapetatsi Jerusalén tomaratha xua Jesús pia peitorobi jiwi tatsi peyawenaenexatsi. Barapon pia xantha tatsi paenan.

⁹ Felipe cuatro po pexantiyobe tatsi xeina. Barapowaxi cataunxuae jopa jitha enaeyo. Barapowaxi tsipaeba jiwi Nacom Pejume Diwesi xua Nacom yaputane exana.

¹⁰ Baxota caentacabiyobe paenan Cesarea tomaratha. Barapoxonae Judea nacuapin patopa, pon Nacom pia peitorobi pepaebin, pon pewan Agabo.

¹¹ Agabo pana nesiwa pona. Pablo coreinya bocoto mara wejontatsi. Barapo coreinya bocototha petaxuno, pema_{xu}no Agabo pia coutha nacaecunta cubaxuba. Barapoxonae Agabo namchi, jeye:

—Bayatha Nacom pia Pejumope t_unax_u tatsi netsipaeba po coyene xua judiomonae exanaena Jerusalén tomaratha. Bepa pinae barapomonae caiche tsane pon xua pia bocoto pexeinaein pocotsi bocote, ichaunxuae naichin, bara j_uta caichi tsane pinae. Mata_utano bepa pinae barapomonae cacaponae pomonaetha pomonae penanapaincha jinompaewi xua icha nacua werena peponaewi, jei Agabo.

¹² Poxonae baxua pajume tan, paxan ir_u pomonae Cesarea tomarapiwi Pablo pabaran, pajanje:

—Bara, jinxoba poname Jerusalén tomara beya, pajan.

¹³ Ichitha Pablo pana jume nota, jeye:

—¿Eta xua metha pana siwa wecoyam? ¿Eta xua metha pana itanuwe forotame? Bara bay-atha nacui yabara jume wetan tanecabinexa tsane, matautano tatupaenexa tsane Jerusalén tomaratha tajume cowantsixae Jesús, pon jiwi Pecanamataxeinaein, jei Pablo.

¹⁴ Bequein Pablo jume daunweya pabaran xua jopa ponae tsane ichitha Pablo dapo jumetha bepa ponaei. Matapainya saya jopa equeicha pata jumeyo. Matautano pajan:

—Basaya moya baxua exanaena be pocotsi coyeneya xua Nacom ichichipa, pajan.

¹⁵ Bapoxonae poxonae pana jume wetan baxua, bara nama paxainxainyan. Bapoxonae Jerusalén tomara bepawarapiyan.

¹⁶ Ichamonae Cesarea tomarapiwi, pomonae Jesús pejume cowantsiwichi pana nepuna pona. Pana capona bo beya pata tajinompae tsane, pebin pon pewen Mnasón, bapon pia bo beya tatsi. Bapon Mnasón Chipre tunaetopin. Bapon pinae caena bayatha jume cowanta Jesús.

Meje yabara poxonae Pablo, Santiago siwa poinchi

¹⁷ Poxonae Jerusalén tomaratha papatan, baxota pomonae Jesús pejume cowantsiwichi weiweinyana pana matenta waba bichocono.

¹⁸ Icha matabitha Pablo pana nebaru pona. Pasiwa ponan Santiago. Baraxota iru daxita pitiri jiwi jinomparu.

¹⁹ Barapomonaē Pablo jacobā. Bapoxonaē tsiwiyo bexa Pablo tsipaeba daxita po coyene xua Nacom exana pomonaetha pomonaē jopā judiomonaē naexanaeyo. Yawano paeba po coyene Pablo itorobatsi Nacom, xua petacaponāenexa Nacom Pejume Diwesi tatsi.

²⁰ Poxonaē jume tane baxua xua Pablo paeba, barapoxonaē barapomonaē Nacom w̄naē jaintatsi. Nexata Santiago Pablo baraichi, jeye:

—Taema, incane jume taema. Judiomonaē pin bicheiton tsoponaē, pomonaē bayatha Jesús jume cow̄ntatsi. Daxita barapomonaē namuxutainyaba xua pinaē daxita jiwī nantawenona xua Moisés pia peitorobi coyene exanapona.

²¹ Cayopita ichamonaē xua pinaē cuidubame judiomonaē pomonaē icha nacuantha pejinompaewi. Pinaē cuidubame xua equeicha pinaē barapomonaē bewa jopā yabara jume cui exanaē pocotsiwa bayatha Moisés itoroba. Matautano pinaē cuidubame barapomonaē xua pinaē jopā bewa penawi thabi coyene exanaē tsane xua pewi thabiwa pia pexui ichaxota nareixacaena xua ichaxota pebiwixae xeina. Matautano pinaē cuidubame xua barapomonaē bewa jopā exanaē barapo peitorobi coyenewan xua pinaē pocotsiwa wamo jiwī bayatha exaneiba.

²² ¿Eta xua waxainchi exanaeinchi? Tsipei judiomonaē, pomonaē pejume cow̄ntsiwi Jesús, nacaetutsina xote barapo Jerusalén tomarathe, poxonaē jume taena xua patopame.

²³ Paxan xua paca itorobatsi baxua exande. Taema xote pata xantha cuatro poyobe poponabe pebiwi. Barapoyobe yabara nacui w̄naē

tsijume dutabe Nacomtha pocotsiwa xua exana-paeba. Anoxuae baxua barapomonae bewa exanae pocotsiwa bayatha exanapaeba.

²⁴ Barapomonae matakayande paratixi nanacui baru nantomare sacerdotemonaepintha, xam nexano iru barapomonae nexano xua jopa painya nenajuntu coyene taxobinexa. Nanacui baru nantomare, barapoyobe penanta catepateya sibapentsinexa tsane. Icha baxua exanaename, daxita jiwi cacui yaputaena xua bayatha jopa exanaem xua ichamonae abe cayabara paeba. Yawa daxita jiwi cacui yaputaena xua xam xaniwaichiya exaname pocotsiwa Moisés itoroba.

²⁵ Paxan pata tinan carta pomonae Jesús pejume cowantsiwichi, pomonae jopa judiomonae naexanaeyo. Pata yabara tinan baxua xua pananta xeinan xua barapomonae beexanaetsipa. Pajan barapo cartatha: 'Painya xoba duwei pawu xaneme po duwein jiwi tsiseba ibo nacom. Matautano painya xoba paxaneme po duwein pon saya pipato tumpuncua, xuano painya xoba pajana xaneme. Painya xoba pasiwa xeiname yabuxi xua jopa painya seurixi', pajan, jei Santiago.

Meje yabara poxonae soldadomonae Pablo maxu waetabatsi judiomonae pin pia botha tatsi, bapoxonae jiwi pecubi bo beya caponatsi

²⁶ Nexata Pablo baru poinya barapo cuatro poyobe. Icha matakabi Pablo iru barapo cuatro poyobe exana po coyene xua jopa penajuntu coyene taxobiwa Nacomtha. Bapoxonae Pablo iru barapo cuatro poyobe Nacom pin pia botha tatsi jojoniya.

Pablo namchi, jeye: “Equeicha papatsinan si-ete po matakabibe poxonaē pawetsin po coyene xua daxota jopa pata najant_u coyene taxobiwa Nacomtha. Pacaponaēin duwein sacerdotemon-aepin pebexubinexa tsane xua pata catsinexa Nacom”, jei Pablo.

²⁷ Poxonaē barapo siete matakabiyobe imoxoyo yapucaewinaba, bapoxonaē Pablo judiomonaē Nacom pin pia botha tainchi. Pomonaē Pablo tainchi, barapomonaē judiomonaē pomonaē Asia nacua weya pona. Pomonaē Pablo tainchi, barapomonaē exana xua pin bicheito namtsebiya wawai xua Pablo pecasebixaetsi. Bapoxonaē Pablo waetabatsi.

²⁸ Jume daunweya wawai, jeye: “¡Pajume taema, paxam pomonaē Israel nacuapiwi pamxaem! ¡Pana yawende! Barapon cuiduba ducuaenaēbiya daxita jiwi. Abeya naca yabara cui cueicueijei. Matautano abeya yabara cueicueijei Moisés pia peitorobi coyenewan tatsi. Matautano barapo Nacom pin pia bo abeya yabara cueicueijei barapon. Matautano bapon griegomonaē matakapoinchi barapo Nacom pin pia bo berena. Poxonaē Pablo matakapona griegomonaē, Nacom pin pia botha tatsi atutube exana”, jei barapomonaē.

²⁹ Baxua paeba, tsipei poxoru bayatha barapomonaē Pablo tainchi Jerusalén tomaratha. Baxota Pablo bar_u pona Efeso tomarapin, pon pewan Trófimo. Daxota barapomonaē catsawa nanta xeina xua metha bayatha Pablo Nacom pin pia botha bar_u pona Trófimo. Daumetha Trófimo baxota jopa naponaeoyo.

³⁰ Daxita tomarapiwi j_upaya equeicha jume

daunweya wawai. Daxita cuinaerendena, barapomonae Pablo yoroba teicatsi. Nacom pin pia bo wemaxu capoinyatsi. Barapoxonae barapomonae bichocono yaboupa cateitabanota Nacom pin pia bo.

³¹ Barapomonae, pomonae peanaepanaewi muxu Pablo pebexubichi. Bara nexata romanomonae soldadomonae pia pepa pentacaponaein tatsi jume tane xua daxita Jerusalén tomaramonae najume cayayataxuba.

³² Nexata soldadomonae pia pepa pentacaponaein tatsi, bapon pia soldadomonae copiya piamonae caeacetuteta. Bapoxonae barapo soldadomonae pin bicheito becuinaeyiya ichaxota Pablo muxu pebexubichi. Poxonae barapo soldadomonae taerucupatsi barapo bicheito xainya umenarucupa. Barapoxonae barapomonae equeicha jopa Pablo batsi.

³³ Nexata soldadomonae pia pepa pentacaponaein tatsi Pablo imoxoyo caquita uncuatabatsi. Bapoxonae Pablo maxu waetabatsi. Bapon soldadomonae pia pepa pentacaponaein tatsi piamonae itoroba xua ainya naintothabe pemaxu cubaxubinexatsi Pablo. Bapoxonae bapon soldadomonae pia pepa pentacaponaein tatsi yainyaba pin bicheitha, jeye: “¿Jintam baraponda? ¿Eta xua metha bapon exana?” jei.

³⁴ Ichitha barapomonae ichawan caununaya wawai. Ichamonae ichawa wawai. Daxota bapon soldadomonae pia pentacaponaein tatsi jopa xapain jume taeyo. Bapoxonae bapon soldadomonae pia pentacaponaein tatsi Pablo itorobatsi soldadomonae pia bo beya tatsi.

³⁵ Poxonae patopa soldadomonae pia bo beya, penonobabeiyaewatha xua nonababeibiya soldadomonae Pablo yoichiya capoinchi bara beya. Pin bicheito bichocono anaepana daxota Pablo yoichiya capoinchi.

³⁶ Barapo pin bicheito soldadomonae cayabara wawaya punaenapoinchi, jeye: “¡Maisa pabexore bapon!” jei barapomonae.

Meje yabara poxonae Pablo paeba barapomonae peitabaratha

³⁷ Poxonae juntucuru Pablo soldadomonae pia bo beya capoinchi, Pablo barai soldadomonae pia pentacaponaeintha tatsi, jeye:

—¿Metha ichauyo catsipaebichipatsi? jei Pablo.

Poxonae baxua jume taeba, soldadomonae pia pentacaponaein tatsi yainyaba, jeye:

—¿Xam necueicueijeinda griego jumera?

³⁸ ¿Xam barapo jitomda egipcio nacuapimda, pon nacaetuteiba exaneiba pijimonae xua ichamonae pejutebeibinexa tsainchi? ¿Xam barapomonae pia pentacaponae tatsi, pon xua mataponaponaem cuatro mil jiwi ichaxota ira xuepana susato tsurucuae nacuatha? jei soldadomonae pia pepa pentacaponaein tatsi.

³⁹ Nexata Pablo jume nota, jeye:

—Apara pepa judiomonaepiyon. Tarso tomaratha naexanan. Tatomara ainya cui tsipei pepa tomara. Tarso tomara Cilicia nacuatha eca. Nejume cui yabara copare xua barapomonae tatsipaebiwa tsane, jei Pablo.

⁴⁰ Soldadomonae pia pepa pentacaponaein tatsi bara Pablo yabara jume copatatsi xua Pablo bara

pepaebiwa tsane. Pablo ichaxota nonababeibiya baxota asiya uncua. Yawa pecobetha jume matawenta barapomonae xua moya peenaenexa. Poxonae moya enarꝛꝛꝛa barapomonae, Pablo hebreo jumetha cueicueije. Namchi, jeye:

22

¹ “Tamonaē pam, irꝛ pomonaē pitiri jiwī pam, pana nejume taema xua tapaca tsipaebiwa tsainchi xua tana nabaꝛꝛ jume yawenaewan”, jei Pablo.

² Poxonae barapomonae jume taerꝛꝛꝛa, xua Pablo hebreo jumetha cueicueije, barapomonae moya enarꝛꝛꝛa. Pablo barapomonae barai, jeye:

³ “Xan apara judiomonaēpin. Bayatha naexanan Tarso tomaratha, Cilicia nacuatha. Saya apara Jerusalén tomaratha wichaban. Baxota nacuiduban po coyenein wamo susato jiwī itorobeiba. Daxita barapo coyenein pebin pewꝛꝛ Gamaliel, necuiduba. Necui eeneiba xua Nacom tanacuiteiban xua daxita tajꝛꝛꝛꝛ coyenewatha icha anoxuae daxita paichiponaem.

⁴ Bayatha jeiteiban pomonaē pejume cowꝛꝛꝛꝛsiwi Jesús pia pena pecuidubiwa tatsi. Teiqueibanno, jiwī pecꝛꝛꝛꝛ bo beya caponeiban, pebiwino yawa yabꝛꝛꝛꝛino. Tsipei ichichipan xua ichamonae jutebeiba xua barapomonae pejutebeibinexatsi.

⁵ Sacerdotemonaē pia pentacaponaein tatsi irꝛ pitiri jiwī paca tsipaebina xua bayatha barapomonae necata cartan xua barompaya wajudiomonaē nexa xua Damasco tomaratha. Barapo cartanxae neitacꝛꝛꝛꝛa xua tateicaewa

tsane pomonae Jesús pejume cowantsiwichi. Baxota Damasco tomaratha ponan tajeichinexa pomonae Jesús pejume cowantsiwichi, tsipei tha Jerusalén tomara becayaetsi barapomonae, matautano tsipei tha yamaxu cubiya caponaetsi taperaxa exanaenexa tsane barapomonae”, jei Pablo.

Meje yabara poxonae Pablo diwesi paeba xua poxonae po coyene pejume cowantsiwa Jesustha

⁶ Equeicha Pablo jeye: “Damasco tomara namtotha ecaponan, bara nama mateinyaxae tsuxubi. Poxonae bara muxu tapatopaeba barapo tomaratha, bapoxonae pin coicha neyancataba. Taxainya benematawacaicha jopeica. Peitaboco wejopeica.

⁷ Iratha jopan. Bapoxonae peitaboco wenebaraichica. Jume taeuncuan, nebarai, jeye: ‘Saulo, Saulo, ¿eta xua metha tamonae inta abe exaname?’ jei.

⁸ Nexata yainyaban: ‘Pon jiwi Necanamataxeinaem, ¿jintamunda?’ jan. Nejume epa pita, jeye: ‘Apara xan Jesús, Nazaret tomarapin ponxaein tamonae inta abe exaname’, nejei.

⁹ Pomonae nepuna pona iru coicha taneno. Bichocono bapomonae junuwa. Saya meisa coicha tane, saya jopa jume taeyo po jume xua nebaraichica.

¹⁰ Nexata yainyaban: ‘Pon jiwi Necanamataxeinaem, ¿eta pocotsiwa metha exanocuaein?’ jan. Bapon nebarai, jeye: ‘Nontaponde Damasco tomara be-iyande barapo tomaratha, ichun yabara catsipaebina pocotsiwa xua bewa exanaename’, nejei.

¹¹ Barapo coicha bichocono neitata naquitaba exana. Pomonae nepuna pona Damasco tomara benema_h cayiya.

¹² “Barapo tomaratha, Damasco tomaratha, cou pebin popona, bapon pew_hn Ananías. Bapon daxita yabara jume cuiya exaneiba Moisés pia peitorobi coyene tatsi. Barapo judiomonae, Damasco tomaratha, barapomonae Ananías xanepanaya yabara paebeibatsi.

¹³ Ananías nesiwa pona. Bapon nebarai: ‘Saulo, tamonae jitom, equeicha caewa nepu necotsinde’, jei. Bara caena barapoxonae equeicha caewa necotaxuban. Bapon bapoxonae taenotan.

¹⁴ Ananías nebarai, jeye: ‘Pata amo jiwi pia Nacom tatsi bayatha itapeta cawaba xua neyaputaenexa tsane xua Nacom caitoroba. Caitapeta xua netaenexa pon yatsicaewa pej_hnt_h coyene xanepanaein, mata_htano nejume taenexa pocot-siwa catsipaeba.

¹⁵ Aunxuae Jesús yabara cueicueijam tsane daxita nacuan j_hpayantha. Yabara paebiname daxita xua taneme xuano xua jume tanemeno.

¹⁶ Anoxuae, ¿eta xua metha came ecame? Nontaponde. Barab_h ich_hn cabautisabina Jesu-cristo pew_hntha, pon jiwi Pecanamataxeinaein, necayabara j_hntemainaenexa abe jinya neexanae cuiru coyenein’, nejei Ananías”, jei Pablo.

Meje yabara poxonae Pablo nayabara paeba xua peitorobiwatsi ichaxota pomonaetha pomonae jopa judiomonae naexanaeyo

¹⁷ Pablo cataunxuae cueicueijei, jeye: “Poxonae caibe nawiyán Jerusalén tomara beya, Nacom

pin pia botha tatsi ponan. Barapo botha Nacom tsipaeban. Bapoxonae camaitan xua netsita naitaata.

¹⁸ Jesús necotan, pon jiwi Pecanamataxeinaein. Bapon nebarai: ‘Antha yacuinaya pontabare Jerusalén tomara weya, tsipei barapomonae jopa xapain cajume cowantsi tsane xua tana neyabara paebiwam’, jei Jesús.

¹⁹ Nexata jume epa pitan: ‘Pon jiwi Necanamataxeinaem, barapomonae bayatha necui yaputane xua poneiban daxitan judiomonae pia penacaetutsi bontha tatsi. Bayatha jiwi pecubi botha caponeiban, pomonae necajume cowantsiwi. Mataatano bichocono beibanno.

²⁰ Poxonae Esteban bichocono jana othopeica xan saya cui necotuncuan. Bapon Esteban pon cajume cowanta bayatha. Bapon jinya diwesi pecanantsipaebin. Poxonae Esteban bexotsi, saya cui matu taeuncuan. Yabara jume baru cui jejan poxonae barapomonae Esteban bexubapae-batsi. Barapomonae pipaparuwan tajeban’, jan Jesthatha.

²¹ Ichitha bapon pon jiwi Pecanamataxeinaein nebarai: ‘Antha ponde. Aunxuae tajū caitorobinchi barapomonae beya, pomonaetha pomonae jopa judiomonae naexanaeyo beya’, nejei”, jei Pablo.

Meje yabara poxonae soldadomonae pia pentacaponaein tatsi Pablo waetabatsi

²² Pablo cataunxuae paebuncua barapo penonobabeibiyathopaewatha soldadomonae pia botha. Poxonae Pablo jume taerucupatsi

xua bepa pinae ponaena pomonaetha pomonaee jopa judiomonaee naexanaeyo beya, bapoxonaee barapo bicheito namtsebiya wawai, jeye: “¡Maise bapon pabexore bara! ¡Dapocotsin jopa bewa poponaee!” jei.

²³ Awiya came barapomonaee wawai tsonpae. Yawa pia paparuwan anaya nanubaba. Yawa taetowan anaya athabe bebeicha.

²⁴ Romanomonaee soldadomonaee pia pepa pentacaponaein tatsi, bapon pia soldadomonaee itoroba xua Pablo pecaponaenexatsi soldadomonaee pia bo beya tatsi xua jiwi pecubi bo. Baxota Pablo capoinchi pecuainchinexa tsainchi xua daxota Pablo peyabara paebiwa tsane baxua xua Pablo peyabara namtsebiya wawaichiwatsi judiomonaee.

²⁵ Poxonaee bara juntucuru Pablo maxu cutanotatsi xuano juntucuru muxu pebetsino, Pablo barai soldadomonaee pia pentacaponaein tatsi, jeye:

—Jopa be pana necuainchipaem tsipei apara xan romanomonaepin. Matautano baxua jopa pana necanaichipaem icha jopa neyabara paebiyo pon jiwi peyabara paebin penatsicuentsiwa xua abe peexanaexae, jei Pablo.

²⁶ Poxonaee baxua jume tane, soldadomonaee pia pentacaponaein tatsi, bapon pona pia pepa pentacaponaein tatsi beya. Bapon namchi pia pepa pentacaponaeintha, jeye:

—Dota xua xam cana exanaename bapontha. Apara cou deta Pablo iru romanomonaepin, jei.

²⁷ Nexata soldadomonaē pia pepa pentacaponaein tatsi, bapon Pablo imoxoyo caquita uncuatabatsi. Bapon Pablo yainyabatsi, jeichichi:

—¿Bara yatsicaya xainyei bara xam romanomonaepim? jeichichi Pablo.

Pablo jume nota, jeye:

—Aa, bara xan tsocuaein, jei Pablo.

²⁸ Soldadomonaē pia pepa pentacaponaein tatsi Pablo jume notatsi, jeichichi:

—Xan ir_u barichin romanomonaepin. Nacui yabara matomatan bichocono pin paratixi matoma xua romanomonaepin tana naexanaewa tsane, jei.

Pablo namchi, jeye:

—Apara seicaya nama xan caena bayatha pexuyothan yacuiya naexanan romanomonaepin, jei.

²⁹ Poxonae Pablo baxua paeba, bapoxonae pomonae Pablo muxu pecuainchichi Pablo pexeinya wetanatsixibar_uc_upiyatsi. Ir_uu_u bara wenatsixitabiya soldadomonaē pia pepa pentacaponaein tatsi tsipei bapon yaputane xua Pablo apara romanomonaepin. Daxota junuwa xua Pablo pemax_u c_ubixaetsi.

Meje yabara poxonae Pablo pentacaitorobi bicheitomonaē peitabaratha uncuā pomonae judiomonaē

³⁰ Icha matabitha soldadomonaē pia pepa pentacaponaein tatsi bepa yaputaei, bepa jeyei: “¿Eta xua metha Pablo yabara anaepanatsi judiomonaē?” bepa jeyei. Daxota bapon, Pablo taxuenaxotsi xua max_u c_utatsi. Nexata bapon itoroba

xua sacerdotemonae pia pentacaponaei tatsi iru pentacaitorobi bicheito nacaetutsina. Pablo bara bebaru iyatsi. Baraxota cuaranotatsi barapomonae peitabaratha tatsi.

23

¹ Pablo pentacaitorobi bicheito beya bichocono naita cui dutsiya necoya. Pablo barapomonae beya namchi, jeye:

—Tamonae, caena bayatha beya anoxuae juntu coyene xanepanaya poponan Nacom peitatha tatsi, jei Pablo.

² Nexata sacerdotemonae pia pepa pentacaponaein tatsi, Ananías, bapon itoroba xua Pablo pecoibo cuainchinexatsi pomonae Pablo imoxoyo caquita peumenaexaetsi.

³ Ichitha Pablo jume nota, Ananías jume notatsi, jeye:

—Xam ponxaem itara mexeya xanepanaya nepaebin ichitha jiwi nemuxuitorobin, Nacom cacuainchina. Xam ecame xote jinya tana neyabara paebinexam tana natsicuentisiwa xua abe taexanaexae icha be pocotsi coyeneya Moisés pia peitorobi coyenetha baxua yabara paeba. Ichitha xam jopa xapain exanaem poxonae ichamonae itorobame xua tana necoibo cuainchinexa poxonae Moisés pia peitorobi coyenewatha jopa baxua itorobiyo, jei Pablo.

⁴ Pomonae Pablo imoxoyo caquita umeinchi, jeichichi:

—Apara sacerdote pia pepa pentacaponaein tatsi abe tsipaebame pon Nacom tanacuitatsi, jei barapomonae.

⁵ Pablo jume nota, jeye:

—Tamonae, jopa yaputaeyinyo xua pon tsipaeban apara sacerdotemonae pia pepa pentacaponaein tatsi. Icha yaputaetsipan, jopa paebinchipae. Nacom Pejume Diwesitha namchi, jeye: ‘Jopa bewa painya pentacaponaewi jiwana abe pajainchim pomonae xua painya tomaratha’, jei Nacom Pejume Diwesitha, jei Pablo.

⁶ Nexata Pablo cui yabara nanta xeina barapomonaetha tsipei ainya bicheitobe, ichamonae saduceomonaer_u, ichamonae fariseomonaer_u. Daxota bapon Pablo jume daunweya wawai barapomonaetha, jeye:

—Tamonae, bara xan apara fariseomonaepin, yawa fariseomonaepin pexanton. Tsipei jume cow_untan xua jiwi pet_upaewi equeicha as_u tsaibi tsane daxota pana necaponame painya tana neyabara paebinexam xua tana natsicuentsiwa xua abe taexanaexae, jei Pablo.

⁷ Poxonae Pablo baxua paeba saduceomonaer_u fariseomonaer_u najume matsontsonobabe. Barapo bicheito ainya bicheitobe naexanabe, tsipei barapo bicheitobe seicaya barompaya nabar_u nanta xeina.

⁸ Saduceomonaer_u paeba xua pinae pet_upaewi jopa equeicha as_u tsaibi tsane. Mata_utano barapomonaer_u paeba xua pinae matatsunpiwi jopa jinompaeyo, mata_utano pinae dowatsi dapomonaer_u pinae ajibi. Ichitha meisa fariseomonaer_u jume cow_unta daxita barapo diwesin, xua pinae pewerapeibiwi equeicha as_u tsaibi tsane, mata_utano xua pinae dowatsi jinompa, xuano xua pinae matatsunpiwi bara jinompa. Daxita barapo diwesin

fariseomonae jume cowanta. Ichitha nama sarduceomonae jopa daichiyo.

⁹ Daxita barapo bicheitobe namtsebiya wawai. Fariseomonae jiwana ichamonae nonobapona. Barapomonae yaputane nawita Moisés pia peitorobi coyene tatsi. Barapomonae namchi, jeye:

—Bapon Pablo jopa abe exanaeyoba, metha dowatsi bapon tsipaebatsi, ichacuiha metha matatsunpin bapon tsipaebatsi, jei barapomonae.

¹⁰ Barapomonae daxita najume matsontsonobiya biatane. Bapon romanomonae soldadomonae pia pepa pentacaponaein tatsi, bapon bichocono junuwa tsipei Pablo tsana peruxunaeinchi. Daxota bapon romanomonae soldadomonae pia pepa pentacaponaein tatsi itoroba pia soldadomonae xua Pablo equeicha caponaeinchi soldadomonae pia bo beya tatsi.

¹¹ Icha mataqueitha merawi pon Pecana-mataxeinaein jiwi, Pablo imoxoyo caquita uncuatsi xua tsita naitatatsi. Bapon namchi, Pablo baraichi, jeye: “Pablo, najuntax coyene tsacatabare. Icha ichim xua Jerusalén tomaratha neyabara paebame barichinde equeicha Roma tomaratha neyabara paebare”, jei Jesús.

Meje yabara poxonae judiomonae nanta xeina xua Pablo pebexubiwa tsainchi

¹² Icha mataqueitha, ichamonae judiomonae peburuxya nanta jupaya nanta xeina xua Pablo pebexubiwa tsainchi. Barapomonae nayabara tsiwunae muxu duta Nacomtha xua bepa pinae jopa nabanae tsane, xuano jopa apae tsaneno

xua beya pinae yajainbonaya othopaena poxonae Pablo bexubinchi.

¹³ Barapomonaе pomonaе Pablo bexuba-paebatsi xuano xua yabara nainbotapaebatsi bichocono pinmonae beyacaincha xua pocotsi cuarenta po pebiwimonaeyobe.

¹⁴ Barapomonaе pona sacerdote pia pentacaponaeви tatsi beya, yawa judiomonaе pia pitiri jiwi tatsi beya. Barapo pebiwimonaeyobe barai barapomonaetha, jeye:

—Bayatha pana nayabara tsiwɛnae muxu duban Nacomtha xua jopa pata nabanaewa tsane beya tsane poxonaе cataunxuae jopa pabexubinyo tsane Pablo.

¹⁵ Paxam irɛ pomonaе pentacaitorobi bicheito, romanomonaе soldadomonaе pia pepa pentacaponaein tatsi patsipaebare xua bapon pia soldadomonaе peitorobinexa xua Pablo pecuaranotsinexa tsainchi painya itabaratha baya tsane. Romanomonaе soldadomonaе pia pepa pentacaponaein tatsi pamuxuitorobare. Naemata bapon pabarande: ‘Awiya peyainyabiwa paxeinan pata tha yainyabichi Pablo’, pajande. Paxan pata tha nama namtotha ewatumenaetsi. Pata tha bexuichi, poxonaе barapomonaе Pablo caponaeinchi, jei barapomonaе.

¹⁶ Pablo perobi tatsi jume tane xua barapo cuarenta po pebiwimonaeyobe namtotha nantsiyatsiya bobenapaeba pewaetabinexa tsainchi Pablo. Daxota Pablo perobi tatsi pona soldadomonaе pia bo tatsi beya. Baxota Pablo

perobi tsipaebatsi xua barapomonaе Pablo bepa bexubichei.

¹⁷ Nexata Pablo waba pon xua romanomonaе soldadomonaepin pia pentacaponaeви jiwana. Pablo namchi, jeye:

—Poye pewowin wato caponde romanomonaе soldadomonaе pia pepa pentacaponaein tatsi beya, tsipei bapoyo diwesiyo xeina xua petsipae-biwa tsane, jei Pablo.

¹⁸ Romanomonaе soldadomonaе pia pentacaponaein tatsi Pablo perobi tatsi capoinchi xua romanomonaе soldadomonaе pia pepa pentacaponaein tatsi beya. Bapon namchi, jeye:

—Pablo soldadomonaе pia botha peecaein, bapon neitoroba xua pinae bepa caponaеinjei poye. Tsipei pinae xeina diwesiyo xua necatsipaebinxexa, jei bapon soldadomonaе pia pentacaponaein tatsi.

¹⁹ Pablo perobi tatsi cobe pitatsi romanomonaе soldadomonaе pia pepa pentacaponaein tatsi. Baru natsixitabatsi aisowa beya. Bapoyo baraichichi, jeichichi:

—¿Jinya eta xua netsipaebichi? jeichichi.

²⁰ Nexata pewowin wato jume nota romanomonaе soldadomonaе pia pepa pentacaponaeintha, jeye:

—Judiomonaе peburuya nanta xeina xua bepa cawucaei xua Pablo baya necaponaenexa pentacaitorobi bicheitha. Bepa camuxuitorobei. Bepa jeyei: ‘Panantawenonan pata tha Pablo yainyabichi ichawiyo’, bepa jeyei barapomonaе.

²¹ Ichitha jopa jume cowuntsinde, barapomonaе namtotha nantsiyatsiya bobenapaeba

pewaetabinexa tsainchi taxuyo. Barapo cuarenta po pebiwimonaeyobe natsiwanae yabara muxu duba Nacomtha xua bepa pinae jopa nabanae tsane yawa jopa apae tsane beya pinae poxonae tsane poxonae Pablo bexubinchi. Anoxuae barapomonaе cajume cui ewata xua jam tsane: ‘Baya tsane Pablo pentacaitorobi bicheittha itorobinan’, jam tsane, jei Pablo perobi tatsi.

²² Nexata romanomonaе soldadomonaе pia pepa pentacaponaein tatsi barapoyo napeyabatsi. Pewowin wuto ponataba. Pewowin wuto baraichi, jeye:

—Ichantha jopa tsipaebinde xuaunxuae po diwesiyo netsipaebame, jei soldadomonaе pia pepa pentacaponaein tatsi.

Meje yabara poxonaе soldadomonaе pia pepa pentacaponaein tatsi Pablo itorobatsi Félix beya pon Judea nacuamonaе pia peyanacua ewatsinchi

²³ Romanomonaе soldadomonaе pia pepa pentacaponaein tatsi waba ainya pentacaponaeinbe. Bapon baraponbetha itoroba. Barai: “Soldadomonaе pacui wunaerebe doscientos po soldado matabuxube pomonaе xua petaxutha ponaena, iru setenta po soldado matabuxube pomonaе xua cawayutha ponaena, iru doscientos po soldado matabuxube pomonaе dejonan cajijincaena. Barapo bicheito daxita peponaenexa Cesarea tomara beya merawitha poxonaе a las nueve tsuxubi.

²⁴ Matautano pacui wunaerebe cawayu ayunbe xua Pablo peequeicaenexa tsane. Matautano

paitorobarebe xua Pablo beta pecaponaenexatsi, xua asano Félix beya”, jei.

²⁵ Bapon pia soldadomonaē caitoroba carta. Barapo cartatha namchi, jeye:

²⁶ “Xan Claudio Lisias. Félix, ponxaem tacabarū cui itura jinaeinchi, cajacobatsi.

²⁷ Pon anoxuae cata itorobatsi nexainya beya barapo pebin waetabatsi, judiomonaē waetaba. Muxu pebexuichi. Poxonaē jume tan xua bapon romanomonaēpin najainta daxota nainya soldadomonaē barū ponan bapoxonaē bapon capanepan.

²⁸ Tsipei tha yaputaetsi xua barapomonaē Pablo yabara paebatsi, daxota Pablo cuaranotan judiomonaē pia pentacaitorobi bicheitha tatsi.

²⁹ Jume tan xua barapomonaē Pablo yabara paebatsi xua pinaē bapon jopa exanaeyo icha be pocotsiwa barapomonaē pia peitorobi coyenewan tatsi paeba. Ichitha barapomonaē jopa xeinaeyo po coyene xua daxota Pablo pebexubinexatsi, xuano xua daxota jiwi pecabi botha peetsinexatsi.

³⁰ Ichitha bapoxonaē jume tan xua judiomonaē namuxuweta pebexubinexa tsainchi Pablo. Daxota Pablo nexainya beya itoroban. Tsipaeban judiomonaē pia pentacaitorobi bicheito tatsi. Janje: ‘Icha awiya Pablo pacui itawetsiname xua abe bapon exana —cabaraichi— bapon pia xainya beya paponare. Papaebare Félixtha baxua, pocotsiwa Pablo exana’, jan. Baja, Claudio”, jei barapo cartatha.

³¹ Barapo soldadomonaē exana pocotsiwa xua bayatha itoroba pon romanomonaē

soldadomonae pia pepa pentacaponaein tatsi itoroba pon pewun Claudio. Barapo soldadomonae barapo merawitha Pablo capoinchi Antípatris tomara beya.

³² Icha mataqueitha barapomonae soldadomonae pomonae petaxutha pona, caibe nawibiya ichaxota tauncuatsi soldadomonae pia bo beya. Pomonae cawayutha pona awiya Pablo baru poinchi.

³³ Soldadomonae Pablo capoinchi Cesarea tomara beya. Barapomonae soldadomonae Félix catatsi barapo carta. Pablono baxota punaxubothopatsi.

³⁴ Félix matha yoroba carta. Bapoxonae Pablo yainyabatsi, jeichichi:

—Pablo, ¿eta po nacua jitomda? jei.

Pablo jume nota, jeye:

—Bara Cilicia nacua piyon, jei.

³⁵ Félix namchi, jeye:

—Poxonae judiomonae patsina, pomonae xua abe cayabara paeba, bapoxonae cajume taeinchi xua tana netsipaebiwam tsane, jei Félix.

Bapoxonae Félix itoroba soldadomonae xua Pablo yapucaenaeinchi ichaxota po botha peitapanae bo, po bo Herodes cuenta naxuba.

24

Meje yabara poxonae Pablo Félix peitabaratha tatsi nayabara jume paeba

¹ Icha matabitha poxonae cinco po matabibe tsuxubi, pebiwi pata Cesarea tomaratha.

Ichun pewun Ananías. Bapon Ananías sacerdotemonaē pia pepa pentacaponaein tatsi. Iru pitiri jiwimonaeno pata. Iru pon xua petapaebeibin jiwi, pon pewun Tértulo bapon napatopa. Barapomonaē nacuara pata Cesarea tomaratha. Barapomonaē Félix peitabaratha taumeinchi, xua Pablo abeaya peyabara paebinxatsi.

² Poxonaē Pablo carendenatsi, Tértulo Pablo abe yabara paebatsi. Félix baraichi, jeye:

—Félix, xam pon pana yanacua ewatame. Daxota jantema xanepanaya pajinompan. Maisa bara beta itorobiya canamataxeiname jiwi jinya neyaputaē coyenewatha. Daxota xam beta exaname barapo nacuathe.

³ Félix, xam pon pata paca baru itura jinaeinchim, xua exaname yatsicaya wunaē nawita barapo nacue nexa.

⁴ Jopa ichichipaeinyo xua tacayatacutsiwatsi. Daxota catsipaebatsi xua saya caeto pana nejume taema xua pata paca catsipaebiwa tsainchi.

⁵ Anoxuae payaputan xua Pablo bichocono pana cui fayacota xua abe exana. Matautano bapon judiomonaē cui tsacabatsi xua nacaseba exanatsi daxita nacuantha. Matautano bapon, apara pomonaē nazarenomonaē barapomonaē pia pentacaponaein tatsi, pomonaē pecuidubi jiwi icha coyeneya pocotsiwa jopa xainyeyo.

⁶ Yawa Nacom pin pia bono tatsi juntucuru abe taexanatsino, poxonaē juntucuru baru jonyatsi pon jopa judiomonaē naexanaeyo Nacom pin pia botha. Daxota pawaetaban. Paxan paichichipan Pablo paperaxa exanan barompaya pata peitorobi coyenewa cuitha.

⁷ Ichitha soldadomonae pia pepa pentacaponaein tatsi, Lisias, daunweya pana wecobe maxu pitatsi Pablo.

⁸ Soldadomonae pia pepa pentacaponaein tatsi, Lisias, pana barai: ‘Pomonae Pablo abe jain-tatsi moya Félix peitabaratha papaebare’, pana jei Lisias, jei Tértulo.

Tértulo equeicha namchi, jeye:

—Félix icha yainyabatsipame Pablotha metha bara yaputaetsipame xuaunxuae cabaraichichi. Xuaunxuae Pablo yabara paeban baxua xaniyan yatsicaya, jei Tértulo.

⁹ Judiomonae, pomonae Tértulo puna poinchi namchi: “Tértulo bara xaniyei paeba”, jei.

¹⁰ Nexata Félix Pablo moya pecobetha jume itorobatsi. Bapoxonae Pablo Félix baraichi, jeye:

—Yaputan xua caena bayatha ainya wei xam naexaname pon jiwi neyabara paebin xua penatsicuentsiwa xua abe peexanaexae xua barapo tomarathe nexa. Daxota juntu coyene weiweinan xua tana nayabara paebiwa neitabaratha.

¹¹ Icha yainyabame barapomonae, Jerusalén tomarapiwi, catsipaebichipa xua bayatha Jerusalén tomara beya ponan. Baxota ponan tsipei Nacom pin pia botha wuna tajainchinexa Nacom. Anoxuae petain doce matabibe yapucaewan poxonae xua bayatha ponan bara beya.

¹² Jopa jume matsontsonobeibinyo jiwi. Yawa jiwi jopa jume cui tsacabeibinyo xua anaepanaya penajume cayayatsinexa. Baxuan jopa exanaeinyo Nacom pin pia botha. Matautano judiomonae pia penacaetutsi bontha tatsi,

baxuan jopa exanaeinyo. Matautano tomaran pecuariyathan jopa baxuan exanaeinyo.

¹³ Pomonae paeba xua pinae abe exanan, barapomonae jopa jume cupaetsi xua tana necui yopichiwa xua abe exanan.

¹⁴ Xaniwaicha catsipaebatsi xua xan Nacom tanacuitan pon tamo susato jiwi pia Nacom tatsi. Baraxua exanan xua jiwi cuiduban be pocotsi coyeneya xua paeba Jesús pia pena pecuidubiwa tatsi po pecuidubiwa judiomonae yabara nanta xeina xua pinae barapo pecuidubiwa jopa xainyeyo. Xan jume cowuntan daxita Moisés pia peitorobi coyenewan. Matautano po diwesin Nacom pia peitorobi jume pepaebiwini tina, barapo diwesinno jume cowuntan.

¹⁵ Xan barichindu, Nacom yabara baru jume cowantsiya ewatan icha barapomonae ichi xua po coyene pomonae pewerapaewi equeicha asu tsane, pomonae peajuntucoyenebe jiwi iru xua asu tsane pomonae pejuntu coyene xanepanae jiwino.

¹⁶ Daxota jopa najuntu coyene acaurinyo tsipei nayaputan xua Nacom beta taexanan. Jiwithano jopa najuntu coyene acaurinyo.

¹⁷ “Ainya wei dapaein saya icha nacuantha poponan. Bapoxonae equeicha tatomara beya poponan, Jerusalén tomara beya. Patopan baxota Nacom pin pia botha poxoru yaitama paratixi caponan xua tamonae nexa po paratixi ichamonae taitoroba. Matautano bara beyan xua baxotiya Nacom tatsita exanaenexa xua pocotsiwa be tacatsiwa Nacomtha, xua duwein tatautsiwa tsane.

¹⁸ Barapo coyenein awiya exanawiyani, be-

quein bayatha nenacui yabara jume weta exana po coyene xua daxota Nacom jopa tsitanyo xua taajuntucoyenebewan be pocotsi coyeneya xua judiomonae itoroba. Bapoxonae judiomonae pomonae Asia nacua weparena netaeba Nacom pin pia botha. Barapomonae baxota necaxiba bequein poxonae jopa jiwi namtsebiya wawaya exanaeinyo.

¹⁹ Pomonae netane Nacom pin pia botha pomonae Asia nacua werena pepatsiwi bewa dapomonae xote patsi xua necatsipaebinexa tsane xua tana neyabara paebinexa tsane xua abe taexanaewa.

²⁰ Icha barapomonae jopa patsiyo pomonae xote ena bu paeba. Barapomonae netane poxonae cain matha judiomonae pia pentacaitorobi bicheito peitabaratha uncuan. Barapomonae bu catsipaeba, icha metha bara abe exanan poxonae barapo pentacaitorobi bicheito peitabaratha tatsi uncuan.

²¹ Saya u baxua exanan poxonae peitabaratha uncuan, bapoxonae bichocono wawan. Janje: ‘Anoxuae poxonae paxam pana neyabara pae-bame xua tanatsicuentsiwa xua abe taexanaewa paxam pananta xeiname xua abe exanan yaitama jume cowantan xua pewerapaewi equeicha asu tsaibi tsane’, jan jei”, Pablo.

²² Félix caena bayatha yabara yaputane Jesús pia pena pecuidubiwa tatsi. Daxota Félix cataunxuae abu jopa baxua yabara paebiyo pocotsiwa barapomonae paeba. Daxota Félix namchi, bapomonaetha, jeye:

—Abu bexa pacatsipaebinchi, poxonae

soldadomonaē pia pepa pentacaponaein tatsi patopaena pon Lisias, bapoxonae yabara paebin pocotsiwa Pablo exana, jei Félix.

²³ Nexata Félix itoroba soldadomonaē pia pentacaponaein tatsi xua soldadomonaē Pablo cataunxuae yapu eeniya pebarū jinompaenexatsi Herodes pia botha tatsi, bequein bara copata xua Pablo bara exanaena be pocotsiwa xua bapon ichichipa exana barapo botha. Matautano copatano xua Pablo bara pesiwa ponaenexatsi piamonaē xua piamonaē peyawenaenexatsi xua pocotsiwa nantawenona bapon.

²⁴ Icha matabitha pirapaeyo Félix piowabe patopabe. Petsiriwa pewun Drusila. Barapowa judiomonaewayo. Félix najume caitoroba ichantha xua Pablo pewabinexatsi Félix berena, matautano xua Pablo Félix yabara petsipaebinxatsi xua po coyene jiwi jume cowanta Jesucristo.

²⁵ Pablo Félix tsipaebatsi xua pinae ainya cui xua jiwi beta yanthathiya jinompa icha be Nacom ichi xua beta yanthathiya popona. Matautano paebano xua pinae jiwi pia xoba abe exaneiba. Matautano namchino xua pinae caentacabitha tsane Nacom wabina daxita jiwi xua peyabara paebinxua xua penatsicuentsiwa xua abe peexanaexae barapo cae pin nacuathe. Félix najuntu coyene cabenaeca poxonae jume tane baxua. Pablo tsipaebatsi, jeichichi:

—Jinya tutu beya bara ponde. Bexa equeicha cawabinchi icha ichawiyo jopa neenaeyo, jei Félix.

²⁶ Félix nanta xeina xua paratixi pecatsiwa tsainchi xua Pablo pecatsiwa tsane xua daxota

Pablo pepu copatsinexatsi. Daxota memecabiya wabatsi Pablo.

²⁷ Baraxua exana beya yaainya weibe jopa. Barapoxonae Félix weta xua pon peyanacua ewatsin jiwi naexana barapo Judea nacuatha, xua icha nacua beya pewarapaexae. Ichun Félix pecoutha tatsi tapatopatsi pon pewun Porcio Festo pon xuya pon peyanacua ewatsin jiwi naexana Judea nacuatha. Félix ichichipa xua peweyataewatsi xua judiomonae peweyataewa daxota Pablo jopa copatichi xua bara yatsicaewa pepu copatsiwatsi xua pepanepaewa tsane.

25

Meje yabara poxonae Pablo Festo peitabaratha tatsi tauncuatsi

¹ Festo bara patopa xua penaexanaenexa pon peyanacua ewatsin jiwi. Poxonae acoibi po matacabibe weta Cesarea tomara weya pona, Jerusalén tomara beya pona.

² Barapo tomaratha Jerusalén tomaratha sacerdotemonae pia pentacaponawewi tatsi iru judiomonaeno pomonae pentacaponawewino, barapomonae Pablo abeya cui yabara canantsipae-batsi.

³ Barapomonae Festo baraichi: “Bu painta ichamonae Pablo Jerusalén tomara beya capoinchi”, jei. Barapomonae baxua Festo jeichichi, tsipei Pablo namtotha ewatabobenapaebatsi pebexubinexatsi.

⁴ Festo jume nota, jeye:

—Canta Pablo Cesarea tomaratha eca xua soldadomonae baru jinompatsi. Tha nama imoxoyo bara beya equeicha caibeya ponaetsi.

⁵ Painyamonaе jiwana pomonaе pentacapon-aewi moya bu barapomonaе nepuna pona Cesarea tomara beya. Icha Pablo abe exana, metha moya baraxota Pablo jame be cui yabara pae-bichipatsi barapomonaе, jei Festo.

⁶ Festo cataunxuae Jerusalén tomaratha ocho po merawiyobe yapucaewa xua equeicha ainya dapaeyobe. Barapoxonaе Cesarea tomara bewarapiya caibeya. Icha matabitha Festo eca peequibithopeibiwatha po tututha ichaxota yabara paebequeiba jiwi xua penatsicuentsiwa xua abe peexanaexae. Festo barai soldadomonae: “Painta caponde Pablo taxainya berena”, jei.

⁷ Poxonaе Pablo patopa, judiomonaе imoxoyo umenaruсpa pomonaе Jerusalén tomara weparena. Barapomonaе judiomonaе Pablo yacaincha matawaqueicha umenatsi. Barapomonaе Pablo cui yabara paebatsi xua abe exana nawita. Ichitha xua barapomonaе paeba jopa tsita itapeinya xeinaeyo xua apara bara xainyei pocotsiwa barapomonaе paeba.

⁸ Nexata Pablo pia coya nayabara paeba, jeye:

—Xan jopa abe exanaeinyo. Jopa abe yabara paebinyo Moisés pia peitorobi coyene tatsi. Matautano Nacom pin pia bo jopa abe yabara paebinyo. Matautano jopa abe yabara paebinyo romanomonaе itorobiya pia pepa peewatsinchi tatsi, jei Pablo.

⁹ Festo bepara antobetsei judiomonaе. Daxota Festo Pablo yainyabatsi, jeichichi:

—¿Jinya ponaetsi Jerusalén tomara beya xua baxotiya cayabara paebinchi nenatsicuentisiwa xua abe neexanaexae? jei Festo.

¹⁰ Pablo jume nota, Festo jume notatsi, jeye:

—Xan uncuan peitabaratha tatsi pomonae pentacaponae, pomonae romanomonae itorobiya pia pepa peewatsinchi tatsi itoroba. Barapomonae pentacaponae bara itacupatsi xua barapo tomarathe tana neyabara paebinexa xua tana natsicuentisiwa xua abe taexanaexae. Jopa nantawenonaeinyo xua taponae tsane Jerusalén tomaratha. Xam bayatha beta yaputaneme xua jopa abe exanaeinyo judiomaetha.

¹¹ Icha xaniwaicha abe exanan barapomonaetha, metha moya benebexubina. Jopa junuwinyo xua tatapaewa tsane. Ichitha icha jopa xainyeyo xua barapomonae neyabara paeba, metha nexata barapomonae jopa nebexubichipae. Tha nama warapaetsi romanomonae itorobiya pia pepa peewatsinchi beya, tacoya nayabara paebichi, jei Pablo.

¹² Copiya matha Festo tsipaeba pejume yaweneibiwichi. Barapoxonae Festo, Pablo baraichi, jeye:

—Yaitama aunxuae siwa ponapaebame romanomonae itorobiya pia pepa peewatsinchi tatsi, xua necayabara paebinexa xua nenatsicuentisiwa xua abe neexanaexae daxota moya ponaename bapon beya, jei Festo.

Meje yabara poxonae Pablo uncua Agripa peitabaratha tatsi pon peyanacua ewatsin jiji

¹³ Icha matabitha Agripa, pon peyanacua ewatsin jiwi, bapon pona Cesarea tomara beya. Petsiriwa puna poinchi, bapowa pewan Berenice. Festo siwa poinchi Cesarea tomaratha iya.

¹⁴ Baraxotiya Agripa petsiriwano ainya matabin ecabe. Festo namchi Agripatha, jeye:

—Xote equa pon cain Félix xubeta Cesarea tomaratha xua bapon pebaru jinompaenexatsi soldadomona.

¹⁵ Poxonae Jerusalén tomaratha ecan, sacerdotemona pia pentacaponae jiwi tatsi, pitiri jiwino, barapomona netsipaeba xua bepa pinae Pablo itorobin xua petupaewa tsane.

¹⁶ Barapomonae baran: ‘Barapocotsi coyene romanomona pan pata cui coyene. Paxan jopa pacopatsinyo xua ichun amanaya bexotsi. Jame copiya pomona xua abe yabara paeba ichuntha, barapomona bewa paebina bapon peitabaratha tatsi icha bara metha bapon xaniwaicha abe exana. Bapoxonae bapon pia coutha beya nayabara paebichipa xua barapomona paeba’, jan.

¹⁷ Daxota poxonae barapomona pata xote, jopa be bayathinyo yaitama. Daxota baya caena nainya ecoundecan, po tututha yabara paebequiban jiwi xua penatsicuentsiwa xua abe peexanaexae. Itoroban soldadomona xua Pablo pecaponaenexatsi taxainya berena.

¹⁸ Xan nanta xeinan xua Pablo bichocono abe exana. Ichitha poxonae barapomona asiya umena peyabara cueicueijeinexa tsainchi, Pablo jopa paebiyo po diwesi xua daxota tananta xeinaenexa xua Pablo bara abe exana cou.

¹⁹ Pocotsiwa xua Pablo yabara cueicueijeichi,

saya xua apara pia pejume cowantsiwa tatsi yabara, matautano xua Pablo peyabara cueicueijeixae pebin pon Jesús baraichi, xua pinae equeicha asu poxonae tupa. Seicaya nama barapomonae paeba xua pinae bapon apara tupa, xua equeicha jopa asuyo.

²⁰ Jopa yaputaeinyo xua baxua exanan xua Pablo abe yabara paebatsi. Daxota copiya matha Pablo yainyaban, janje: ‘¿Xam, jinya ponaetsi Jerusalén tomara beya xua baraxotiya cayabara paebinchi xua nenatsicuentisiwa xua abe neexanaexae?’ jan.

²¹ Ichitha Pablo dapo jumetha netsipaeba xua bepa ponaei Augusto beya, romanomonae itorobiya pia pepa peewatsinchi beya, pon xua bepa pinae yabara paebinchi xua penatsicuentisiwa xua abe peexanaexae. Daxota itoroban soldadomonae xua Pablo abu pebaru jinompaenexatsi soldadomonae, beya abu poxonae necui jupa xua itorobin pontha pon romanomonae itorobiya pia pepa peewatsinchi, jei Festo xua Agripa tsipae-batsi.

²² Nexata Agripa Festo baraichi, jeye:

—Tha bequein iru jume taetsiru Pablo, jei Agripa.

Agripa jume notatsi, Festo jume nota, jeye:

—Metha moya baya tsane jume taename, jei Festo.

²³ Bara icha matabitha Agripa iru Berenice patopabe. Paparuwa peitupanaewa nama xatatabe. Agripa pinmonae baru pata, soldadomonae pia pepa pentacaponawewi tatsino, iru Cesarea tomara pia pentacaponawewino.

Barapo bicheito Agripa baru pona. Festo itoroba soldadomonaе xua Pablo pecarendenaenexa tsainchi.

²⁴ Festo barai, jeye:

—Agripa, xam pon neyanacua ewatsin jiwi, iru pomonaе pecanamataxeinae jiwi pamdu. Bapon xote uncue Pablo. Daxita judiomonaе iru Jerusalen tomarapiwi, iru Cesarea tomarapiwi, daxita barapomonaе Pablo jume yabara paebatsi xua pinae abe exana. Matautano barapomonaе neitoroba nawita xua bepa pinae Pablo itorobin xua petupaewa tsane.

²⁵ Ichitha xan saya tacoya nanta xeinan be jopa neichichi abe exanaeyo, poxonaе nejume nota, poxonaе tsipaeban. Daxota jopa becaenaetaxubinyo xua pebexubiwa tsainchi. Ichitha Pablo netsipaeba xua bepa ponaеi romanomonaе itorobiya pia pepa peewatsinchi tatsi beya, pon pewan Augusto, tsipei bepa pinae yabara paebichi xua penatsicuentsiwa xua abe peexanaexae. Daxota yabara najuntu coyene wetan xua bapon Pablo taitorobiwa tsane bara beya.

²⁶ Yaitama bapon jopa abe exanaeyo, jopa yaputaеinyo xua eta be tajumichiwa tsane barapo cartatha poxonaе Pablo itorobin xuano xua cartano cayabara cui pu catsin bara beya. Daxota anoxuae Pablo painya itabaratha cuaranotan. Xam Agripa, pon neyanacua ewatsin jiwi, moya matha copiya yainyabare Pablo, tsipei tha beta cui yabara tatinaetsi bara beya pontha pon romanomonaе itorobiya pia pepa peewatsinchi.

²⁷ Tsipei inta jopa xanepanaetsipae icha itorobichipan Pablo pon pewaetabinchi icha jopa

yabara paebinchipae xua pocotsiwa bapon peex-
anaexae, jei Festo xua Agripa tsipaebatsi.

26

*Meje yabara poxonae Pablo pia coutha cuita
paeba, Agripa peitabaratha tatsi, pon peyanacua
ewatsin jiwi*

¹ Bara nexata Agripa Pablo baraichi, jeye:

—Icha jinya paebichi, moya taema, jei.

Barapoxonae Pablo namax_u yoicha xua Agripa
jacobatsi. Bapoxonae namchi, jeye:

² “Agripa, pon neyanacua ewatsin jiwi, maisa
bichocono j_{unt}_u coyene weiweinan, xua anoxuae
neitabaratha tana nayabara jume paebixae tsane
pocotsiwa bayatha neyabara paeba judiomonae
po coyene xua pinae abe exaneiban.

³ Poxoru yaitama, xam Agripa, bayatha
yaputaneme pata j_{unt}_u coyenein pomonae
judiomonae panxaein. Yaputanemeno baxuan
xua pana najume matsontsonoban. Daxota
cabaraichi xua saya beta nejume taema xua jopa
aitaconaeinde”, jei Pablo.

*Meje yabara poxonae Pablo nayabara paeba,
poxonae pinae cataunxae jopa jume cow_untsiyo
Jesús*

⁴ Equeicha Pablo namchi, jeye: “Daxita ju-
diomonae barapomonae neyaputane xua pox-
onae pexuyon, poxonae caena bayatha pia xantha
tatsi poponan xua tanacuaxae. Barichino neya-
putane poxonae Jerusalén tomaratha poponan.

⁵ Icha yainyabatsipame barapomonae, yabara
catsipaebichipa pocotsiwa exaneiban xua

fariseomonaē pocotsi juntũ coyene cuidubeiba, pocotsiwa judiomonaē cuidubeibatsi, tsipei xan fariseomonaepin. Daxita barapomonaē yaputane xua caena bayatha jume cowantã daxita pocotsiwa xua barapomonaē itoroba. Fariseomonaē itapeta cuita exaneiba pocotsiwa Nacom itoroba beyacaincha ichamonaē xua exaneiba.

⁶ Judiomonaē necapona xote tsipei saya poxoru yabara wãnaē ewatan xua bexa Nacom asũ exanaena pomonaē xua werapa. Baxua pinaē Nacom wamo susato jiwi yabara tsiwãnaē muxu dutatsi.

⁷ Patamonaē pomonaē Israel nacuamonaepiwi pomonaē xua doce pomonaē bicheitobe, baxua yabara jume cui wãnaē ewata poxonaē petũpaewi equeicha asũ exanaeinchi, xua poxonaē Nacom exanaena. Daxota barapomonaē Nacom wãnaē jainteibatsi. Mataũtano itapeta exana pocotsiwa Nacom itoroba, merawithano, matabithano. Xam Agripa pon neyanacua ewatsin jiwi catsipae-batsi baxua tayabara jume cowantsixaerũ, daxota judiomonaē neyabara paeba xua pinaē abe exanan.

⁸ Painya xoba pananta xeiname xua Nacom jopa itacũpaetsi xua equeicha jiwi asũ peexanaewatsi pomonaē xua werapa”, jei Pablo.

Meje yabara poxonaē Pablo nayabara paeba xua pinaē copiya abe exana nawita pomonaetha pomonaē pejume cowantsiwichi Jesús

⁹ Equeicha Pablo jeye: “Xan copiya tacoutha nanta xeinan xua bewa bichocono abe

exanaein pomonaetha pomonae Jesús pejume cowantsiwichi pon Nazaret tomarapin.

¹⁰ Jerusalén tomaratha baxua exanan. Sacerdotemonae pia pentacaponae wi pia peitorobi coyenewa necata xua daxota tana necui jupaewa xua jiwi tacaponae wi jiwi pecabi botha. Pinmonaecaí caponan, pomonae Jesucristo pejume cowantsiwi. Xan yabara jume jejan xua barapomonae pejutebiwatsi.

¹¹ Anaya caenaetan, peraxa exananno poxoru ichipan xua barapomonae pentsina xua Jesús pejume cowantsiwatsi. Ƨ baxua exanan. Daxita judiomonae pia penacaetutsi bontha tatsi exananno. Bichocono anaepanan. Daxota icha nacuantha ponan tajeichinexa pomonae pejume cowantsiwichi Jesús xua barapomonae abe taexanaenexa”, jei Pablo.

Meje yabara poxonae equeicha Pablo nayabara paeba poxonae pinae jume cowanta Jesús

¹² Equeicha Pablo namchi, jeye: “Barichi sacerdotemonae pia pentacaponae wi tatsi pia peitorobi coyenewa necata xua daxota tana necui jupaewa xua taponae wi Damasco tomara beya, xua pomonae jume cowanta Jesucristo tacaponaenexa tsane Jerusalén tomara berena.

¹³ Xam pon neyanacua ewatsin jiwi bara xaniwaicha catsipaebatsi poxonae namtotha paenaponan poxonae mateinyaxae tsuxubi pecoicha tan xua peitaboco wejopeica, pin coicha po coicha beyacaincha xua xometo. Barapo coicha pomonae nepuna pona nebaru matawacaicha matatsun uncueica.

14 Nexata daxita iratha paothopan. Jume tan xua pon hebreo jumetha nebarai, jeye: ‘Saulo, ¿eta xua tamonae inta abe exaname? Poxonae tamonae peraxa exaname, apara jinya coutha atene nacana exaname icha be buey ichi poxonae ba pia coutha xua xota sojei nataxu matababa’, nejei.

15 Nexata jume notan janje: ‘Pon jiwi Necana-mataxeinaem, ¿jintam xamda?’ jan. Nejume nota jeye: ‘Apara bara xan, Jesús ponxaein inta abe exaname tamonae pomonae tana nejume cowantsiwi.

16 Nontaponde. Xua anoxuae necotame catsita naitatatsi. Apara tha tana nejume yopichim. Matautano bexano equeicha ichawa necotsiname tana neyabara paebinexam tsane baxuanno.

17 Cacui itorobatsi xua Nacom Pejume Diwesi necueicueijamnexam. Nexata cacapanepaeinchi poxonae juntucuru caperaxa exana judiomonae iru pomonae jopa judiomonae naexanaeyo.

18 Caitorobatsi judiomonaetha iru pomonaetha pomonae jopa judiomonae naexanaeyo xua jopa equeicha pejinompaenexa poxonae jopa jume cowantsiyo. Matautano caitorobatsi xua barapomonae jopa peexanaponaenexa pocotsiwa caurimonae pia pentacaponaein tatsi itoroba, pon Satanás, jame meisa peexanaenexa pocotsiwa Nacom itoroba. Matautano caitorobatsi xua barapomonae tana nejume cowantsinexa. Bapoxonae yabara janteminaein barapomonae abe pia peexanae cuiru coyenein tatsi, matautano xua pexeinaenexa pocotsiwa Nacom yabara tsiwanae muxu duba’, nejei Jesús”, jei Pablo.

*Meje yabara poxonae Pablo exana pocotsiwa
Nacom itoroba poxonae tsita naitatsi namtotha*

¹⁹ Equeicha Pablo namchi, jeye: “Agripa, xam pon neyanacua ewatsin jiwi, xan jopa jume-febinyo xua Jesús neitoroba poxonae itaboco wenetsita naitatsica xua namtotha netsita naitata poxonae peçoichatha jume tan xua Jesús netsipaeba.

²⁰ Copiya matha Damasco tomarapiwi tsipaeban Nacom Pejume Diwesi. Bapoxonae equeicha barapo diwesi tsipaeban Jerusalén tomarapiwi. Bapoxonae equeicha daxita Judea nacuamonaepiwi barapo diwesi tsipaebanno. Irũ pomonaetha pomonae jopa judiomonaenaexanaeyo tsipaebanno. Barapo diwesi tsipaeban xua barapomonae icha jũntũ coyenein pexeinaenexa, yawa Nacom pejume cowantsinexatsi, mataũtano xua barapomonaepetsita itapeinya xeinaenexa jiwitha xua bara Nacom jume cowantatsi xua beta peexanaexae.

²¹ Daxota judiomonae newaetaba poxonae Nacom pin pia botha patopan yawa bepa nebexubei.

²² Ichitha Nacom neyawena. Daxota awiya Nacom Pejume Diwesi paeban bichocono daxita i dapomonaeintha pomonaetha pomonae pepawi jiwi irũ poponaethano pomonae peainya cui jiwi. Baraxua saya meisa paeban be pocotsi coyeneya matha juinya Moisés yabara wũnae tsiwanaya paeba irũ be pocotsi coyeneya matha juinya Nacom peitorobi jume pepaebiwi yabara wũnae tsiwanaya paeba.

²³ Barapomonae tsipaeban po diwesi yabara xua pinae bexa Mesías peraxa exanaeinchi icha-

monae. Matautano bapon pinae pon xua copiya pomonae pewerapaewi asu nanta caexanaeinchi. Matautano xua pinae judiomonae iru pomonae jopa judiomonae naexanaeyo yabara yaputane exanaeinchi pecapanenebiyae diwesi jume”, jei Pablo xua Agripa tsipaebatsi.

Meje yabara poxonae Pablo paeba Jesús pejume diwesi Agripatha xua Agripa pejume cowantsinexa

²⁴ Poxonae baraxua Pablo najume weta xua nayabara jume paeba, Festo jume daunweya wawai, jeye:

—¡Pablo, maisa cantsiyaibeca poxoru saya u necuidubi daxota cantsiyaiba! jei Festo.

²⁵ Pablo jume nota, jeye:

—Festo ponxaem tacabar u cui itura jinaeinchi, jopa nentsiyaibiyo apara. Xuaunxuae paeban, apara seicayar u xua xaniwaicha paeban xua bara apara pexainyeiwa.

²⁶ Ee taema, Agripa, pon pepa peyanacua ewatsin jiwi pon xote eque. Bapon yaputane xua xaniwaicha paeban. Bapontha jopa junuwinyo xua tsipaeban. Xuaunxuae catsipaebatsi bapon baxua daxita yaputane poxoru jopa namicha exanaeincho.

²⁷ Agripa, xam pon neyanacua ewatsim jiwi. ¿Jume cowantame pocotsiwa Nacom pia peitorobi jume pepaebiwi paeba? Bara yaputan xua bara jume cowantame, jei Pablo.

²⁸ Agripa jume nota, Pablo jume notatsi, jeye:

—Saya caeto netsipaebame. Saya barapo jumetha nanta xeiname xua xan nainya jume cowantsinan Jesús, jei Agripa.

²⁹ Nexata Pablo namchi, jeye:

—Xua caeto paca tsipaebatsi yawa icha matowa paca tsipaebatsi bara ba Nacomtha pacata wuacatsi xam nexa, iru pomonae nexa, pomonae ne-jume tane painya nejume cowuntsinexam tsane Jesús. Ichichipan xua painya neexanaewa icha ichin xua tajume cowuntsiwa, bara bequein jopa ichipaeinyo xua painya nemaxutha painya nex-einaewa jiwi pecubi nainto be pocotsi nainto xu-aunxuae tamaxutha ducua, jei Pablo.

³⁰ Poxonae Pablo najume weta baxua, Agripa pon peyanacua ewatsin jiwi iru Berenice asiya uncuatababe. Iru Festo pon peyanacua ewatsin jiwi asiya uncuataba. Pomonae iru ena asiya umenaruçpa.

³¹ Aisowa be-iyiya barapomonae natsipaeba, najei:

—Barapon Pablo jopa apara abe exanaeyo po coyeneyatha xua daxota bapon pebexubinexatsi, matautano po coyeneyatha xua daxota bapon jiwi pecubi botha peetsinexatsi, najei barapomonae.

³² Agripa tsipaeba, Festo baraichi, jeye:

—Icha metha jopa naca wucaetsipae Pablo xua peponaewa tsane pontha pon romanomonae itorobiya pia pepa peewatsinchi xua baxotiya peyabara paebinexatsi penatsicuentiwa xua abe peexanaexae metha pu copatsipatsi xua bara pepanepaewa tsane yatsicaewa, jei Agripa.

27

Meje yabara poxonae Pablo Roma tomara beitorobiyatsi

¹ Barapomonae najuntũ coyene weta xua pata taneitorobiwa Italia nacua beya. Pablo irũ ichamonaerũ pomonae peteiquebiwichi daxita barapomonae itorobatsi Roma tomara beya. Pon barapomonae matabapoinchi bapon pewũn Julio, pon soldadomonae pia pentacaponaein tatsi. Barapo matabũxũyo soldadomonae bicheito wũn dutatsi “Augusto soldado bicheito”, jei, poxoru barapo soldadomonae Augusto tanacuitatsi, pon romanomonae itorobiya pia pepa peewatsinchi. Barapo soldadomonae Pablo irũ ichamonae caponatsi Augusto beya.

² Pepa weranaetha pawarapan, po nae Adramitio tomara werena pona. Barapo nae equeicha Asia nacua beya ponaena. Po tomaraxi pitapatha ena barapo tomaraxi bepa siwa ponaeni. Ichũn pana cueyata. Bapon pewũn Aristarco Tesalónica tomarapin. Barapo tomara Tesalónica tomara eca Macedonia nacuatha.

³ Icha matababitha Sidón tomaratha papatan. Baraxota barapon Julio, Pablo barũ jume wũnaetsi. Mataũtano bapon Julio, Pablo copatatsi xua bara Pablo piamonae pesiwa ponaewa tsainchi, xuano xua bara Pablo peyawenaenexatsi xua xoxi nantawenona.

⁴ Bara Sidón tomara wepawarapiyan weratha. Bara weratha paenaponan joibo cuiyainwa Chipre tunaeto pantawaqueban, yaitama bichocono pin joibo dena ichaxoyo copiya payiyan.

⁵ Bara mar mene iya paenaponan, Cilicia nacua, Panfilia nacuano imoxoyo pacaquita enaponan. Bapoxonae Mira tomaratha papatan, po tomara

Licia nacuatha eca.

⁶ Baraxota pon soldadomonae pia pentacaponaein tatsi bapon icha nae taeba baraxota. Barapo nae Alejandría tomara werena pona. Barapo nae iru seicaya Italia nacua beya ponaena. Barapo naetha equeicha Julio pana baru iya Italia nacua beya.

⁷ Ainya matabin saya bewayo paenaponeiban, poxoru yaitama joibo jera caewa carena tsaibi. Gnido tomara paxenta enaponan. Salmón tomarano paxenta enaponan. Creta tunaetono pantawaqueban.

⁸ Bewayo weratha paenaponan, pitapa pacaquita enaponan. Tomaratha papatan ichaxota pexutoroto. Baxota pajebounan, po tomara pewun Buenos Puertos. Barapo tomara imoxoyo eca ichaxota Lasea tomara.

⁹ Baraxota came awiya ainya matabin paenan. Bayatha yapu caewa barapo matabin poxonae barapomonae warapapaeba barapo matabitha xua pin mene mara mene iya. Tsipei imoxoyo awubo tsurucuae tsoponae, daxota Pablo nanta xeina xua icha metha paponatsipan, panacabetsipan. Daxota barapomonae Pablo muxuweta.

¹⁰ Pablo namchi, jeye:

—Pebiwipam, pana nejume taema. Ichaunxuae warapaeinchi methaunxuae nacabetinchi. Matautano methaunxuae weranae abe exanaena. Matautano xoxino xua capoinchi methaunxuae napentsina. Matautano jiwipam methaunxuae napentsina, jei Pablo.

11 Ichitha soldadomonae pia pentacaponaein tatsi, bapon Julio, jopa jume naitomatsiyo xua Pablo tsipaeba. Ichitha dapo jumetha saya meisa pon jera pecanamataxeinaein iru pon jera pex-einaein, baponbe itapeta jume naitomatatsibe.

12 Barapomonae nanta xeina, xua baraxota jopa beenaeyo poxoru barapo tomara jopa cui wunaeyo xua jera pebocaewa poxonae awabo pin joiboxae. Pinmonae barapomonae jiwana tsita xanepanatsi xua Buenos Puertos weya pe-warapaenexa jeratha Fenice tomara beya, po tomara eca Creta tunaetotha. “Methaunxuae tsiwanaya payaeinchi penacabetsi awabo, joi-bono”, jei. Barapo tomara cui wunae xua ichax-ota jera jebouneiba. Baxota joibo yayapa pox-oru tomara naita cafeteca, poxoru joibo jopa patopaeyo pocotsiwa wetsica yawa pocotsiwa wetsina. Baraxota bepa enaei poxonae awabo tsuxubi.

Meje yabara poxonae maratsaca daunwei pepa mar mentha

13 Nexata bewayo joibo tsuncuae, be pocot-siwa parowa wejopeina. Daxota barapomonae namchi: “Bu poinchi cataunxuae saya tsiqui joibiyo”, jei. Bapoxonae totabiya jera. Barapo Creta tunaeto imoxoyo pitapa pacaquita enap-onan weratha.

14 Poxonae saya caeto paenaponan bapoxonae pin joibo pana epa taepona, Creta nacia tunaeto wejoparena. Jera epa yutaba.

15 Nexata joibo jera muxunenababa. Canta joibo nawita, daxota jopa paponaeinyo joibo

beya. Daxota saya pacopatan xua saya bara joibo pana yanacaputabiyaenaba.

¹⁶ Cauda tunaetiyo bepana yanacaputabiya. Baraxota ichaxota joibo yayapa, tsica naeyo jeriyo po naeyo paquetoutan, pajontaxuinan pepa naetha.

¹⁷ Panacuitontan xua pajonta xuinan. Barapo naeyo pepa jeratha pacutabotan. Nexata jera penacuichiwi pepa bamacantha рема wemuxuburu capabina, muxuburu babataruba xua pewacatabiyainwa joibo. Nexata barapomonaе bichocono junuwa poxoru nanta xeina xua mexeya itara jera naxatatabawei taetabotha, po taetabo pewan Sirte. Daxota wera jontabota jeratha. Saya jera caputabiya joibotha.

¹⁸ Icha matabitha came awiya maratsacan bichocono daunwei. Daxota ichawan mentha bebai xua xuan capona.

¹⁹ Icha matabitha daxota pabeban xua jeratha jeba tsipei ichichipa xua tafafanatsi.

²⁰ Ainya matabin came awiya jopa panecotsinyo xometo. Opiteino jopa panecotsinyono. Pajunuwan. Pananta xeinan: “Metha aparaunxuae jopa nacapanenebiya tsainchi. Bunothropaeinchi aunxuae”, pajan.

²¹ Ainya matabin pana yapu xenaca xua jopa panabanaeinyo. Pablo nontapona. Barapomonaе baraichi, jeye:

—Bara bayatha paca tsipaebatsiba: ‘Creta tunaeto beya, jopa pawarapaeinde’, paca baraichiba. Daumetha equeicha pawarapame. Daxota aunxuae jera abe exana. Matautano

pananta puxanameno xuaunxuae pabebam xoxi pacaponame.

²² Ichitha saya jopa pajunuwinde. Jopa pajiwana tupaem tsane, bequein meisa jera naxubina.

²³ Merawi matatsunpin netsita naituta. Barapo matatsunpin Nacom itoroba pon Tanacom xvano xua taexanaexae pocotsiwa bapon neitoroba.

²⁴ Barapo matatsunpin nebarai: ‘Pablo jopa junuwinde poxoru bexa tsane romanomonae itorobiya pia pepa peewatsinchi pon Augusto, peitabaratha tatsi uncuaename. Daxota pomonae xua napona cata capanepatsi Nacom’, nejei matatsunpin.

²⁵ Daxota, paxam pana najuntũ coyene tsacabare, poxoru xan nanta xeinan xua pocotsiwa matatsunpin netsipaeba bara baxua exanaena.

²⁶ Ichitha petunaetotha naca monapentsina, jei Pablo.

²⁷ Poxonae catorce po matakabibe tsuxubi, barapoxonae mar mene pacaxiban. Barapo pepa mar mene pewan Adriático mene. Barapo mentha joibo pana yana muxunenababa. Merawi paetha, pomonae petanacuichiwi barapo naetha, barapomonae nanta xeina xua imoxoyo ira itiya pona.

²⁸ Barapomonae mene epa tutu canaũbareca. Treinta y seis po mũ epatiyobe xeina xua iratha deca. Caeto equeicha mene epa tutu canaũba, baxota veinte y siete po mũ epatiyobe xeina xua iratha deca.

²⁹ Barapomonae pejunuwixae xua jera tofotabina poxonae yutabina ibowantha, daxota

barapomonae po nainto arewe, xua jera duntaba exanaduta petafe xoreca. Cuatro po naintobe xoreca peruntaba exanadutsinexa. Matautano barapomonae Nacomtha wɥca xua xometo pentha tsane, penecotsinexa tsane.

³⁰ Pomonae petanacuichiwi barapo naetha barapomonae nanta xeina xua perɥcɥpaewa. Daxota barapomonae naemata po nainto arewe dureca peɥɥɥreca. Ichitha tsiqui naeyo mentha durecano, poxoru pia namicha dɥcɥpaetsi barapo naeyoŋtha.

³¹ Pablo barai Julio, pon soldadomonae pia pentacaponaein tatsi, xuano baraino soldadomonaeŋaetha, jeye:

—Icha pomonae petanacuichiwi barapo naetha icha jopa enae tsane barapo pin naethe, jopa Nacom capanenebiyae tsane, jei Pablo.

³² Daxota soldadomonae jeriyo mɥ ucuiba. Jeriyo mentha jopeica.

³³ Poxonae caemɥmbo, Pablo pijiwimonae jain itoroba. Pablo pijiwimonae barai, jeye:

—Bayatha dos po semanabe painya junuwi jopa bichocono panabanaem poxoru pajunuwame xua pabunothopame.

³⁴ Daxota pin jumetha paca jeichichi. Moya matha paxaema tsipei baxua ainya cui xua painya nenacapanenebiyaenexam. Bara caein jopa napuxanae tsane. Matautano jopa caentanatiyo aichurucuae tsane.

³⁵ Poxonae Pablo najume weta, pecobetha pan pita, Nacomtha tsipaeba barapomonae peitabaratha tatsi. Barapoxonae pan epa janaxuba. Bapoxonae xane.

³⁶ Baroxonae barapomonae najuntũ coyene tsacabarũcũpa. Mataũtano barapomonae daxita jũntema nabanerũcũpa.

³⁷ Jerapiwi doscientos setenta y seis po matabũxũmonaebe pan xua daxita pan.

³⁸ Poxonae barapomonae najain wetarũcũpa, daxita barapomonae trigo xu bebai pepa mentha poxoru bepa jera tafafanaetsei.

Meje yabara poxonae jera bunareca

³⁹ Poxonae xometo baya pentha tsina, pomonae petanacuichiwi barapomonae jopa yaitaeyo ira, po iratha muxu pepatsi. Poxonae barapomonae pexutoroto tane, barapomonae nanta xeina xua juntucuru jebounaena taetabo itapatha.

⁴⁰ Daxota barapomonae nayana mũ ucuiba, xua po nainton arewe mene bũpana bobendeca. Po catenano pecabobotsi catena, barapo catenano isanaxoreca. Nexata paparuwa duta wera nae-totha. Barapo wera rebũxũtha duta. Jera nainya cacuita caputabiya ira.

⁴¹ Ichitha barapoxonae barapo nae ichaxota tsewa tuwũtha naxatatabarena. Bũxũ naxatatabuncua bichocono. Petafe fotaba maratsacatha.

⁴² Soldadomonae bepara jutebei pomonae petiquebi jiwichi, tsipei poxonae mentha othopaena mexeya itara dũcũpaenawei.

⁴³ Ichitha soldadomonae pia pentacaponaein tatsi, bapon Julio, ichipa xua Pablo asũ popona. Daxota Julio jopa yabara jume copatsiyo xua jutebinchi pomonae petiquebi jiwichi. Baroxonae Julio itoroba pomonae yaputane xueiba, copiya pepatsinexa tsane pepa iratha.

44 Pomonaē xua jopa xueibiyo napaewan cobena xueibiya. Matautano barapo jera pepan cobena xueibiya. Daxota daxita panenebiya pepa iratha.

28

Meje yabara poxonaē Pablo Malta tunaetotha patopā

¹ Poxonaē po tunaetotha papanenebiyan icha-monaē pana tsipaeba: “Apara Malta tunaeto”, jei.

² Malta tunaetopiwi beta pana matenta wei-weinaya waba. Bichocono ema duna. Ema pana atsana. Aqueno. Daxota barapomonaē pin isoto itutaeta. Bapoxonaē barapomonaē pana waba: “Antha panonopenare”, jei.

³ Pablo isoton nota po isoton tsewa. Poxonaē barapo isoton pepa isototha bebebeya, barapo isotontha jomo athabe jopeina poxoru bichocono atou. Pablo cobe sinaducuatsi barapo jomo.

⁴ Malta tunaetomonaepiwi, Pablo cui tainchi xua jomo cobe sinaducuatsi. Barapomonaē nantiya natsipaeba, najei: “Barapo pebin apara pon jiwi pejutebin. Bequein panepa pepa mar mentha ichitha barapo nacom, po nacom pewan Justicia, bapon itoroba jomo pesinarucuaenexa tsainchi, xua bapon jopa pepoponaenexa tsane”, jei barapomonaē.

⁵ Ichitha Pablo nacobe nunutaba jomo isototha. Saya axaibi tsuncuae Pablo.

⁶ Daxita barapomonaē Pablo cui necotumeinchi xua cobe putsunanaya yawa icha iratha jopiyaena petupaein. Bayatha cui wenaewatumena. Poxonaē baxua jopa daichiyo, daxota equeicha

ichawa nanta xeinar_uca: “Metha moya bara Pablo nacom tsecae”, jei bapomonaе.

⁷ Ichaxota isoto, baxota ainya iran bobena Malta tunaeto peewatsin, bapon pia iran tatsi. Bapon, acoibi po matabibе beta pexaewa pana apata. Baxota yawa pamaitenan. Bapon pew_un Publio pon iran pata tan.

⁸ Publio paxa tatsi camatha boca. Domaebatsi. Suibatsino. Pablo barapo tutu bejoniya ichaxota bapon boca. Bapoxonaе Pablo cobe jayabiya tsi-paeba Nacomtha. Bara bapon axaibi tsanaya.

⁹ Poxonaе baraxua exana Pablo, daxita Malta tunaetomonaе, pomonaе peatenewi, baxota pata. Ir_u Pablo axaibi exanar_u daxita barapomonaе.

¹⁰ Malta tunaetomonaе pana bar_u cui itura jina nawita. Bapoxonaе poxonaе equeicha pawarapar_ucaпан jeratha, pana nepu catsiba xua xoxi pata nantawenonaenexa poxonaе weratha pawarapan.

Meje yabara poxonaе Pablo Roma tomaratha patopá

¹¹ Poxonaе acoibi po xometiyobe payapucae-wan barapo Malta tunaetotha, barapoxonaе pawarapan. Pawarapan weratha po naetha po nae barapo Malta tunaetotha ayaw_ubo tsuncuae. Barapo nae Alejandría tomara werena peponae nae. Barapomonaе barapo naetha petafetha cuareta naewiyo be jitonyobe. Saya canaxoba pia nacombe. Icha nacom pew_un Cástor. Icha nacom pew_un Pólux.

¹² Siracusa tomaratha pajebounan. Barapo tomaratha acoibi po matabibetha paenan.

13 Barapo tomara wepawarapiyan, Siracusa tomara weya. Bapoxonae Regio tomaratha papatan. Icha matabitha joibo wexubiye Puteoli tomara bepana yanacaicha ainya merawibe. Baxota papatan Puteoli tomaratha.

14 Baraxota pacaxiban pomonae iru pejume cowantsiwichi Jesús. Barapomonae pana waba: “Cae semanatha pana baru enare”, jei. Bapoxonae equeicha Roma tomara bepawarapiyan. Pecaer payiyan.

15 Pomonae iru pejume cowantsiwichi Jesús, Roma tomaramonaepiwi, cou pana yabara jume tane xua imoxoyo papatan. Daxota cou ichamonae pana siwa dendena pecaerena. Foro de Apio tomara beparena. Ichamonae Tres Tabernas tomara beparena pia pana taetsi. Poxonae Pablo barapomonae tane, Nacomtha tsipaeba. Pablo juntu coyene sadujei xua juntema pepoponaewa poxonae tane pomonae pejume cowantsiwichi Jesús.

16 Poxonae Roma tomaratha papatan, soldadomonae pia pentacaponaein tatsi, copata xua Pablo bara saya pepoponaenexa icha botha, xuano xua saya caein Pablo peyapu eenaenexatsi soldadomonaein.

Meje yabara poxonae Pablo Nacom pexeyna jume diwesi paeba Roma tomaratha

17 Poxonae acoibi po matabibibe yapucaewa, Pablo najume caruta ichamonaetha petawabinexa tsainchi Roma tomarapiwi, pomonae judiomonae pia pentacaponaei

tatsi. Poxonae barapomonae pata, Pablo barai barapomonae, jeye:

—Tamonae, jopa abe exanaeinyo wamonaetha pomonae judiomonaexae. Matautano bequein jopa abe exanaeinyo wamo susato jiwi piamonae pia coyene cuitha tatsi, ichitha barapomonae newaetaba. Matautano jiwi pecubi botha necapona Jerusalén tomaratha xua romanomonae pia pentacaponaewi tatsi pia xantha tatsi.

¹⁸ Barapomonae, romanomonae, neyabara yainyaba nawita xua icha abe exanan. Ichitha barapomonae neyaputane xua jopa abe exanaeinyo. Daxota barapomonae ichipa xua saya tana necopatabiwa tsane. Romanomonae aichaxaibi xua jemeicha saya nenacui cayantomata xua tana nebexubiwa tsane tsipei pinae jopa abe exanaeinyo.

¹⁹ Ichitha judiomonae neapusiwa xua jopa taponaeewa tsane. Daxota bewa wucaein xua taponaeewa tsane romanomonae itorobiya pia pepa peewatsinchi beya, xua tana neyabara paebinexa tsane icha metha abe exanan. Baxota ponan bequein jopa xeinaeinyo xua po coyene tayabara paebiwa tamonae xua abe exana.

²⁰ Daxota paca wabatsi tha paca cataetsi xuano xua tha panejume taeicham. Waxainchi israelmonaexaetsi wuinae ewatatsi pon Nacom itorobicaeaba. Tajume cowuntsixae baxua daxota anoxuae penainto tamaxutha ducua, jei Pablo barapo pentacaponaewitha.

²¹ Barapoxonae romanomonae Pablo baraichi, jeichichi:

—Jopa painta patopaeyo carta Judea nacua werena xua xam necayabara tinaewa. Po judiomonae, Judea nacua werena pata pomonae patamonae, barapomonae jopa abe cayabara pae-biyo.

²² Paichichipan paca jume tainchi xua jinya coutha nanta xeiname. Poxoru daxita nacuan pajume tan, xua Jesús pia pena pecuidubi coyenewan tatsi abe yabara paeba, jei barapo judiomonae pia pentacaponawewi tatsi xua Pablo tsi-paebatsi.

²³ Pablo muxu tsipaebatsi po mataqueitha xua patsina. Barapo mataqueitha Pablo pia botha tapatatsi pin bicheito. Pablo baya tamropata pitaba xua tsipaeba barapomonaetha, beya yapentha. Pablo jume daunweya yabara cueicueijei barapomonaetha po diwesi po coyene xua Nacom waba jiwi petanaexanaenexatsi piamonae tatsi poxonae Jesús jume cowantatsi. Matautano tsipaeba barapomonaetha Jesús yabara xua Jesús apara pon Moisés yabara paeba pia peitorobi coyenewatha. Matautano Jesús apara pon Nacom pia peitorobi jume pepaebiwi yabara tina pia petinae diwesinha.

²⁴ Xua Pablo po jume diwesi paeba, ichamonae jume cowanta poxonae cataunxuaerü ichamonae jopa jume cowantsiyo.

²⁵ Barapomonae be ainya bicheitobe natsicotane. Daxota bapomonaebe tamropata notarücyra xua peponaewa. Pablo namchi, jeye:

—Po diwesi Nacom pia Pejumo pe tünaxü tatsi cata xua Isaías catatsi xua bapon petsipaebinexa xua wamo susato jiwi petsipaebinexatsi, barapo

diwesi po diwesi pexeinya diwesi, xua jeye:

²⁶ ‘Ponde, barapomonaethano jande:

Pajume taneme ichitha jopa xapain payabara
jume yaputaem pocotsiwa pajume taneme.

Pataneme painya itacueretontha ichitha
jopa xapain payaputaem pocotsiwa panecotame.

²⁷ Barapomonaē najantꞫ coyene ararana exana,
jopa peichichipaexae xua pejume taewa.

MataꞫtano antꞫfaetabiya jume tane.

Barapomonaē baraxuan exana,

poxoru jopa betaeyo peitacueretontha,

poxoru jopa bejume taeyono pemuxutontha,

yawa poxoru pejꞫntꞫ coyeneintha jopa beya-
putaeyo.

Barapomonaē jopa ichipaeyo xua tana netsita

xeinaewa icha jꞫntꞫ coyene xua daxota jopa

neitacꞫpaeyo xua tayabara jꞫntemainaewa

abe pia peexanae cuiru coyenein tatsi’,

jeyei Nacom pia PejumoꞫe tꞫnaxꞫ tatsi xua

Isaías cueicueijei exanatsi pinae, jei Pablo.

²⁸ Pablo cataunxuae cueicueijei, jeye:

—Anoxuae xuano bexa tsaneno payaputaē-

name xua pomonaē jopa judiomonaē naexanaeyo

jume taena Nacom pia pecapanenebiyae diwesi.

Bara barapomonaē beta jume naitaewatsina.

²⁹ Poxonaē Pablo najume weta natsixibarꞫꞫpa

judiomonaē. Poxonaē pona barapomonaē yabara

najume matsontsonoba xua Pablo paeba.

³⁰ Pablo Roma tomaratha popona ainya

weibe. Pia botha eca xua saya tanacowaeicha

eca. Barapo botha daxita matenta weiweinaya

wabeiba pomonaē pesiwa poneibixaetsi Pablo.

31 Pablo tayapu xanepanatsi xua pepoponaewa. Barapoxonae Pablo barapomonaetha yabara tsipaeba po diwesi po coyene Nacom waba jiwi petanaexanaenexatsi pijimonae tatsi pomonae itorobiya peewatsixae. Matautano yabara cuidubano xua Jesucristo yabara, pon Pecanamataxeinaein jiwi. Romanomonae pia pentacaponaein tatsi Pablo jopa cui matawentichi.

Baja Lucas.

cci

Nacom Pejume Diwesi po diwesi pena jume diwesi xua Jesucristo yabara tinatsi New Testament in Cuiba

copyright © 2010 Wycliffe Bible Translators, Inc.

Language: Cuiba

Translation by: Wycliffe Bible Translators, Inc.

Copyright Information

© 2010, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Cuiba

© 2010, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-22

PDF generated using Haiola and XeLaTeX on 18 Apr 2025 from source files
dated 29 Jan 2022

e9c4c3a0-6dec-54a4-aaba-fb395e5eddc7